



E-BOOK

সরস গল্প

বিভূতিভূষণ বন্দ্যোপাধ্যায়

কল্যাণ ল

৫৭-এ কারবালা ট্যাক্স লেন । কলিকাতা ৬

প্রথম প্রকাশ : নভেম্বর ১৯৬২ । অগ্রহায়ণ ১৩৬৯

প্রকাশক : কুণালকান্তি ঘোষ

কল্লোল । ৫৭-এ কারবালা ট্যাক্স লেন । কলিকাতা ৬

প্রচ্ছদ ও অলংকরণ : তাপস সরকার

মুদ্রাকর : নেপালচন্দ্র ঘোষ

৫৭-এ কারবালা ট্যাক্স লেন । কলিকাতা ৬

সূচীপত্র

মুক্তপুরুষ হরিদাস ১

পার্থক্য ১৪

আইনস্টাইন ও ইন্দুবালী ১৮

উড্ডম্বর ৩৯

জওহরলাল ও গড্ ৫০

মূলো—র্যাডিশ—হর্স র্যাডিশ ৫৮

আচার্য কৃপালনীর কলোনী ৮৫

কমপিটিশন ৯৬

ব্র্যাকমার্কেট দমন কর ১৮৮


অনুশোচনা ১১৩

পথিকের বন্ধু ১১৯

কলহাস্তরিকা ১২৭

অসমাপ্ত ১৩৩

অভয়ের অনিদ্রা ১৪৫



মুন্ডপুরুষ হরিদাস

এটি মুন্ডপুরুষ হরিদাসের জীবনী।

হারদাস চক্রবর্তী বি-এ, বি-টি এখানকার স্কুলে অনেকদিন ধরিয়া মাস্টার করিতেছেন। সম্প্রতি মুর্শাকল হইয়াছে এই যে, একে দিনে রাতে চোখের অগ্নিতে তিনি রাতিন্ত ভুগিতেছেন, তাহার উপর হেড-মাস্টারের কড়া তাগাদা—হাফ-ইয়ারলিং খাতাগুলো আর ক’দিন ফেলে রাখবেন মশাই? সব মাস্টারদের খাতা দেওয়া হয়ে গেল, আর আপনি কাইন্ড্ ডইক্‌স্ খাতা নিয়ে বসে আছেন—একখানাও দেখলেন না—এতে ক’রে স্কুলের কাজের যথেষ্ট ক্ষতি হচ্ছে।

হরিদাসবাবু বিনীত ভাবে বলিলেন—চেষ্টা তো বরাচ স্মার, চোখের জন্তে পড়তে পাচ্ছি না, দাঁচ্ছি যত শীগগির হয়—

আবার তিন দিন গেল। আবার হেডমাস্টার কড়া তাগাদা দেন—কি মশাই? এখনো আপন খাতা দিচ্ছেন না?

—দাঁচ্ছি স্মার, আর দু-পাঁচটা দিন—

—না মশাই, তা হবে না। আপনি পরশু অনশ্চয় খাতা দেবেন, নয়তো স্টেপ নিতে বাধ্য হবো। আমি কোনো অন্প্লেক্স্যান্ট ব্যাপার করতে চাই নে, কিন্তু—

তার উপর বাড়ীতে একপাল ছেলেমেয়ে দিনরাত খাই খাই

করিতেছে, তাহাদের খাওয়ার আকাজক্ষা মিটাইতে পারে, ত্রিভুবনে হেন
রাপ-মা আজও জন্মগ্রহণ করে নাই। সামান্য বিয়াল্লিশ টাকা বেতনের
স্কুল মাস্টার হরিদাসবাবু এই যুদ্ধের বাজারে আর কত খাওয়ানোর
ব্যবস্থা করিতে পারেন ?

খাতা একটি গাদা। সকালে উঠিয়া টিউশনি করিতেই সময় কাটিয়া
যায়, বন্ধু-বান্ধবের সঙ্গে একটা কথাবার্তা বলিবার পর্যন্ত সময় হয় না।
বাজার করিতে হয় টিউশনি করিয়া ফিরিবার পথে। বাড়ীতে গিয়াই
শুনিতে হয়, গিন্নি বলিয়া বসেন, আজ একখানা শাড়ী ছাখো, যেখানেই
হোক, মেয়েটা কি ঠাংটো হয়ে থাকবে ? তোমার না হয় গা হিম
ক'রে বসে থাকলে চলে, আমার তো তা চলে না ?

কাপড় কোথা হইতে আসে সে জ্ঞান যাদ বাড়ীর মেয়েদের
থাকিত। তাহা ছাড়া দু-এক মাস হয়, লোকে পারে। এই ব্যাপার
চলিতেছে কি আজ ? কতকাল হইতে এই অবস্থায় তিনি কালযাপন
করিতেছেন বা আরও কতকাল করিতে হইবে, তাহা কে জানে ?

কিস্তি উপায় কি ? উপায় তো কিছুই দেখেন না।

এই সময় আর একদিন হেডমাস্টারের কড়া কথা শুনিতে হইল
পরীক্ষার খাতা ভাল করিয়া দাগ দিয়া না দেখার দরুণ। হেডমাস্টার
বলিলেন—খাতাগুলো কি অমন ক'রে দেখে ? ওতে ছেলেদের এক
সুবিধে হবে মশাই ? আপনি আজকাল কাজে বড় অমনোযোগী হয়েছেন,
খাতাগুলো ফেরৎ নিয়ে যান, ওতে কাজ চলবে না।

সেদিন টিফিনের ছুটিতে স্কুলের গাছতলায় বাসিয়া বিড়ি টানিতে
টানিতে হরিদাসবাবুর মনে হইল এ বিষম বিপদ হইতে কবে তিনি
পরিত্ৰাণ পাইবেন। এই বন্ধন দশা চলিতেছে কতকাল। এমন কি কোনো
উপায় নাই, যাহাতে তিনি এই দুঃখ, দারিদ্র ও ক্রীতদাসত্বের বন্ধন
এড়াইতে পারেন ?

ভগবান এ প্রার্থনা শুনিলেন।

কি ভাবে তাহা বলি । বড় আশ্চর্য ঘটনা ।

থার্ড ক্লাসের শ্রীপতি কুণ্ডু বেকির তলায় লুকাইয়া কি বই পড়িতেছে হরিদাসবাবু দেখিতে পাইলেন। ছ'বার ধারণও করিলেন—এই কি হচ্ছে? অন্ধ কষো—তাড়াতাড়ি কষো—

কিন্তু শ্রীপতি অন্ধ কষিবে কেন, ভগবান যে অত তাহাকেই দূত-রূপে প্রেরণ করিয়াছেন সংসারক্লিষ্ট হরিদাসের নিকট। এরূপ অলৌকিক ঘটনা আপনারা মহাপুরুষদের জীবনীর মধ্যে অনেক পাঠ করিয়াছেন, মনে করিয়া দেখুন। শ্রীপতি আবার লুকাইয়া সেই বইখানা পড়িতে লাগিল। এবার হরিদাসবাবু চেয়ার হইতে উঠিয়া গিয়া তাহার হাত হইতে ছোঁ মারয়া কাড়িয়া লইয়া তাহার কান সজোরে মলিয়া দিলেন। পরে চেয়ারে ফিরিয়া আসিয়া বসিলেন। কৌতূহলবশতঃ বইখানা খুলিলেন। আগে ভাবিয়াছিলেন, কোনো নাটক নভেল হইবে—অন্ততঃ ভূতের গল্প; কিন্তু তা নয়, বইখানার নাম ‘বীর-বাণী’, স্বামী বিবেকানন্দ রচিত। হরিদাসবাবু ধর্মের ধার কখনো ধারিতেন না, তবে বিবেকানন্দের নাম ভালই জানিতেন। বইখানা একবার পড়িয়া দেখিবেন বলিয়া হাতে করিয়া রাখিয়া দিলেন।

পরদিন রবিবার। টিউশনি ছিল না। বাড়ীতে চা খাইয়া হরিদাস-বাবু বইখান। লইয়া বসিলেন। পড়িতে পড়িতে তন্ময় হইয়া গেলেন। এসব কি কথা! আমিই সেই! আমিই ভগবান। অহং ব্রহ্মাস্মি। সোহহং।

কি মহান, বিরাট আইডিয়া! এক হিমালয়ের মত উদার গগনচুম্বী বাণী! হরিদাস মান্টার ধীরে ধীরে পরিবর্তিত হইতে লাগিলেন। তাঁহার মাথা গিয়া মহাব্যোমে ঠেকিল, স্বসংবেগ অল্পভূতিতে মনপ্রাণ ভরিয়া গেল, তিনি আজ অজর, অমর, শাস্ত্র আত্মা, ভগবান আর তিনি হাত ধরাধরি করিয়া যুগ-যুগ পার হইয়া চলিয়া আসিয়াছেন, অনন্তকাল ধরিয়া, চলিবেন অনন্তকাল ধরিয়া। তিনি মহাজ্ঞানী, মহাপ্রেমিক,

বিভূতিভূষণ : সরস গল্প

মহাবীর। জগৎকে বেদান্ত শিক্ষা দেবার জন্য, এই পরম সত্য প্রচার করিবার জন্য তিনি লীলাদেহ ধারণ করিয়াছেন—ক্রমে একথাও ধীরে ধীরে হরিদাসবাবুর মনের নিভৃত কোণে বাসা বাঁধিতে লাগিল।

. হরিদাস মাস্টার ব্রাহ্ম।

এক আধদিন নয়, সাতদিনে বইখানি অন্ততঃ পাঁচবার পড়িলেন। খাতা দেখিবার জন্য ফোর্থ ক্লাসের ছুরুল হকের নিকট হইতে যে নীল পেন্সিলটা আনিয়াছিলেন, তাহা দিয়া দাগ মারিয়া পড়িলেন, ছেলেদের পরীক্ষার কাগজ হইতে সংগৃহীত সাদা কাগজে অনেক ভালো কথা টুকিয়া রাখলেন, রাত্রি জাগিয়া বইখানার মধ্যে উদ্ভূত অনেক সংস্কৃত শ্লোক কণ্ঠস্থ করিলেন, মোটের ওপর বইখানি লইয়া মশগুল হইয়া রহিলেন।

ধন্য ঐশ্বর্ষ্য! তুমি বালকমাত্র, তুমি জানো না ছুঃখ, হত-ভাগ্য শিক্ষকের জীবনে তুমি কি জিনিস দিলে। এ অনেকটা সেই বটনার মত। হরিদাসবাবু ও তাহার এক বন্ধু পায়ে হাটিয়া বৈতালি বেড়াইতো গিয়াছিলেন, ছপুর ঘুরিয়া গেল, ছ'জনেই অভুক্ত। অবশেষে কোথাকার বাজারের এক অপকৃষ্ট হোটেলে তাহার পিতলের থালায় মোটা চালের ভাত খাইতে বসেন। তখন ছপুর অনেকক্ষণ ঘুরিয়া গিয়াছে। তাহার বন্ধুটি দারুণ ক্ষুধার মুখে ভাত পাইয়া মহা খুশ, খাইতে খাইতে গদগদকণ্ঠে বার বার বলিতে লাগিল—হরিদাস তুমি জানো না সিস্টেমকে তুমি কি দিলে!

হরিদাসবাবুর বড় মনে ছিল কথাটা।

ঐশ্বর্ষ্য! তুমিও জানো না, হরিদাসবাবুকে তুমি কি দিলে।

এই সাতদিনে হরিদাসবাবু সম্পূর্ণ বদলাইয়া গেলেন। এসব বাণী পৃথিবীতে আছে তাহাকে কেহ বলে নাই। তিনিই বা কি করিয়া জানিবেন?

স্কুলে গিয়া ঐশ্বর্ষ্য! তুমিও জানো না, হরিদাসবাবুকে তুমি কি দিলে।

কোথায় পেলি ?

—আজ্ঞে ও দাদার বই ।

—কোথায় পেলে রে তোর দাদা ও বই ?

—কোথেকে এনেছিল স্মার । আরও আছে ওইরকম ছুঁতিনখানা বই ।

—আছে ? আজ টিফিনের সময় নিয়ে আসবি । অবিশিষ্ট করে—
আনবি—বুঝলি ?

টিফিনের ছুটির পরে শ্রীপতি কুণ্ডু আরও ছুঁতিনখানা বই আনিয়া দিল ।
বিবেকানন্দের ‘রাজযোগ’ এবং স্বামী মহেশ্বরানন্দ গিরির ‘অধ্যাত্ম-
দর্শন’ ।

হরিদাসবাবু যেটুকু সময় পান, বই ছুঁতিন পড়েন । ছুঁদিন
টিউশনি কামাই করিলেন । হরিদাসবাবুর স্ত্রী তাগাদা দেন—তুমি এ
ছুঁদিন ছেলে পড়াতে যাও নি যে ? আজও তো হিম হয়ে বসে আছ ।
টিউশনি আছে তো ?

—থাকবে না কেন ?

—তবে যাও না কেন ? ঐ দশটা টাকা আসে তাই ছুঁটা হয় ।
সকালের ছেলে পড়ানো চলে গেলে দুধ ছাড়িয়ে দিতে হবে । দাম
জোগাবে কোথা থেকে ? আজও যাবে না নাকি ?

—আজ শরীরটা তেমন ভাল নেই ।

—এই তো দিব্যি চা খেলে । যাও একবার বেড়াতে বেড়াতে,
লালমোহন ঘোষ কথার লোক, সে-বার সেই জানো তো ? বেগুন বিয়ের
জন্মে তিন দিন কামাই হয়েছিল বলে ছাড়িয়ে দিতে চেয়েছিল । আজ
বসে থেকো না, যাও ।

লালমোহনের তাগাদার চেয়েও গৃহিনীর তাগাদা কড়া । হরিদাস-
বাবু স্ত্রীকে ভয় করিয়া চলেন । অগত্যা বই লইয়া চলেন ছাত্রের বাড়ী ।
ছাত্রের বাবা লালমোহন ঘোষ বড় আড়তদার ব্যবসায়ী । ঘুঘু লোক ।

বিভূতিভূষণ : সরস গল্প

লালমোহন বাড়ী ছিল না তাই রক্ষা। হরিদাসবাবু আর আগের মত অত ভয়ও করেন না। যা বলে বলিবে। পুস্তকের অধীত জ্ঞান যদি দৈনন্দিন কর্মের ক্ষেত্রে প্রয়োগ করিতে না পারা গেল, তবে জ্ঞানের মূল্য রহিল কোথায়।

স্বামী মহেশ্বরানন্দ গিরির পুস্তকেই আছে, “যে ব্যক্তি শুধু বোঝা বোঝা পুঁথি পড়ে অথচ একবারও আত্মচিন্তা করে না, ভগবানের সহিত একাত্মবোধ তাহার নিকট হইতে অনেক দূরে অবস্থান করিতেছে। সেবা-ধর্মের উৎকর্ষ সম্বন্ধে যে অনেক প্রবন্ধ রচনা করিয়াছে, পাঠ করিয়াছে, কিন্তু কখনো ভিখারীকে একটা পয়সাও দেয় নাই, ভগবানকে চিনিতে বা বুঝিতে তাহার এখনো বহু বিলম্ব।”

হরিদাসবাবু ছাত্রকে ডাকিলেন—কেশব ?

ছাত্র বাহিরে আসিয়া বলিল—কাল পরশু এলেন না স্ত্র ?

হরিদাসবাবু আগে আগে এক্ষেত্রে বলিতেন, অসুখের জন্ত আসিতে পারেন নাই। কিন্তু এবার তিনি সে লোক নহেন। এত ভয় কিসের ? লালমোহন ঘোষের তিনি ধার ধারেন না। সত্য কথা বলিবেন, ইহাতে ভয় করিলে চলে না। অতএব বলিলেন—এমনি একটু অসুবিধে ছিল।

—বাবা বলছিলেন, তাই বলছি, স্ত্র।

—কি বলছিলেন ?

—বলছিলেন। জানেন তো বাবাকে। ওইরকম লোক।

—তা কি হবে এখন ? বাড়ীতে অণ্ড কাজ ছিল। পড়ে।

ছেলেকে অঙ্ক কষিতে দিয়া হরিদাস মহেশ্বরানন্দ গিরির বই পড়িতে লাগিলেন।

“বিচারবলে কেহ কেহ জানিতে পারেন যে জগৎ ব্রহ্ম, সাক্ষাৎকার হইলে, তবে আপনাকে ও জগতকে ব্রহ্ম হইতে অভিন্নরূপে দর্শন হয়।”

“যাঁহারা প্রকৃত জ্ঞান লাভ করিয়া সর্ববিধ সংস্কার বর্জিত হইয়াছেন,

তঁাহারা আপনাকে ও বহুরূপী জগৎকে ব্রহ্মরূপেই দর্শন করেন।”

হরিদাসবাবুর দেহ রোমাঞ্চিত হইয়া উঠিল। তঁাহার মনে হইল, জ্ঞান তঁাহার হইয়া গিয়াছে। সব সংস্কারের একটি সংস্কারও তঁাহার নাই। ব্রহ্ম ও তিনি যে এক, এ জ্ঞান তঁাহার মর্মে মর্মে ঢুকিয়াছে।

কি ভয়ানক কথা!

এত সহজে সংসারের জ্বালায়ন্ত্রণার হাত এড়ানো যায়, কেহ এতদিন তঁাহাকে বলে নাই কেন?

পুনরায়—“মুক্ত-পুরুষসহ উপযুক্ত অবলম্বন করিয়া উত্তমপুরুষ ব্রহ্মে চিরপ্রতিষ্ঠিত হয়েন।”

সাধন তো তঁাহার হইয়া গিয়াছে। তিনি সব বুঝিতে পারিয়াছেন। সাধন না হইলে দিব্যজ্ঞান হয়? দিব্যজ্ঞান তঁাহার হইয়া গিয়াছে অথবা যদি বাকি থাকে, সামান্যই বাকি।

“তদবস্থায় গুণাতীত আশ্রয়রূপী ব্রহ্ম তঁাহাদের নিকট স্বতঃই প্রকাশিত হয়েন এবং তঁাহারা ব্রহ্মস্বরূপতা প্রাপ্ত হয়েন।”

উঃ, ও সব কথা এতদিন কোথায় ছিল!

পুনরায়—“সময় না হইলে তত্ত্বসমূহ জীবের নিকট প্রকাশ করা হয় না। যে উপযুক্ত পাত্র, মহাপুরুষবাক্যের সম্পূর্ণ অনুকূল, শুধু তঁাহারই নিকট গভীর শাস্ত্রতত্ত্বসমূহ উপস্থাপিত হইয়া থাকে।”

ধন্য মহেশ্বরানন্দ গিরি! ধন্য শ্রীপতি কুণ্ডু!

আজ সময় হইয়াছে বলিয়াই তাহা হইলে এ তত্ত্ব তঁাহার চোখের সামনে ভগবান মেলিয়া ধরিয়াছেন।

দিন-কুড়ি কোথা দিয়া কাটিয়া গেল, হরিদাসবাবু বুঝিতে পারিলেন না। আগের সে হরিদাসবাবু একেবারেই নাই। যে ব্যক্তি আত্মতত্ত্ব উপলব্ধি করে সে কি আর সাধারণ মানুষ থাকে। হরিদাসবাবুর সাহস বাড়িয়া গিয়াছে, আগের মত ভীক তিনি আর নাই, টিউশনির ছাত্রের পিতাকে আর তত গ্রাহ্য করিবার আবশ্যক কি?

বিভূতিভূষণ : সরস গল্প

কিসের ভয় তাঁর ? তিনি অজর অমর আত্মা । দু'দিনের জন্ত লীলা-
খেলা করিতে পৃথিবীতে আসিয়াছেন । এতদিন বুঝিতে পারেন নাই তাই
ছোট হইয়া ছিলেন ।

হরিদাসবাবু স্বাধীন হইবেন ।

সর্বপ্রথমে চাকুরী ছাড়িতে হইবে । জীবনকে সম্পূর্ণরূপে ভোগ
করিতে হইলে বন্ধন হইতে মুক্ত হইতে হইবে ।

সেদিন ভাবিলেন, জীকে সব খুলিয়া বলেন কিন্তু সাহসে কুলাইল
না । দশটার সময় আহালাদি সারিয়া মাজিয়া গুজিয়া প্রতিদিনের মত
বাহির হইলেন কিন্তু স্কুলে গেলেন না ।

পথের মধ্যে আলুতাপোলের খালের ওপর যে পুল আছে, তাহার
নীচে ঘাসের উপর ছায়ায় গিয়া বসিয়া রহিলেন । সঙ্গে দু'খানা
অধ্যাত্ত্বের পুস্তক । একপ্রকার লুকাইয়াই রহিলেন এইজন্য যে
স্কুলের হেলেরা স্কুলে যাওয়ার পথে তাঁহাকে দেখিতে পাইবে । স্কুলে
গিয়া হেডমাস্টারের কাছে বলিয়া দিবে অথবা বাড়ীতে তাঁহার স্ত্রীর
নিকট । চুপচাপ থাকিয়া বই পড়িতে পড়িতে বিড়ি টানিতে লাগিলেন ।
বিড়ি ফুরাইয়া গেল । অনুবিধা হইতে লাগিল । বাজার স্কুলের কাছে ।
সেখানে বিড়ি কিনিতে গেলে কেউ টের পাইবে । কি করা যায় ?

রাস্তা দিয়া একটি লোক বিড়ি টানিতে টানিতে যাইতেছে । কে
লোকটা ? হরিদাসবাবু মুখ বাড়াইয়া দেখিলেন । একটা বিড়ি কি
চাহিবেন ? নাঃ, লোকটি কি মনে করিবে ।

হরিদাসবাবু ডাকিলেন—ওহে শোনো—

লোকটি রেলিং হইতে নীচের দিকে চাহিয়া বিষয়ের সুরে বলিল—
কি বাবু ?

—নেমে এসো । বাজারে যাচ্চ কি ? দু'পয়সার বিড়ি আমার জন্তে
আনবে ?

—দাঁড়ান বাবু ।

সে নামিয়া আসিল। বলিল—এখানে কি করছেন বাবু ?

—এই—এই—ইয়ে কাঠের গাড়ী আসচে কিনা। তাই বসে আছি।
কাঠ কিনবো।

লোকটা চলিয়া গেলে হরিদাসবাবুর মনে অনুতাপ হইল। ভিঃ, বিড়ির আসক্তিতে মিথ্যা কথা বলিয়া ফেলিলেন ? আর বিড়ি খাইবেন না ? বিড়ি ত্যাগ করিলেন আজ হইতে। অবশ্য এই দুই পয়সার বিড়ি খাইয়া লইবেন আজকের মত।

বেলা চারটার পর হরিদাসবাবু পুলের তলা হইতে বাহির হইয়া বাড়ী আসিলেন। দিব্যি চা খাইলেন, যেমন স্কুল হইতে ফিরিয়া প্রতি-দিন খাইয়া থাকেন।

আবার পরদিনও সেই রকম। তবে এবার পুলের তলায় নয়, মাঠের মধ্যে একটা বটগাছের তলায় বসিয়া রহিলেন। অগ্ন একটা বাঙালি বিড়ি বসিয়া বসিয়া পুড়াইলেন।

এমনি ভাবে সাত দিন কাটিয়া গেল। দশটায় বাড়ী হইতে রোজ বাহির হন, আবার ঠিক সাড়ে চারটায় বাড়ী আসিয়া পৌছান। কোনো হাজামা নাই, মুক্ত মন মুক্ত জীবন। এতাদনে তিনি আত্মাকে উপলব্ধি করিতে পারিতেছেন। কিন্তু বোধহয় ভগবান অধ্যাত্ম-সাধনার পথে বাধা সৃষ্টি করেন, সাধককে আরও উন্নত করিবার জন্ত। সেদিন বাড়ী ফিরিতেই গৃহিণী বলিলেন—আজ মাইনে হয়েছে ?

হরিদাসবাবু থতমত খাইয়া বলিলেন—মাইনে ?

--ই্যা গো, মাইনে হয় নি ?

—না।

—কেন হয় নি ? আজ তো ইংরেজী মাসের সাত তারিখ। পাঁচ তারিখে তো তোমাদের মাইনে হয়।

—আজও হয় নি।

—ইদিকে তো আর চলে না। হাজারী মেছুনি রোজ তাগাদা আরম্ভ করেছে, গায়ের মাংস খুলে খাচ্ছে। দুধওয়ালী আজ সকালেও তাগাদা দিয়েচে—তাদের বলে রেখেছি তুমি আজ মাইনে আনবে।

—তা আজ না দিলে আমি কি করবো ?

—চালও বাড়ন্ত। কাল কি হবে তার ঠিক নেই। কি খেয়ে কাল ইস্কুলে যাবে ? কাপড় একজোড়া না কিনলে এমাসে, বাড়ী থেকে আর বেরুনো যাচ্ছে না।

—না যায় বেরিও না—

এই কথায় গৃহিণী তেলেবেগুনে জ্বলিয়া উঠিয়া ধুফুমার ঝগড়া শুরু করিলেন। বড় মেয়ে আসিয়া বলিল—বাবা, আমার বই এনে দিলে না ?

—কি বই ?

—কবিতা সোপান, দ্বিতীয় ভাগ। না কিনলে বুড়ো মাস্টার রোজ বকে। তুমি কালই কিনে দাও বাবা।

—আচ্ছা, আচ্ছা, হবে। এখন যা।

গৃহিণী ও ঘর হইতে গলা চড়াইয়া বলিলেন—কাল থেকে তোর ইস্কুলে যেতে হবে না। যতদিন না বই কেনা হয়, ততদিন ইস্কুলে যাবি নে, খবরদার বলছি।

সংসার অসার তো বটেই, ঘোর অশান্তিময়। এসব তিনি গ্রাহ করেন না, স্ত্রী বাকিতেছে বকুক। নারীজাতির স্বভাবই ওই ! তাঁহার মন ব্রহ্মোপলব্ধির পন্থায় শনৈঃ শনৈঃ অগ্রসর হইয়া চলিয়াছে, এসব সাংসারিক ঝগড়া দ্বন্দ্ব অতি তুচ্ছ জিনিস, তিনি এসবের উর্ধ্বে আছেন। চিরকাল তো তোমাদের দাসত্ব করিলাম, এখন জ্ঞানচক্ষু ফুটিয়াছে, চোখ রাঙাইয়া আর সাবেক পথে ফিরাইতে পারিবে না। বাকিতেছে, বকিয়া মরুক।

মানুষ কত সহজে দেবতা হয়, তাঁহার জানা ছিল না। দেবতা কে,

না যে সংসারের মধ্যে থাকিয়াও নিলিপ্ত। গীতায় শ্রীকৃষ্ণের কথা স্মরণপথে উদ্ভিত হইল। জয় ও পরাজয়, লাভ ও ক্ষতিকে যে সমান দৃষ্টিতে দেখিতে পারে সে-ই তো অধ্যাত্ম-রাজ্যের একজন বড় গাঁতিদার বা তালুকদার। তিনি আজ সম্পূর্ণ নিলিপ্ত আছেন। কিসের বলে? ব্রহ্মোপলব্ধির বলে। আত্ম-সাক্ষাৎকার লাভের বলে। অতএব তিনি জীবমুক্ত। তিনি দেবতা।

পরদিনের প্রভাতটি যেন তাঁহার কাছে তাঁহার নবজীবনের প্রভাতের মত ঠেকিল।

কি সুন্দর শরতের ঝলমলে আলো গাছে-পাতায়। কি সুন্দর বিহঙ্গকাকলী। এসব যেন নতুন চোখে আজ দেখিতেছেন। কিন্তু এ দৃষ্টি, কবির দৃষ্টি, আত্মতত্ত্বজ্ঞ জ্ঞানীর দৃষ্টি নয়। হরিদাসবাবু যে সে কথা বুঝিলেন না তা নয়, তবু ভাল লাগিল এই শরতের আলো, সবুজ গাছপালা, নীল আকাশ।

কবির দৃষ্টি তাই কি, কবি কি জ্ঞানী নয়?

সবে আসিয়া বাইরের ঘরে বসিয়াছেন, এমন সময় হাজারী মেছুনি আসিয়া বলিল—বাবা ঠাকুর উঠেচেন? ছ’দিন আমি আপনার দেখাই পাই নে। পেলাম হই। ইয়ে গিয়ে আমার ও-মাসের সেই চিংড়ি মাছের দরুণ সাতসিকে পয়সা বাকি। আজ না দিলি চলবে না। মহাজনের টাকা বাকি, আজ তাদের দৈনা শোধ দিতি হবে।

হরিদাসবাবু বলিলেন—আচ্ছা এখন যা—বেলা হলে আসবি।

—কত বেলা হ’লি?

—আঃ, বিরক্ত করলে! এই বেলা ন’টা দশটা।

—বাবা ঠাকুর, আপনি ব্যাজার হবেন না, ব্যাজার হ’লি চলে? আমরা হচ্ছি গরীব লোক। আপনার দোর থেকে নিয়ে গিয়ে তবে খাব। একটু বেলা হ’লি আসবো এখন, দামটা চুকিয়ে দেবেন এখন।

মেছুনী চলিয়া গেল।

হরিদাসবাবু সকাল দশটার আগেই ভাতে ভাত খাইয়া গিয়া পুলের তলায় বসিলেন। মুশ্কিল এই যে, বিড়ি ফুরাইয়াছে। নগদ পয়সার অভাব। যে কয়টি খুচরা আনি ছয়ানি পকেটে ছিল, জ্বীকে দিয়া আসিতে হইয়াছে।

যাক গে। আশাতে আসক্তির বন্ধন। সর্ব-বন্ধন-মুক্ত না তিনি। তিনি না অজব, অমর আত্মা? বিড়ি না টানিলে কি হয়? বিড়ি ছাড়িয়া দিলেন। অনেকক্ষণ বসিয়া গীতার ভাষ্য পড়িলেন। কৃষ্ণানন্দ শ্রামীর এই ভাষ্যখানি সম্প্রতি পাড়ার রামতারণ মুখ্যের কাছে চাহিয়া লইয়াছেন। বুড়ো রামতারণ ঘুঘু লোক, সুদখোর মহাজন, গীতার মহিমা সে এক বুঝবে? টাকার আশুপল, একটা পয়সার সদ্ব্যয় নাই। গীতা অত সহজ জিনিস নয়।

আর একদিন এভাবে কাটিল।

তাগাদার চোটে পথে যাতে বাহির হওয়ার জো নাই। বাড়িতেও তিষ্ঠিবার জো নাই। গত মাসের মাহিনা দিবার সময় উত্তীর্ণ হইয়াছে স্কুলের, হরিদাসবাবু হিসাব করিয়া দেখিলেন, আজ ইংরাজি মাসের এগারো তারিখ। চার তারিখে মাহিনা হওয়ার দিন। এদিকে আর চলে না। একরাশ দেনা, দুধওয়ালী দুধ বন্ধ করিবে কাল হইতে।

বাড়িতে গৃহিণী বলিলেন—হ্যাঁগা, আর তো চলে না। এবার কি তোমাদের মাইনে হবে না? এত দেরি করচে কেন এবার? আজ ইস্কুলে গিয়ে ভালো ক'রে বলো পোড়ারমুখো হেডমাস্টারকে।

তেরোদন অনুপস্থিতির পর হরিদাসবাবু আজ স্কুলে গিয়া গুট গুট হাজির হইলেন।

তখনও ঘণ্টা পড়ে নাই। হরিদাসবাবুর পা কাঁপিতেছে। জিভ শুকাইয়া গিয়াছে। এতদিন কামাই করিবার কি কৈফিয়ৎ দিবেন। বড় কড়া হেডমাস্টার।

হেডমাস্টারের অফিসে কম্পিত পদে ছুরু-ছুরু বক্ষে ঢুকিতেই হেড-

মাস্টার মুখ তুলিয়া চাহিয়া নীরস স্বরে জিজ্ঞাসা করিলেন—এতদিন কি হয়েছিল আপনার ?

ব্রহ্মজ্ঞানী মুক্তপুরুষ হরিদাস সে চশমা-পরা চোখজোড়ার তীব্র দৃষ্টির সম্মুখে আত্মজ্ঞান ও আত্মবিশ্বাস হারাইয়া মিথ্যা কথা বলিয়া ফেলিলেন ।

বলিলেন—শ্রম, ইয়ে—বাড়ীতে বড় অসুখ । তলপেটে যন্ত্রণা । তাই নিয়ে আজ এ ক’টা দিন যে কি ভাবে কেটেচে । তার ওপর রাত জেগে নার্স করতে হচ্ছে । আর তো দ্বিতীয় লোক নেই বাড়ীতে । কি কষ্টে যে যাচ্ছে শ্রম । একে পয়সার অভাব, ডাক্তারে-ওষুধেই বিশ পঁচিশ টাকা ব্যয় হয়ে গেল—বড় বিপদে পড়ে গিয়েচি শ্রম—

হেডমাস্টার বলিলেন—বুঝলাম । আপনার একটা খবর দিতে কি হয়েছে ? অসুখ-বিসুখ হতে পারে, সেটা আশ্চর্য নয়—বাট ইউ অট টু হ্যাভ ইনফর্মড্ মি—স্কুলের ইন্টারেস্ট সাফার করচে, এ জ্ঞান আপনার থাকা উচিত ছিল । আপনি না পুরনো টিচার ? না, এরকম হ’লে হরিদাসবাবু, আই অ্যাম সার টু টেল ইউ, আমাকে সেক্রেটারিঃ কাছে রিপোর্ট করতে বাধ্য হ’তে হবে আপনার নামে—

এবারটা শ্রম এক্সকিউজ করুন দয়্য ক’রে । আমার মাথার একদম ঠিক ছিল না এ ক’দিন, সে কি কষ্ট আর যন্ত্রণা রাত্রে, যদি দেখতেন শ্রম তবে আপনারও কষ্ট হোত—এগারো দিন রাত্রে ঘুমুই নি, ঠায় শিয়রে জেগে বসে আছি শ্রম—চোখে দেখা যায় না সে যন্ত্রণা—

হরিদাসবাবু কঁাদো-কঁাদো হইলেন ।

পার্থক্য



সকাল হইতে ভিথিরীর উপদ্রব লাগিয়াই আছে ।

এদিকে ঘরে চাউল নাই, ক্রমশই কমিয়া আসিতেছে । গৃহিণী জানাইলেন চাউল যা আছে তাহাতে আর দিন চারেক চলিবে । বাজারে চাউল নাই একথা বলিলে ভুল হইবে, আছে চোরাবাজারে, সাইত্রিশ টাকা মন ।

গৃহিণীকে শুনাইয়া বলি—ভাতের ফ্যানে যা কিছু সার অংশ থাকে । ফ্যান যে ফেলে দেওয়া হয় ওতে সত্যিই আমাদের বডড... মানে যা কিছু পুষ্টিকর ওর সঙ্গে বোরিয়ে যায় । সাহেবরা ফ্যান ফেলে না, জাপানীরা ফেলে না ।

আমার ইজিত বাড়ীর কেহই বুঝিল না । ঝরঝরে ভাতই খাইতে লাগিলাম ।

শুনিলাম আর দু'দিন চলিবে । তার উপর ভিথিরী । সকাল হইতেই শোন—মা ছুটি চাল দেন, মা একটু ফ্যান—

মনে সহানুভূতি জাগায় না, রাগ ধরে । ঘরে নাই চাউল, কেবল ভিক্ষা দাও ভিক্ষা দাও, সকাল হইতে । হিসাব করা চাউল আজকাল । এদিকে বাজারে ওদ্রব্য প্রায় অমিল । সাইত্রিশ টাকা করে চাউল

কিনিয়া কতদিন চলাইব। কায়ক্লেশে যদি বা চলে, ভিথিরীর উপদ্রবে আর তো পারি না! অথচ ভিক্ষা মিলিবে না বলিতে পারি না, সংস্কারে বাধে।

বাল্যে পল্লীগ্রামের বাড়ীতে দেখিতাম, মুষ্টিভিক্ষা হইতে ফকির বৈষ্ণবকে কেহ কখনো বাঞ্ছিত করিত না। সেই হইতে কেমন একটা সংস্কার দাঁড়াইয়া গিয়াছে—ভিক্ষা না দিয়া পারি না।

কিন্তু আসিলে বিরক্ত হই। না আসিলেই যেন ভালো।

সকালে ছোট ঘরে বসিয়া লিখিতেছি চাকর বাজার হইতে বাড়ী ঢুকিল হাতে মাঝারি গোছের একটি পুটুলি! বাড়ীর ভিতর হইতে মেয়েরা কি চাউল আনিতে পাঠাইয়াছিল? ভাঁড়ার খালি? বলিলাম—ওতে কি রে?

রাজেন চাকরটি জিনিসটা লুকাইয়া লইয়া যাইতে চাহিয়াছিল, ভাবে বুঝলাম। ধরা পড়িয়া একটু অপ্রতিভ হইল। মাথা চুলকাইতে চুলকাইতে বলিল—চাল আছে।

—ও, কত?

—ছ'সের করে চাল আছে জহুরীর দোকানে। কন্ট্রোল—

—ও, কন্ট্রোলের দোকান তাহোলে এখানেও হ'ল? কত দিচ্ছে?

—ছ' টাকার বেশি দেবে না আছে।

এটা বাঙলা নয়, বিহার। তবুও এখানে কন্ট্রোল খুলিল, ছ' টাকার বেশি চাউল কাহাকেও দেওয়া হইবে না—এ সব কি?

একজন ভিথিরী আসিয়া হাঁকিল—ভিক্ষে দেন মা চাউল ভিক্ষে—

রাজেন বলিল—ভিক্ষে হবে না যাও, চাল নেই—

লিখিতে লিখিতে বলিলাম—দে এক মুঠো দে—

সঙ্গে সঙ্গে আসিল আর একজন। তাকেও ভিক্ষা দেওয়া হইল।

বেলা ন'টা আন্দাজ সময়ে আরও দুইজন। ভিক্ষা লইয়া তাহারাও

বিভূতিভূষণ : সরস গল্প

চলিয়া গেল। এইবার একজন বৃদ্ধের কণ্ঠস্বর শোনা গেল। মনে তখন বিরক্তি ধরিয়াকে, রাজেনকে বলিলাম, ভিক্ষা না দেয়। কিন্তু তবুও লোকটা কেন দেরি করিতে লাগিল, কেন তবুও যায় না, বার বার একঘেয়ে চীৎকার করিতে লাগিল। বড়ই রাগ হইল। বাহির হইয়া বলিলাম—ভিক্ষে হবে না, চলে যাও—আবার কি ?

লোকটি বৃদ্ধ। পরনে একটুকরা মলিন নেকড়া, হাতে তোবড়ানো টিনের মগ। জীর্ণ শীর্ণ চেহারা বটে, তবে বাংলাদেশের ভিখারির মত কঙ্কালসার নয়।

লোকটা মগটা তুলিয়া টানিয়া টানিয়া বলিল—একটু ফ্যান দাও বাবা—বড্ড খিদে পেয়েচে—

রাগিয়া বলিলাম—কি আদার রে। আবার ভাতের ফ্যান—

—দেন বাবা একটুখানি—

—ভাগ এখান থেকে! যাঃ—আদার ছাখো—কোন সকালে রান্না হয়েছে, এখন ফ্যান রয়েছে ওর জন্তে।

লোকটা হতাশভাবে চলিয়া গেল, আবার লিখিতে বসিলাম। ইহাতে আমার সংস্কারে বাধিল না। প্রতিদিনের বরাদ্দ মৃত্যু মুষ্টি-ভিক্ষা তো দিয়াছি। ক'জনকে দেওয়া যায়? বেলা বাড়িল, স্নান করিতে যাইব। এমন সময় একটি প্রৌঢ় ব্যক্তি গায়ে অর্ধমালন পিরান, পায়ে চটি জুতা, হাতে এক গাছা বাঁশের লাঠি, জানালার কাছে দাঁড়াইয়া বলিল—বাবু, আপনারা ব্রাহ্মণ ?

মুখ তুলিয়া তারের বেড়ার ওপারে চাহিয়া বলিলাম—কেন, কি চাই ?

লোকটা হাত তুলিয়া নমস্কার করিয়া বলিল—ব্রাহ্মণেভ্যা নমো—

প্রতি-নমস্কার করিয়া বলিলাম—কোথেকে আসা হচ্ছে ?

—বাবু, ঢুকবো বাড়ীর ভেতর ? আমিও ব্রাহ্মণ।

—হ্যাঁ আমুন।

লোকটা বাড়ীতে ঢুকিল বটে, কিন্তু বারান্দায় না উঠিয়া উঠানেই দাঁড়াইয়া বলিল—একটা কথা আছে। অনেক খুঁজেচি, ব্রাহ্মণ বাড়ী পাই-ই নি। আমার বাড়ী নদেশান্ত্রপুর—মুসাবনীতে আমার এক আত্মীয় কাজ করে, সেখানেই যাচ্ছ। সঙ্গে একটা ছোট ছেলে আছে, ওই আমতলায় বসিয়ে রেখে এসেছি। একটু খাবার জল যদি আমাদের দেন।

—হ্যাঁ হ্যাঁ—তার আর বেশী কথা কি—বিলক্ষণ। ডেকে আমুন। ছেলেটিও আসিল। দেখিয়া বুঝিলাম ইহারাও দুর্দশাগ্রস্ত ভিক্ষুক। মুখে খাত চাহিতে পারিতেছেন না। বলিলাম—আপনাদের খাওয়া হয়নি তো, এত বেলায় কোথায় যাবেন—এখানেই ছোটো ডাল ভাত—

—না না, একটু জল খেয়েই যাবো। আপনাকে আর কেন বিরক্ত... মুসাবনীতে আমার ভাইপো—

সে কি হয়! বসুন বসুন—মুসাবনী এখান থেকে ছ'মাইল পথ।

না খাওয়াইয়া ছাড়িলাম না। দু'জনে খাইয়া দাইয়া বিশ্রাম করিয়া বিকালের দিকে চলিয়া গেল।

রাত্রে শুইবার সময় হঠাৎ মনে পড়িল—এ কেমন হইল? ভাতের ক্যান চাহিতে ভিখিরীর উপর রাগিয়া উঠিলাম, অথচ নদেশান্ত্রপুরের ব্রাহ্মণ শুনিয়া আদর করিয়া দু'জনকে খাওয়াইলাম, এখন তো চাউল বাঁচাইবার কথা মনে উঠিল না?

কেন এমন হয়?

ভাবিয়া দেখিলাম—ইহার কারণ সে ভিখিরী আমার শ্রেণীর মানুষ নয়। নিজেকে আমি ভিখিরীরূপে কল্পনা করিতে পারি না, কিন্তু মনে মনে নিজেকে নদীয়াবাসী দরিদ্র-ব্রাহ্মণরূপে অনায়াসে কল্পনা করিতে পারি।

আইনস্টাইন ও ইন্দুবালা



আইনস্টাইন কেন যে দার্জিলিং যাইতে যাইতে রানাঘাটে নামিয়া-
ছিলেন বা সেখানে স্থানীয় মিউনিসিপ্যাল হলে “On……ইত্যাদি
ইত্যাদি” সম্বন্ধে বক্তৃতা করিতে উৎসুক হইয়াছিলেন...একথা বলিতে
পারিব না। আমি ঠিক সেই সময়ে উপস্থিত ছিলাম না। কাজেই
প্রত্যক্ষদর্শীর বিবরণ আমি আপনাদের নিকট সরবরাহ করিতে অপারগ,
তবে আমি যেকপ অপবের নিকট হইতে শুনিয়াছি সেকপ বলিতে
পারি।

আসল কথা, নাৎসী জার্মানী হইতে নির্বাসিত হওয়ার পর হইতে
বোধ হয় আইনস্টাইনের কিছু অর্থাভাব ঘটিয়াছিল, বক্তৃতা দিয়া কিছু
অর্থ উপার্জন করার উদ্দেশ্যেই তাঁর ভারতবর্ষে আগমন। বিভিন্ন স্থানে
বক্তৃতা দিয়া বেড়াইতেছিলেনও একথা সকলেই জানেন, আমি নূতন
করিয়া তাহা বলিব না।

কৃষ্ণনগর কলেজের তদানীন্তন গণিতের অধ্যাপক রায়বাহাদুর
নীলাশ্বর চট্টোপাধ্যায় একজন উপযুক্ত লোক ছিলেন। সেনেট হলে
আইনস্টাইনের অদ্ভুত বক্তৃতা “On the Unity & Universality
of Forces” শুনিয়া অত্র পাঁচজন চিন্তাশীল ব্যক্তিদিগের মত তিনিও
অভিভূত হইয়া পড়িয়াছিলেন। তাঁহার কলেজে আইনস্টাইনকে
আনাইয়া একদিন বক্তৃতা দেওয়াইবার খুব ইচ্ছা ছিল, কিন্তু প্রিন্সিপাল

আপত্তি উত্থাপন করিলেন ।

তিনি বলিলেন—“না রায় বাহাদুর, আমার অণ্ড কোন আপত্তি নেই, কিন্তু এমন দিনে একজন জার্মান—”

রায় বাহাদুর উত্তেজিত হইয়া বলিলেন (যেমন ধরনের উত্তেজিত হইয়া তিনি উঠিতেন সন্ধ্যায় রামমোহন উকিলের বৈঠকখানায় ভাগবত পাঠের সময়, অণ্ড কেহ যদি কোন বিরুদ্ধ তর্ক উত্থাপন করিত)—
“সে কি মহাশয় ! জার্মান কি ? জার্মান ? আইনস্টাইন জার্মান ?
ওঁদের মত মহামানবের, ওঁদের মত ঋষি বৈজ্ঞানিকের দেশ আছে ?
জাতের গণ্ডি আছে ? আমি বলি—”

প্রিন্সিপাল বললেন—“আমিও বলছি নে যে তা আছে । কিন্তু
বর্তমানে যেমন অবস্থা”—তুই প্রবীণ অব্যাপকে ঘোর তর্ক বাধিয়া
গেল ।

প্রিন্সিপাল দর্শন শাস্ত্রে পাণ্ডিত্য, তিনি মধ্যযুগের স্কলাস্টিক দর্শনের
প্রধান আচার্য জন স্কোটারের উদাহরণ দেখাইলেন । আয়র্লণ্ডে জন্ম-
গ্রহণ করিয়াও নবম শতাব্দীর গোঁড়াদিগের দ্বারা উৎপীড়িত হইয়া ফ্রান্সে
তিনি আশ্রয় গ্রহণ করিতে বাধ্য হন । আয়র্লণ্ডে আর ফিরিতে পারিয়া-
ছিলেন কি ? আসল মানুষটাকে কে দেখে ! তাঁর মতামতেরই মূল্য
দেয় লোকে ।

যাহা হউক, শেষ পর্যন্ত প্রিন্সিপাল রাজি হইলেন না তখন রায়
বাহাদুরকে বাধ্য হইয়া নিরস্ত হইতে হইল । ইতিমধ্যে তাঁহার কানে
গেল আইনস্টাইন শীঘ্রই দার্জিলিং যাইবেন । ভারতবর্ষে আসিয়া অবধি
নানাস্থানে বক্তৃতা দিতে ব্যস্ত থাকার দরুন তিনি হিমালয় দেখিতে
পারেন নাই । এইবার এত কাজে আসিয়া আর দার্জিলিং না দেখিয়া
ছাড়িতেছেন না ।

রায় বাহাদুর ভাবিলেন দার্জিলিংয়ের পথে রানাঘাটে নামিয়া লইয়া
সেখানে এক সভায় আইনস্টাইনকে দিয়া বক্তৃতা দেওয়াইলে কেমন হয় ?

বিভূতিভূষণ : সন্ন্যাস গল্প

রায় বাহাদুর গ্র্যাণ্ড হোটেলে আইনস্টাইনের সঙ্গে দেখা করিলেন।

আইনস্টাইন বলিলেন, “ভারতবর্ষের দর্শনের কথা আমায় কিছু বলুন।”

রায় বাহাদুর প্রমাদ গণিলেন। তিনি গণিতের অধ্যাপক; দর্শন, বিশেষত ভারতীয় দর্শনের কোন খবর রাখেন না, তবুও ভাগ্যে গীতা মাঝে মাঝে পড়া অভ্যাস ছিল; সুতরাং অকাল সমুদ্রে গীতারূপ ভেলা (কোন আধ্যাত্মিক অর্থে নয়) অবলম্বন করিয়া দু-এক কথা বালবার চেষ্টা করিলেন। ‘বাসাংস জীর্ণানি’ ইত্যাদি।

আইনস্টাইন বলিলেন, “ম্যাক্সমূলারের বেদান্তদর্শনের উপর প্রবন্ধ পড়ে এক সময়ে সংস্কৃত শেখার বড় ইচ্ছে হয়। দর্শনে আমি স্পিনোজার মানসশিষ্য। স্পিনোজার দর্শন গণিতের ফলে ক্রমানুসারে সাজানো। স্পিনোজার মন গণিতজ্ঞ অষ্টার মন, সেজ্ঞা আমি ওঁর দিকে আকৃষ্ট হয়ে পড়ি। কিন্তু বেদান্ত সম্বন্ধে ম্যাক্সমূলারের প্রবন্ধ পড়ে আমি নতুন এক রাজ্যের সন্ধান পেলাম। ইউক্লিডের মত খাঁটি বস্তুতাত্ত্বিক মন স্পিনোজার, সেখানে কূটতর্কও বাঁধা পথে চলে। আমি কিন্তু ভেতরে ভেতরে কল্পনাবিলাসী—”

রায় বাহাদুর অবাক হইয়া আইনস্টাইনের মুখের দিকে চাহিয়া বলিলেন, “আপনি?”

আইনস্টাইন মৃদু হাসিয়া বলিলেন, “কেন, আমার কালের সঙ্গে ক্ষেত্রের একত্র মিলনকে আপনি কল্পনার ছাঁচে ঢালাই করা বিবেচনা করেন না নাকি?”

রায় বাহাদুর আরও অবাক। আমতা আমতা করিয়া বলিলেন, “নতুন ডাইমেনশানের সন্ধানদাতা আপনি, নিউটনের পর নববিশ্বের আবিষ্কারক আপনি—আপনাকে কল্পনাবিলাসী বলতে—”

কিন্তু সঙ্গে সঙ্গে বর্তমান যুগের এই শ্রেষ্ঠতম বিজ্ঞানীর কবিসুলভ

দীর্ঘ কেশ ও স্বপ্নভরা অপূর্ব চোখের দিকে চাহিয়া রায় বাহাদুরের মুখের কথা মুখেই রহিয়া গেল। কল্পনা প্রথর না হইলে হয়তো বড় বৈজ্ঞানিক হওয়া যায় না, রায় বাহাদুর ভাবিলেন। কি একটা বলিতে যাইতেছিলেন, আইনস্টাইন পাশের ছোট টেবিল হইতে চুরুটের বাস্কেল আনিয়া রায় বাহাদুরের সম্মুখে স্থাপন করিলেন। নিজের হাতে একটি মোটা চুরুট বাহির করিয়া ছুরি দিয়া ডগা কাটিয়া রায় বাহাদুরের হাতে দিলেন। রায় বাহাদুরের বাঙালী মন সংকুচিত হইয়া উঠিল। অত বড় বৈজ্ঞানিকের সামনে সিগার ধরাইবেন তিনি, জর্নৈক হেঁজিপেঁজি অঙ্কের মাস্টার? তাছাড়া সাহেবও তো বটে, সেটাও দেখিতে হইবে তো। সাহেব জাত কাঁচাথেগো দেবতার জাত। রায় বাহাদুর একটা সিগার তুলিয়া বলিলেন—“আপনি?”

—“ধন্যবাদ। আমি ধূমপান করি নে।”

—“ও!”

—“কি, বলুন।”

—“রানাঘাটে সভা করলে কেমন লোক হবে আপনার মনে হয়? কেমন জায়গা রানাঘাট?”

—“জায়গা ভালই। লোকও হবে।”

—“কিছু টাকা এখন দরকার। যা ছিল জার্মানিতে রেখে এসেছি। ব্যাঙ্কের টাকা এক মার্কও তুলতে দিলে না, একরকম সর্বস্বান্ত।”

—“আমি রানাঘাটে বিশেষ চেষ্টা করছি, সার।”

—“ওখানে বড় হল পাওয়া যাবে কি?”

—“তেমন নেই। তবে মিউনিসিপ্যাল হল আছে, মন্দ নয়, কাজ চলে যাবে।” রায় বাহাদুর কিছুক্ষণ পরে বিদায় লইতে চাহিলেন, ভাবিলেন এত বড় লোকের সময়ের ওপর অত্যাচার করিবার দরকার নাই।

আইনস্টাইন বলিলেন—“আমার কিছু ছাপা কাগজ ও বিজ্ঞাপন

বিভূতিভূষণ : সরস গল্প

নিয়ে যান। যে বিষয়ে বক্তৃতা হবে, সে আপনাকে পরে জানাব, টিকিটের দাম কত করব ?”

—“খুব বেশি নয়—এই ধরুন—”

—“তিন মার্ক—দশ শিলিং ?”

—“আজ্ঞে না সার। সর্বনাশ ! এ সব গরিব দেশ। দশ শিলিং আজকাল দশ টাকার কাছাকাছি পড়বে। ও-দামে টিকিট কেনবার লোক নেই এদেশে, সার।”

—“পাঁচ শিলিং ?”

—“আচ্ছা, তাই করুন। ছাত্রদের জন্য এক শিলিং।”

আইনস্টাইন হাসিয়া বলিলেন, “ইউনিভার্সিটির ছাত্রদের টিকিট কিনতে হবে না। আমি নিজেও স্কুল-মাস্টার। আমার ওপর তাদের দাবি আছে। বসে ও বেনারস হিন্দু ইউনিভার্সিটিতেও তাই হয়েছিল। ছাত্রদের টিকিট কিনতে হবে না। এই নিয়ে যান ছাপা হ্যাণ্ডবিল ও কাগজপত্র—

রায় বাহাদুর হ্যাণ্ডবিল হাতে পাইয়া পড়িয়া দেখিতে গিয়া বিষণ্ণ-মুখে বলিলেন—“এ কি সার ? এ যে ফরাসী ভাষায় লেখা !”

—“ফরাসী ভাষায় তো বটেই। প্যারিসে বক্তৃতা দেওয়ার সময় ছাপিয়েছিলাম। কেন ফরাসী ভাষা বুঝবে না কেউ। আমি তো সেদিন শুনলাম এখানে ইউনিভার্সিটিতে পড়ানো হয় ?”

—“আজ্ঞে না। সে হয়তো এক-আধজন বুঝতে পারে। সেভাবে ফরাসী ভাষা পড়ানো হয় না। এখানে ইংরিজিটাই চলে। কেউ বুঝবে না সার।”

—“তাই তো ! আপনি ইংরিজিতে অনুবাদ করে নিয়ে ওখানে কোনও প্রেসে ছাপিয়ে নেবেন দয়া করে ?”

—“তা—ইয়ে—তা—আচ্ছা সার।”

রায় বাহাদুর মনে মনে ভাবিলেন—এখান থেকে বালিগঞ্জে গিয়ে

বিনোদের শরণাপন্ন হইগে। ছোকরা ভাল ফ্রেঞ্চ জানে। কাঁহাতক আর একজন এত বড় লোকের সামনে ‘জানি নে মশাই’ বলা যায় !

বিনোদ চৌধুরী তাঁর বড় শালা। পণ্ডিত লোক। অনেক রকম ভাষা তার জানা আছে। সে উৎসাহের সঙ্গে হ্যাণ্ডবিলগুলির বাংলা ও ইংরিজি অনুবাদ করিয়া দিয়া বলিল,—“চাটুয্যে মশায়, আমি রানাঘাট যাব সেদিন। আমার থিওরি অব রিলেটিভিটির সঙ্গে পার্চয় অবিশ্বি লিগুনে বুলটনের পপুলার বই থেকে। তবুও আইনস্টাইনকে আমি এ যুগের ঋষি বলে মানি। সত্যকার দ্রষ্টা ঋষি। সত্যকে যারা আবিষ্কার করেন, তাঁরাই মন্ত্রদ্রষ্টা ঋষি। লম্বা লম্বা মার্কা ইকোয়েশন বুঝতে না পারি, কষতে না পারি, কিন্তু কে কি দরের সেটুকু—।”

রায় বাহাদুর দেখিলেন চতুর শ্যালকটি ঠেস দিয়া কথা বলিতেছে। হাসিতে হাসিতে বলিলেন,—“অর্থাৎ সেই সঙ্গে আমার দরটাও বুঝি ঠিক করে ফেললে বিনোদবাবু? বেশ, বেশ।”

—“রামো! চাটুয্যে মশায়, ছি, ছি, তেমন কথা কি আমি বলি?”

—“বল না?”

—“স্পেস—টাইম—কনটিনিউয়ামের মোহজালে পড়ে কোন্টা কখন কি অবস্থায় বলেছি, তা কি সব সময় হলফ নিয়ে বলা যায় চাটুয্যে মশায়? এবেলা থেকে যাবেন না?”

—“না না আমার থাকবার জো নেই। অনেক কাজ বাকি। যাতে ছ’পয়সা হয় ভদ্রলোকের, সে ভার আমার ওপর। দেখি মিউনিসিপ্যালিটির চেয়ারম্যান, ভাইস-চেয়ারম্যানদের একটু ধরাধরি করিগে। যুঁযু সব। হলটা যদি পাওয়া যায়—

—“কি বলেন আপনি চাটুয্যে মশায়! আইনস্টাইনের নাম শুনে হল না দিয়ে কেউ পারবে? আহা, শুনেও কষ্ট হয়, অত বড় বৈজ্ঞানিককে আজ এ বুদ্ধ বয়সে পয়সার জন্তে বক্তৃতা করে অর্থ সংগ্রহ করতে হচ্ছে—দি ওয়ার্ল্ড ডাজ নট নো ইট্‌স গ্রেটস্ট—”

—“তুমি এখনও ছেলেমানুষ বিনোদ । ঐ যা শেষকালে বললে ঐ কথাটাই ঠিক । অনেক ধরাধরি করতে হবে । পাঁচটা চল্লিশের ট্রেনেই যাই ।”

ইহার পরের কয়েকদিন রায় বাহাদুর অত্যন্ত ব্যস্ত রহিলেন । রানাঘাট মিউনিসিপ্যালিটির চেয়ারম্যান, ভাইস-চেয়ারম্যান, স্কুলের হেডমাস্টার, উকিল, মোক্তার, সরকারী কর্মচারী ও ব্যবসাদারগণের সঙ্গে দেখা করিয়া সব বলিলেন । আশ্চর্যের বিষয় লক্ষ্য করিলেন, সকলেরই যথেষ্ট উৎসাহ, সকলেরই যথেষ্ট আনন্দ । যেন সবাই আকাশের চাঁদ হাতে পাইতে চলিয়াছে ।

বুদ্ধ মোক্তার অভয়বাবু বলিলেন,—কি নামটি বললেন মশাই সাহেবের ? আ—কি ? আ—ইন্ স্টাই—ন্ ? বেশ বেশ । হাঁ, বিখ্যাত নাম । সবাই জানে । সবাই চেনে । ওঁরা হলেন গিয়ে স্বনামধন্য পুরুষ—নাম শোনা আছে বইকি ।”

রায় বাহাদুর রাগে ফুলিয়া মনে মনে বলিলেন—তোমাদের মুণ্ড শোনা আছে, ড্যাম ওল্ড ইডিয়ট ! এ তুমি কাপুড়ে মহাজন শ্রামচাঁদ পালকে পেয়েছ ? স্বনামধন্য ! তিন জন্ম কেটে গেলে যদি এ নাম তোর কানে পৌঁছয় । মিথ্যে সাক্ষী শিথিয়ে তো জন্ম খতম করলি, এখন আইনস্টাইনকে বলতে এসেছে স্বনামধন্য পুরুষ ! ইডিয়সির একটা সীমা থাকা চাই ।

নির্দিষ্ট দিনে রায় বাহাদুর কৃষ্ণনগর কলেজের কয়েকটি ছাত্র সঙ্গে লইয়া সকালের ট্রেনে রানাঘাটে নামিলেন । তাঁর শালা বিনোদ চৌধুরী ছুঁত করিয়া চিঠি লিখিয়াছে, বিশেষ কার্যবশত তাহার আসা সম্ভব হইল না, আইনস্টাইনের বক্তৃতা শোনা কি সকলের ভাগ্যে ঘটে, ইত্যাদি । সেজ্ঞায় রায় বাহাদুরের মনে ছুঁত ছিল, ছোকরা সত্যিকার পণ্ডিত লোক, আজকার এমন সভায় বেচারীর আসিবার সুযোগ মিলিল

না। ভাগ্যই বটে।

রানাঘাট স্টেশনের বাহিরে আসিয়া সম্মুখের প্রাচীরে নজরপড়িতে রায় বাহাদুর থমকিয়া দাঁড়াইয়া গেলেন। এ কি ব্যাপার! প্রাচীরের গায়ে লাটকানো টাউস এক ছ-তিন-রঙা বিজ্ঞাপন। তাতে লেখা আছে—

বাণী সিনেমা গৃহে (নীল)

আসিতেছেন! আসিতেছেন!! (কালো)

আসিতেছেন!!! (কালো)

কে?? (কালো)

কবে?? (কালো)

সুপ্রসিদ্ধ চিত্রতারকা ইন্দুবালা দেবী (লাল)

অথ রবিবার ২৭শে কাতিক সন্ধ্যা ৫।০ টায় (নীল)

জনসাধারণকে অভিবাদন করিবেন!! (কালো)

প্রবেশমূল্য ৫, ৩, ২, ও ১ টাকা (কালো)

মহিলাদের ৫ ও ২ টাকা (কালো)

এমন সুযোগ কেহ হেলায় হারাইবেন না। (লাল)

কি সর্বনাশ!

রায় বাহাদুর রুমাল বাহির করিয়া কার্তিক মাসের শেষের দিকের সকালেও কপালের ঘাম মুছিলেন। তাহার পর একবার ভাল করিয়া পড়িলেন তারিখটা। না, আজই। আজ রবিবার ২৭শে কার্তিক।

অগমনস্বভাবে কিছুদূর অগ্রসর হইয়া দেখিলেন আর একখানা বিজ্ঞাপন। ক্রমে যতই যান, সর্বত্রই সেই তিনরঙা বিজ্ঞাপন। মিউ-নিসিপ্যালিটির ভাইস-চেয়ারম্যান মহাশয়ের বাড়ী পর্যন্ত যাইতে অন্তত ছত্রিশখানা সেই বিজ্ঞাপন আঁটা দেখিলেন বিভিন্ন স্থানে।

ভাইস-চেয়ারম্যান শ্রীগোপালবাবু ফুলবাগানের সামনে ছোট বারান্দায় বসিয়া তেলধুতি পরনে তেল মাখিতেছিলেন। রায় বাহাদুরকে

বিভূতিভূষণ : সরস গল্প

দেখিয়া ভাল হইয়া বসিলেন। হাসিয়া বলিলেন—“খুব সৌভাগ্য দেখছি। এত সকালে যে ?—নমস্কার !”

—“নমস্কার, নমস্কার ! চানের জন্ম তৈরী হচ্ছেন ! ছুটির দিনে এত সকাল যে ?”

—“আজ্ঞে হ্যাঁ, চানটা সকালেই করি।”

—“বাড়ীতে ?”

—“আজ্ঞে না, চূণাতে যাই। ডুব দিয়ে চান না করলে—অভ্যাস সেই ছেলেবেলা থেকেই। বসুন, বসুন। আজ যখন এসেছেন তখন ছপুরে গরীবের বাড়ীতেই ছোটো ডাল-ভাত—”

—“সেজ্ঞে কিছু না। নো ফরম্যাটি। আমার মাসতুতো ভাই নীরেনের ওখানে না গেলে রাগ করবে। সেবার তো যাওয়াই হোল না।”

—“তাহলে চা চলবে তো ?”

—“তাতে আপত্তি নেই সে হবে এখন। আসল যে জ্ঞে আসা— তা এ এক কি হাঙ্গামা দেখছি। কে ইন্দুবালা দেবী আসছে বাণী সিনেমাতে আজই—”

—“হ্যাঁ, তাই তো দেখছিলাম বটে।”

—“দিন বুঝি আজই ?”

—“তাই তো—আমিও তাই ভাবছিলাম। ক্ল্যাশ করবে কিনা ?”

—“এখন তো আমরা দিন বদলাতে পারি না। সব ঠিকঠাক। আমাদেরও হ্যাণ্ডবল বিলি, বিজ্ঞাপন বিলি, সব হয়ে গিয়েছে। আইন-স্টাইন আসবেন এই দার্জিলিং মেলে।”

—“আমিও তো ভেবেছি। তাই তো—”

—“তবে আমার কি মনে হয় জানেন। যারা সিনেমাতে ইন্দু-বালাকে দেখতে যাবে, তারা সাহেবদের লেকচার শুনতে আসবে না। সাহেবদের সভায় যারা আসবে, তারা ঠিকই আসবে।”

আইনস্টাইনকে ‘সাহেব’ বলিয়া উল্লেখ করাতে রায় বাহাদুর মনে

মনে চটিয়া গেলেন। এমন জায়গাতেও তিনি আনিতে চলিয়াছেন বিশ্বের শ্রেষ্ঠতম বৈজ্ঞানিক আইনস্টাইনকে। এ কি পাটকলের ম্যানেজার, না রেলের টি. আই., যে ‘সাহেব’ ‘সাহেব’ করবি? বুঝে-সুঝে কথা বলিতে হয় তো!

মুখে বলিলেন,—“হাঁ, তা বটে।”

ভাইস-চেয়ারম্যান শ্রীগোপালবাবু তাঁর অমায়িক আতিথেয়তার জগ্গে রানাঘাটে প্রসিদ্ধ। চা আসিল, সঙ্গে এক রেকাবি খাবার আসিল। রায় বাহাদুর চা-পানান্তে আরও নানা স্থানে ঘুরিবেন বলিয়া বাহির হইলেন। অনেকের সঙ্গে দেখা করিতে হইবে, অনেক কিছু ঠিক করিতে হইবে।

যাইবার সময় বলিলেন—“মিউনিসিপ্যাল হলের চাবিটা—”

শ্রীগোপালবাবু বলিলেন—“আমাদের হলের চাকর রাজনিধিকে এখনই পাঠিয়ে দিচ্ছি। আমার বাসার চাকরও যাবে। ওরা হল খুলে সব ঠিক করবে। সেখানে ফ্রী রিডিং রুম আছে, সকালে আজ ছুটির দিন খবরের কাগজ গড়তে লোকজন আসবে। তাদের মধ্যে যারা ছেলে-ছোকরা তাদের ধরে বেঞ্চি সাজিয়ে নিচ্ছি। কিছু ভাববেন না।”

শ্রীগোপালবাবু স্নান করিয়া বাড়ীর মধ্যে ঢুকিতেই তাঁহার বড় মেয়ে (শ্রীগোপালবাবু আজ তিন বৎসর বিপত্নীক, বড় মেয়েটি শ্বশুর-বাড়ী হইতে আসিয়াছে, সেই সংসার দেখাশুনা করে) বলিল,—“বাবা, আমাদের পাঁচখানা টিকিট করে এনে দাও।”

—“কিসের টিকিট?”

—“বা রে, বাণী সিনেমায় ওবেলা ইন্দুবালা অসেছে—নাচগান হবে। সবাই যাচ্ছে আমাদের পাড়ার।”

—“কে যাচ্ছে?”

—“সবাই! এই মাগুর রাণু, অলকা, টেঁপি, যতীন কাকার মেয়ে টেঁড়স—এরা এসেছিল। ওরা সব বক্স নিচ্ছে একসঙ্গে—বক্স নিলে

বিভূতিভূষণ : সরস গল্প

মেয়েদের আড়াই টাকা করে রিজার্ভ টিকিট দিচ্ছে। আমাদের জন্তে একটা বক্স নাও!”

শ্রীগোপালবাবু বিরক্তির সুরে বলিলেন,—“হ্যাঁ ভারি—আবার একটা বক্স! বড় টাকা দেখেছিস আমার। সেই ১৯০৩ সাল থেকে জোয়াল কাঁধে নিয়েছি, সে জোয়াল আর নামল না। কেবল টাকা দাও আর টাকা দাও—”

অপ্রসন্ন মুখে দেবরাজ খুলিয়া মেয়ের হাতে একখানা দশ টাকার নোট ও কয়েকটি খুচরা টাকা ফেলিয়া দিলেন।

একটু পরে প্রতীবেশী রাধাচরণ নাগ আসিয়া বৈঠকখানায় উঁকি মারিয়া বলিলেন—“কি হচ্ছে শ্রীগোপালবাবু?”

—“আমুন ডাক্তারবাবু, খবর কি? যাচ্ছেন তো ও বেলা?”

—“হ্যাঁ, তাই জিজ্ঞেস করতে এসেছি। আপনারা যাচ্ছেন তো?”

—“যাব বই কি? রানাঘাটের ভাগ্য অমন কখনও হয়নি। যাওয়া উচিত নিশ্চয়।”

—“আমিও তাই বলছিলাম বাড়ীতে। টাকা-খরচ—ও তো আছেই। কিন্তু এমন সুযোগ—বাড়ীর সবাই ধরেছে, দিলাম দশটা টাকা বের করে। বলি বয়েস তো হোল ছাপ্পান্নর কাছাকাছি, কোন্‌দিন চোখ বুজব, তার আগে—”

—“নিশ্চয়। জীবনে ওসব শোনবার সৌভাগ্য কবার ঘটে? আমাদের রানাঘাটবাসীর বড় সৌভাগ্য যে উনি আজ এখানে আসবেন।”

—“আমিও তাই বলছিলাম বাড়ীতে। বয়েস হয়ে এল, দেখে নিই, শুনে নিই—গেলই না হয় গোটাকতক টাকা।”

—“তা ছাড়া, অত বড় বিখ্যাত একজন—”

—“সে আর বলতে! আজকাল সব জায়গায় দেখুন ইন্দুবালা দেবী, সাবানের বিজ্ঞাপনে ইন্দুবালা, গন্ধতেলের বিজ্ঞাপনে ইন্দুবালা,

শাড়ির বিজ্ঞাপনে ইন্দুবালার ছবি! তাকে চোখে দেখবার সৌভাগ্য—বিশেষ করে রানাঘাটের মত ঐদোপড়া জায়গায়—সৌভাগ্য নয়? নিশ্চয় সৌভাগ্য!”

শ্রীগোপালবাবু হাঁ করিয়া নাগ মহাশয়ের দিকে চাহিয়া রহিলেন, প্রথমটা তাঁর মুখ দিয়া কোন কথা বাহির হইল না। ঝাড়া মিনিটটুই পরে আমতা আমতা করিয়া বলিলেন—“আমি কিন্তু সে কথা বলছি নে। আমি বলছি সায়েবের লেকচারের কথা, মিউনিসিপ্যাল হলে।”

রাধাচরণবাবু ভুরু কঁচকাইয়া বলিলেন—“কোন সাহেব?”

—“কেন, আপনি জানেন না? আইনস্টাইন—মিঃ আইনস্টাইন!”

রাধাচরণবাবু উদাসীন সুরে হঠাৎ মনে পড়িয়া যাওয়ার ভঙ্গিতে বলিলেন,—“ও, সেই জার্মান না ইটালিয়ান সায়েব? হ্যাঁ—শুনেছি, আমার জামাই বলছিল। কি বিষয়ে যেন লেকচার দেবে? তা ওসব আর আমাদের এ বয়সে—লেখাপড়ার বালাই অনেকদিন যুচিয়ে দিয়েছি। ওসব করুগে কলেজের ইস্কুলের ছেলে-ছোকরারা—হ্যাঁ।”

শ্রীগোপালবাবু ক্ষীণ প্রতিবাদের সুরে কি বলিতে যাইতেছিলেন, রাধাচরণবাবু পুনরায় বলিলেন,—“তা আপনি কি করবেন শুন?”

—“আমার বাড়ীর মেয়েরা তো যাচ্ছে সিনেমায়ে। তবে আমাকে যেতেই হবে সায়েবের বক্তৃতায়। রায় বাহাদুর নীলান্বরবাবু এসে খুব ধরাধার করছেন—”

—“কে রায় বাহাদুর? নীলান্বরবাবুটি কে?”

—“কৃষ্ণনগর কলেজের প্রোফেসর। তাঁর উদ্যোগে সব হচ্ছে। তিনি এসে বিশেষ—”

রাধাচরণবাবু চোখ মিটকি মারিয়া বলিলেন,—“আরে ভায়া, একটা কথা বলি শোন। একটা দিন চল দেখে আসা যাক! ছাঁবির ইন্দুবালা আর জ্যাস্ত ইন্দুবালাতে অনেক ফারাক। ইহজীবনে একটা কাজ হয়ে যাবে। ওসব সায়েব-টায়েব ঢের দেখা হয়েছে। ছ’বেলা রানাঘাট

বিভূতিভূষণ : সরস গল্প

ইন্সটিশানে দাঁড়িয়ে থাক দার্জিলিং মেলের সময়ে—দেখ না কত সায়েব দেখবে। কিন্তু ভায়া এ সুযোগ—বুঝলে না?”

শ্রীগোপালবাবু অগ্নমনস্কভাবে বলিলেন,—“তা—তা—কিন্তু, তবে রায় বাহাদুরকে কথা দেওয়া হয়েছে কিনা, তিনি কি মনে করবেন—”

রাধাচরণবাবু মুখ বিকৃত করিয়া খিঁচাইবার ভঙ্গিতে বলিলেন,—“হ্যাঁ! কথা দেওয়া হয়েছে রায় বাহাদুরকে! ভারি রায় বাহাদুর! এত কি ওবলিগেশন আছে রে বাবা। বলো এখন, বাড়ীর মেয়েরা সব গেল তাই আমায় যেতে হোল। তারা ধরে বসল তা এখন কি করি। বলি কথাটা তো নিতান্ত মিথ্যে কথাও নয়!”

শ্রীগোপালবাবু অগ্নমনস্কভাবে বলিলেন—“তা—তা—তা তো বটেই। সে কথা তো—”

রাধাচরণবাবু বলিলেন,—“রায় বাহাদুর এলে বলো এখন তাই। তাঁকেও অনুরোধ কর না বাণী সিনেমায় যেতে।”

—“চললেন?”

—“চলি। ওবেলা আসব ঠিক সময়ে।”

রায় বাহাদুর স্থানীয় জমিদার নীরেন চাটুয্যের বাড়ীতে বসিয়া সভা সম্বন্ধে পরামর্শ ও আয়োজন করিতেছিলেন।

নীরেনবাবু রায়বাহাদুরের মাসতুতো ভাই, স্থানীয় জমিদার ও উকিল। উকিল হিসাবে হয়তো তেমন কিছু নয়, কিন্তু জমিদারের আয় ও পূর্বপুরুষসঞ্চিত অর্থ, রানাঘাটের মধ্যে অনেকেই তাঁহার সঙ্গে পারিয়া উঠেন না। শিক্ষিত লোকও বটে।

রায় বাহাদুর গুরুভোজন করিয়া উঠিয়াছেন মধ্যাহ্নে। ধনী মাসতুতো ভাই-এর বাড়ীতে মধ্যাহ্নভোজন রীতিমত গুরুতর। দু-একবার নিদ্রাকর্ষণ হইতেও ছিল, কিন্তু কর্তব্যের খাতিরে শুইতে পারেন নাই।

নীরেনবাবু বলিলেন,—“আচ্ছা দাদা, বক্তৃতায় মোট কথাটা কি হবে আজকের ?”

—তা ঠিক জানি নে। **On the unity of forces**—এই বিষয়-বস্তু। এ থেকে ধরে নাও।”

—“উনি **Space**-এর অবস্থা শোচনীয় করে তুলেছেন, কি বলুন ?”

—“অর্থাৎ ?”

—“**Space** বলেছেন সীমাবদ্ধ। আগেকার মত অসীম অনন্ত **space** আর নেই।”

—“তোমার ম্যাথমেটিক্স ছিল এম-এসসি-তে ? **Geometry of Hyperspaces** পড়েছ।”

—“মিক্সড ম্যাথমেটিক্স ছিল। আপনি যা বলছেন, তা আমি জানি।”

—“খুব খুশি হলুম দেখে নীরেন যে শুধু জমিদারি কর না, জগতের বড় বড় বিষয়ে একটুআধটু সন্ধান রাখ। খুব বেশি সন্ধান হয়তো নয়, তবুও **the very little that you know unknown to many.**”

—“আচ্ছা দাদা, উনি কি আজই চলে যাবেন ?”

—“সম্ভব। দার্জিলিং যাবেন বলছিলেন। দার্জিলিঙের পথে এখানে নামবেন। যাতে ওঁর দুশয়সা হয়, সেদিকে আমাদের বিশেষ দৃষ্টি রাখতে হবে।”

—“আজ সভার পরে আমার বাড়ীতে আনুন না একবার দাদা ? এখানে রাতের জন্মে রাখতেও আমি পারি। আজ দার্জিলিঙের গাড়ী নেই। রাত্রে এখানে থাকুন। কোন অসুবিধা হবে না।”

—“বেশ, বলব এখন।”

—“যাতে থাকেন তাই করুন। কালই খবরের কাগজে একটা রিপোর্ট করিয়ে দেব এখন। ফ্রী প্রেসের আর আনন্দবাজারের রিপোর্টার এখানে আছে।”

রায় বাহাদুর বুঝিলেন তাঁর মাসতুতো ভাইটির দরদ কোথায়। সেসব কথা বলিয়া কোন লাভ নাই, এখন কোন রকমে কার্যসিদ্ধি হইলেই হয়। কোন রকমে আজ মিটিং চুকিলে বাঁচেন।

বাড়ীর ভিতর হইতে নীরেনবাবুর মেয়ে মীনা আসিয়া বলিল,—“ও জ্যাঠামশায়, বাবাকে বলে আমাদের টিকিটের টাকা দিন।”

নীরেনবাবু ধমক দিয়া বলিলেন,—“যা যা বাড়ীর মধ্যে যা, এখন বিরক্ত করিসনি। ব্যস্ত আছি।”

মীনা আশদারের সুরে বলিল,—“তোমাকে তো বলিনি বাবা, জ্যাঠামশাইকে বলছি।”

রায় বাহাদুর জিজ্ঞাসা করিলেন,—“কিসের টিকিট রে মীনু?”

মীনা বলিল,—“আপনি কোথায় থাকেন যে সর্বদা। আমাদের পাশের বাড়ীর সবিতা আপনাদের কলেজে পড়ে, সে বলে আপনি নাকি পথ চলতে চলতে অঙ্ক কষেন। সত্যি, হ্যাঁ জ্যাঠামশাই?”

নীরেনবাবু পুনরায় ধমকের সুরে বলিলেন,—“আঃ, জ্যাঠা মেয়ে! যা এখান থেকে। জ্বালালে দেখছি। কিসের টিকিট জানেন দাদা, ঐ যে ইন্দুবালা নাকি আজ আসছে আমাদের এখানকার বাণী সিনেমাতে, নাচগান হবে, কি নাকি বক্তৃতাও দেবে, তাই পাড়াসুদ্ধ ভেঙে পড়েছে দেখবার জন্তে। মেয়েরা তো সকাল থেকে জ্বালালে।”

—“তা দাও না ওদের যেতে। আইনস্টাইনের লেকচারে আর ওরা কি যাবে। তবে দেখে রাখলে একথা বলতে পারত সারাজীবন। কি রে মীনু, কোথায় যাবি?”

—“আমরা জ্যাঠামশাই সিনেমাতেই যাই। ‘মিলন’ ফিল্মে ইন্দু-বালাকে দেখে পর্যন্ত বড্ড একটা ইচ্ছে আছে ওকে দেখব। রান্নাঘাটে অমন লোক আসবে—”

রায় বাহাদুর বাকিটুকু যোগাইয়া বলিলেন,—“স্নপ্পের অগোচর! তাই না মীনু? টিকিটের দাম দিয়ে দাও মেয়েকে, ওহে নীরেন।”

মীনা এবার সাহস পাইয়া বলিল,—“আপনাকে আর বাবাকে যেতে হবে আমাদের নিয়ে। সে শুনছি নে। বাবার মনে মনে ইচ্ছে আছে জ্যাঠামশায়। শুধু আপনার ভয়ে—”

নীরেনবাবু তাড়া দিয়া বলিলেন,—“তবে রে ছুটু মেয়ে—”

মীনা হাসিতে হাসিতে বাড়ীর ভিতর চলিয়া গেল।

যাইবার সময় বলিয়া গেল,—“বাবা তোমাকে যেতেই হবে আমাদের নিয়ে। ছাড়ব না বলে দিচ্ছি।”

দার্জিলিং মেলের সময় হইয়াছে। বেলা সাড়ে পাঁচটা।

রায় বাহাদুর ও কয়েকজন ছাত্র, নীরেনবাবু ও শ্রীগোপালবাবু স্টেশনের প্লাটফর্মে উপস্থিত হইলেন। কিন্তু—একি ?

এত ভিড় কিসের ? প্লাটফর্মের চারিদিকে এত ছোকরা ছাত্র, লোকজনের ভিড় ! সত্যি কি আজ আইনস্টাইনের উপস্থিতিতে এখানকার সকলের টনক নড়িয়াছে ? ইহারা সকলেই দার্জিলিং মেলের সময় আসিয়াছে তাঁহাকে নামাইয়া লইতে। অত বড় বৈজ্ঞানিকের প্রভাবনা বটে ! লোকে লোকারণ্য প্লাটফর্ম। হৈ হৈ কাণ্ড। রায় বাহাদুর পুলকিত হইলেন। সশব্দে মেলট্রেন আসিয়া প্লাটফর্মে প্রবেশ করিল।

একটি সেকেণ্ড ক্লাস কামরা হইতে ছোট একটা ব্যাগ হাতে দীর্ঘকেশ-আয়তাক্ষ আইনস্টাইন অবতরণ করিলেন। সঙ্গে সঙ্গে পাশের একটি ফার্স্ট ক্লাস কামরা হইতে জনৈক সুন্দরী তরুণী, পরনে দামা ভয়েল শাড়ী, পায়ে জরিদার কাশ্মীরী শ্মাণ্ডাল—হাতে ভ্যানিটি ব্যাগ বুলাইয়া নামিয়া পড়িলেন। তরুণীর সঙ্গে আরও দুটি তরুণী, দু’টিই শ্রামাঙ্গী—দু’জন চাকর, তারা লগেজ নামাইতে ব্যস্ত হইয়া পড়িল।

কে একজন বলিয়া উঠিল,—“ঐ যে নেমেছেন ! ঐ তো ইন্দুবালা দেবী—”

মুহূর্তমধ্যে প্লাটফর্মসুদ্ধ লোক সেদিকে ভাঙিয়া পড়িল। সেই

বিভূতিভূষণ : সরস গল্প

ভীষণ ভিড়ের মধ্যে; রায় বাহাদুর অতিকষ্টে আইনস্টাইনকে লইয়া গেটের দিকে অগ্রসর হইতে লাগিলেন।

আইনস্টাইন অত বুঝিতে পারেন না, তিনি ভাবিলেন তাঁহাকেই দেখিবার জন্য এত লোকের ভিড়। রায় বাহাদুরকে জিজ্ঞাসা করিলেন,—‘এরা সবাই কি স্থানীয় ইউনিভার্সিটির ছাত্র? এদের সঙ্গে আমার আলাপ করিয়ে দেবেন না মিঃ মুখার্জি?’

রায় বাহাদুর এই উদার সরলপ্রাণ বিজ্ঞানতপস্বীর ভ্রম ভাঙাইবার চেষ্টা করিলেন না।

রানাঘাটে আবার ইউনিভার্সিটি! হায় রে, এ দেশ কোন্ দেশ তা ইনি এখনও বুঝিতে পারেন না। সবাই ইউরোপ নয়।

নীরেনবাবু চাহিয়া-চিন্তিয়া স্থানীয় প্রসিদ্ধ ব্যবসায়ী ধনী গোপাল পালেদের পুরোনো ১৯১৭ সনের মডেলের গাড়ীখানি যোগাড় করিয়া-ছিলেন! তাহাতেই সকলে মিলিয়া চড়িয়া মিউনিসিপ্যাল হলের দিকে অগ্রসর হইলেন। গাড়ীতে উঠিবার সময় দেখা গেল তখনও বহুলোক স্টেশনের গেটের দিকে ছুটিতেছে। একজন কে বলিতেছিল,—“গাড়ী অনেকক্ষণ এসেছে, ঐ দেখ লেগে আছে প্ল্যাটফর্মে। শীগগির ছোট।” ভিড়ের মধ্যে কে উত্তর দিলে,—“এখান দিয়েই তো বেরুবেন, আর ভিড়ের মধ্যে গিয়ে দরকার নেই। বড্ড ভিড়। ও তো চেনা মুখ। দেখলেই চেনা যাবে। কত ছবিতে দেখা আছে। সেদিনও ‘মিলন’ ফিল্মে—”

আইনস্টাইন কৌতূকের সঙ্গে বলিলেন,—“এরাও ছুটিছে স্টেশনে বুঝি। ওরা জানে না যাকে দেখতে চলেছে সে তাদের সামনেই গাড়ীতে উঠেছে। বেশ মজা, না? মিঃ মুখার্জি, এখানে ইউনিভার্সিটি কোন্ দিকে?”

সৌভাগ্যক্রমে ভিড়ের মধ্যের একটা লোক আইনস্টাইনের গাড়ীর সামনে আসিয়া চাপা পড়-পড় হওয়াতে হঠাৎ ফুটব্রেক কষার কর্কশ

শব্দের ও 'এই এই' 'গেল গেল' রবের মধ্যে তাঁহার প্রশ্নটা চাপা পড়িয়া গেল। স্টেশন ও ভিড় ছাড়াইয়া কিছুদূর অগ্রসর হইতেই মোড়ের মাথায় ঐগোপালবাবু ও নীরেনবাবু নামিয়া গেলেন। রায় বাহাদুর বলিলেন,—“এখনি আসবেন তো?”

ঐগোপালবাবু কি বলিলেন ভাল বোঝা গেল না। নীরেনবাবু বলিলেন, “ওখানে ওদের পৌঁছে দিয়েই আসছি। আর কেউ বাড়ীতে লোক নেই মেয়েদের নিয়ে যেতে। টিকিটে এতগুলো টাকা যখন গিয়েছে—”

ঐ সামনেই মিউনিসিপ্যাল হল। স্টেশনের কাছেই। কিন্তু এ কি? সাড়ে পাচটা সময় দেওয়া ছিল। পৌনে ছটা হইয়াছে, কেউ তো আসে নাই। জনপ্রাণী নয়। কেবল মিউনিসিপ্যাল অফিসের কেরানী জীবন ভাড়া একটা ছোট টেবিলে অনেকগুলি টিকিট সাজাইয়া শ্রোতাদের কাছে বিক্রয়ের জন্ত অপেক্ষা করিতেছে।

মোটর হলের সামনে আসিয়া দাঁড়াইতে আইনস্টাইনের হাত ধরিয়া নামাইলেন রায় বাহাদুর। মুখে হাসি ফুটাইবার চেষ্টা করিয়া বলিলেন,—“হে বৈজ্ঞানিকশ্রেষ্ঠ, সুস্বাগতম্। আমাদের রানাঘাটের মাটিতে আপনার পদার্পণের ইতিহাস সুবর্ণ অক্ষরে অক্ষয় হয়ে বিরাজ করুক—আমরা রানাঘাটবাসীরা আজ ধন্য!”

চকিত ও উদ্ভিগ্ন দৃষ্টিতে শূন্যগর্ভ হলের দিকে চাহিয়া দেখিলেন সজে সজে। লোক কই? রানাঘাটবাসীদের অন্যান্য প্রতিনিধিবর্গ কোথায়?

আইনস্টাইন বিস্মিত দৃষ্টিতে জনশূন্য হলের দিকে চাহিয়া বলিলেন,—“এখনও আসেনি কেউ? সব স্টেশনে ভিড় করছে। মিঃ মুখার্জি, একটা ব্ল্যাক-বোর্ডের ব্যবস্থা করতে হবে যে। বক্তৃতার সময় ব্ল্যাক-বোর্ডে আঁকবার দরকার হবে।”

আর ব্ল্যাকবোর্ড ! রায় বাহাদুর স্থানীয় ব্যক্তি । নাড়ীজ্ঞান আছে এ জায়গার । তিনি শূন্য ও হতাশ দৃষ্টিতে চাহিতে লাগিলেন ।

জীবন ভাহুড়ি কাছে আসিয়া চুপি চুপি বলিল,—“মোট তিন টাকার বিক্রি হয়েছে । তাও টাকা দেয়নি এখন । কি করব বলুন সার ? আমাকে কতক্ষণ থাকতে হবে বলুন । আমার আবার বাসার ছেলেমেয়েদের নিয়ে বাণী সিনেমায় যেতে হবে । কলকাতা থেকে ইন্দুবালা এসেছেন—বাড়ীতে বড় ধরেছে সব । পর্য্যট্রিশ টাকা মোটে মাইনে—তা বলি, থাক গে, কষ্ট তো আছেই । ওঁদের মত লোক তো রোজ কলকাতা থেকে আসবেন না । যাক, পাঁচ টাকা খরচ হলে আর কি করছি বলুন । আমায় একটু ছুটি দিতে হবে সার । এ সাহেব কে ? এ সাহেবের লেকচারে আজ লোক হবে না—কে আজ এখানে আসবে সার !”

জীবন ভাহুড়ি ক্যাশ বুঝাইয়া দিয়া খসিয়া পড়িল । হলের মধ্যে দেখা গেল চেয়ার বেঞ্চির জনহীন অরণ্যে মাত্র দুটি প্রাণী—আইন-স্টাইন ও রায় বাহাদুর ।

আইনস্টাইন ব্যাগ খুলিয়া কি জিনিস ট্রাটেবিলের উপর সাজাইতে ব্যস্ত ছিলেন, সেগুলি তাঁহার বক্তৃতার সময় প্রয়োজন হইবে—এই সুযোগে রায় বাহাদুর একবার বাহিরে গিয়া রাস্তার এদিক ওদিক উদ্বিগ্ন ভাবে চাহিতে লাগিলেন ।

লোকজন যাইতেছে, ঘোড়ার গাড়ীতে মেয়েরা সাজগোজ করিয়া চলিয়াছে, দ্রুতপদে পথিকদল ছুটিয়াছে—সব বাণী সিনেমা লক্ষ্য করিয়া ।

রায় বাহাদুরের একজন পরিচিত উকিলবাবু ছড়ি হাতে দ্রুতপদে জনসাধারণের অহুসরণ করিতেছিলেন, রায় বাহাদুরকে দেখিতে পাইয়া বলিলেন,—“এই যে ! সাহেব এসেছেন ? লোকজন কেমন হয়েছে ভেতরে ? আজ আবার আনফরচুনেটলি ওটার সঙ্গে ক্যাশ করল কিনা ?

অন্যদিন হলে—না, আমার জো নেই—বাড়ীর মেয়েরা সব গিয়েছেন তাঁদের সঙ্গে কেউ নেই। বাধ্য হয়ে আমাকে—কাজেই—”

রায় বাহাদুর মনে মনে বলিলেন—হ্যাঁ, নিতান্ত অনিচ্ছা সত্ত্বেও।

আধ ঘণ্টা কাটিয়া গেল। সাড়ে ছটা। পৌনে সাতটা। সাতটা।

জনপ্রাণী নাই।

বাণী সিনেমা গৃহ লোকে লোকারণ্য। টিকিট কিনিতে না পাইয়া বহু লোক বাহিরে দাঁড়াইয়া জটলা করিতেছে। একদল জোর-জবরদস্তি করিয়া ঢুকিবার চেষ্টা করিয়া বিফল-মনোরথ হইয়াছে। মেয়েদের বসিবার ছুই দিকের ব্যালকনির অবস্থা একরূপ যে আশঙ্কা হইতেছে ভাঙিয়া না পড়ে। স্টেজে যবনিকা উঠিয়াছে। চিত্রতারকা ইন্দ্ৰবালা সম্মুখে দাঁড়াইয়া গান গাহিতেছেন—তাঁরই গাওয়া ‘মিলন’ ছবির কয়েকখানি দেশবিখ্যাত গান, বালক বৃদ্ধ যুবার মুখে মুখে গীত গান—‘জংলা হাওয়ায় চমক লাগায়’, ‘ওরে অচিন দেশের পোষা পাখী’, ‘রাজার কুমার পক্ষীরাজ’ ইত্যাদি।

এমন সময় রায় বাহাদুর নীলাক্ষর চট্টোপাধ্যায় ভিড় ঠেলিতে ঠেলিতে টকিহলের মধ্যে প্রবেশ করিয়াই সম্মুখে শ্রীগোপালবাবুকে দেখিয়া বিস্মিত হইলেন। পাশেই অদূরে নৌরেনবাবু বসিয়া। বলিলেন,—“বা রে, আপনিও এখানে!”

হঠাৎ-ধরাপড়া চোরের মত খতমত খাইয়া মাথা চুলকাইতে চুলকাইতে শ্রীগোপালবাবু বলিলেন,—“আমার ইচ্ছে ছিল না, কি করি—মেয়েরা—ওদের আনা—ইয়ে—সাহেবের লেকচার কেমন হল? লোকজন হয়নি?”

—“কি করে হবে? আপনারা সবাই এখানে। লোক কে যাবে?”

—“সাহেব কোথায়? চলে গেছেন?”

—“এই যে—”

বিভূতিভূষণ : সরস গল্প

রায় বাহাদুরের পিছনেই দাঁড়াইয়া স্বয়ং আইনস্টাইন ।

শ্রীগোপালবাবু শশব্যস্তে উঠিয়া আইনস্টাইনের হাত ধরিয়া খাতির করিয়া নিজের চেয়ারে বসাইলেন ।

একটি খবরের কাগজের কাটিং রাখিয়াছিলাম । এটি এখানে জানাইয়া দেওয়া গেল—

এখানে আলুর দর ক্রমেই বাড়িয়া চলিয়াছে । ধানের দর কিছু কমের দিকে । ম্যালেরিয়া কিছু কিছু দেখা দিয়াছে । স্থানীয় সুযোগ্য সাবডিভিসনাল অফিসার মহোদয়ের চেষ্টায় স্বাস্থ্যবিভাগের কর্মচারীদের দৃষ্টি এদিকে আকৃষ্ট হইয়াছে ।

গত সপ্তাহে স্থানীয় বাণী সিনেমা গৃহে সুপ্রসিদ্ধ চিত্রতারকা ইন্দু-বালা দেবী শুভাগমন করেন । নৃত্যকলা-নৈপুণ্যে ও কল্পরকণের সংগীতে তিনি সকলের মনোহরণ করিয়াছেন । বিশেষত ‘কালো বাছড় নৃত্যে’ তিনি যে উচ্চাঙ্গের শিল্প-সংগীত প্রদর্শন করিয়াছেন, রানাঘাটবাসিগণ তাহা কোনদিন ভুলিবে না । এই উপলক্ষে উক্ত সিনেমা গৃহে অভূত-পূর্ব জনসমাগম হইয়াছিল—সেও একটি দেখিবার মত জিনিস হইয়াছিল বটে । লোকজনের ভিড়ে মেয়েদের ব্যালকনির নীচে বরগা ছমড়াইয়া গিয়াছিল । ঠিক সময়ে ধরা পড়াতে একটি দুর্ঘটনার হাত হইতে সকলে বাঁচিয়া গিয়াছেন ।

বিখ্যাত জার্মান বৈজ্ঞানিক আইনস্টাইন গতকল্য দার্জিলিং যাইবার পথে এখানে মিউনিসিপ্যাল হলে বক্তৃতা দিতে নামিয়াছিলেন । তাঁহাকেও সেদিন বাণী সিনেমা গৃহে ইন্দুবালার নৃত্যের সময় উপস্থিত থাকিতে দেখা গিয়াছিল ।



উড়ন্তর

স্বর্গে সবে সকাল হইয়াছে ।

কালিদাস স্বর্গের বহির্দেশে চম্পক বৃক্ষের তলায় বসিয়া বিরামের বাতাসে খুব মনোযোগ দিয়া পুঁথি পড়িতেছিলেন, এক্ষণে সময় অঙ্গনের ও-প্রান্ত হইতে কে বলিল—বলি কালিদাস বাড়ী আছ কি ?

কালিদাস মুখ তুলিয়া দেখিলেন, ভাস এদিকে আসিতেছেন । ‘মেঘদূত’খানা তাড়াতাড়ি বন্ধ করিয়া শশব্যস্তে উঠিয়া কালিদাস আগাইয়া গিয়া ভাসকে অভ্যর্থনা করিয়া লইয়া আসিলেন ।

ভাস বৃদ্ধ ব্যক্তি, শিখা-সুত্রধারী যাজ্ঞক ব্রাহ্মণের মত তেজোব্যঞ্জক মুখশ্রী, বড় বড় চোখ, শ্বেতশ্মশ্রু বৃকের উপর পড়িয়াছে । বেশ দীর্ঘচ্ছন্দে পদবিক্ষেপ করিয়া হাঁটিবার অভ্যাস আছে । আসিতে আসিতে বলিলেন—সকালে কি করছিলে ? গাছের তলায় বসেছিলে দেখলাম ।

কালিদাস বিনীতভাবে বলিলেন—আজ্ঞে, বসে বসে ‘মেঘদূত’খানা একবার দেখাছিলাম । কাল রাত্রে যে গুমোট গিয়েছে—তাতে গাছতলায়

বিভূতিভূষণ : সবস গল্প

বসলে তবুও একটু—

—নাঃ, হুঁচোখের পাতা কাল বুজতে পারি নি। স্বর্গ আর সে স্বর্গ নেই। ক্রমেই খারাপ হয়ে আসছে। দেবরাজ উদাসীন, একবিন্দু বৃষ্টি পড়ে নি আজ দশ-পনেরো দিন। তারপর তোমার কাছে একটু এলাম বাবাজী—

কালিদাস বয়োজ্যেষ্ঠ পূজ্যপাদ কবিকে সাদরে আসন প্রদান করিয়া বলিলেন—বিশ্রাম করুন। ব্যজনী কি আনাবো?

—থাক্, দরকার হবে না। এটি চম্পক বৃক্ষ দেখছি যে।

—আজ্ঞে, নন্দনকানন থেকে দেবরাজের কর্মচারীকে বলে কয়ে একটি চারা আনিয়েছিলাম। তবে এখনো পুষ্প-প্রসবের সময় হয় নি।

—সে কি রকম? বর্ষাকাল, সে সময় তো উত্তীর্ণ হয়ে গিয়েছে না কি? এখন তো—

—তা নয়। এ একটু অন্তরকম। আপনি যদি আজ্ঞা করেন, আপনাকে একটি চারা দিতে পারি।

—চম্পকের চারা আপাতত আবশ্যক নেই। আমি এসেছিলাম তোমার কাছে অণু একটু কারণে। আমাকে সুবন্ধু বলছিল তোমার ‘মেঘদূত’-এর নাকি বাঙ্গা-আলেখ্য হয়েছে, মর্ত্যে নাকি কোন্ প্রেক্ষাগৃহে দেখানো হচ্ছে। এই হল আমার নান্দী। এখন উত্তর দাও।

আজ্ঞে আপনার কথা যথার্থ, সুবন্ধু আপনাকে ঠিকই বলেছে। আজ ভাবছিলাম মর্ত্যে গিয়ে দেখে আসব দেব, আপনি সঙ্গে চলুন না?

—নিশ্চয় যাবো। সেই শুনেই তো আমি সকালেই এখানে এলাম। আজকাল মর্ত্যে আমাদের আর আদর নেই। সংস্কৃত ভাষাটাই ভারত-বর্ষে সবাই ভুলে যাচ্ছে। এখন সেখানে অণু ভাষার চর্চা।

—আজ্ঞে বহু অর্বাচীন বালক কবির আজকাল সেখানে প্রাচুর্য্য।

—তবুও তো তোমার কাব্য সেখানে আদৃত হয়, পঠিত হয়। আমার ‘অবিমারক’-এর কথা, ‘স্বপ্ন বাসবদত্তা’র কথা তো সবাই ভুলে

গিয়েচে। তোমার কাব্যের বাঙ্গয়-আলেখ্যও তো হোলো। আমার নাটক কে পড়ে ?

—আজকাল বাঙ্গয়-আলেখ্যর যুগ চলেচে ভারতবর্ষে। আমার উজ্জয়িনীতে পর্যন্ত দুটি বাঙ্গয়-আলেখ্যর প্রেক্ষাগৃহ। এবার যদি—

এমন সময় কবি সুবন্ধু গুন্ গুন্ স্বরে গান করিতে করিতে দেবদারু কুঞ্জের ছায়ায় ছায়ায় এদিকে আসিতেছেন দেখা গেল। সুবন্ধু অনেক ছোট ইঁহাদের চেয়ে—দ্বাদশ শতাব্দীর লোক। কালিদাস ও ভাস তাঁহাকে স্নেহের চক্ষে দেখেন। সুবন্ধু দীর্ঘাকৃতি লোক, তাঁহারও খেত-শ্মশ্রু, তবে ভাসের মত বক্ষদেশালম্বী নয়, হাতে একটা সরু যষ্টি।

ভাস বলিলেন, ওহে হোকরা, শোনো এদিকে। তুমি যাবে আমাদের সঙ্গে ?

সুবন্ধু ভাসের সঙ্গে অত্যন্ত সমীহ করিয়া কথাবার্তা বলেন, ভাস কালিদাসেরও পূর্বাচার্য, সুবন্ধুর মত অপেক্ষাকৃত আধুনিক কবির পক্ষে সেটা স্বাভাবিক। তবে সুবন্ধু মনে মনে এই বুদ্ধ কবির প্রতি একটু অনুকম্পার ভাবও পোষণ করেন। হয়তো সেটা তারুণ্যের স্পর্ধা।

সুবন্ধু বলিলেন—আজ্ঞে, যাবো।

—এখন মর্ত্যে কোনো গোলযোগ নেই তো ?

দুইজনই সুবন্ধুকে প্রশ্ন করিলেন। সুবন্ধু যে ঘুরঘুর করিয়া প্রায়ই মর্ত্যধামে যাতায়াত করেন এ সংবাদ দুজনেই রাখেন। ভাবেন তরুণ বয়স, বুদ্ধি পরিপক্ব হইতে এখনো অনেক বিলম্ব, মর্ত্যধামের শৌখিন লীলা-বিলাসের বাসনা এখনও তাহার যায় নাই। সুবন্ধু লজ্জিত স্বরে জবাব দিলেন—আজ্ঞে, মর্ত্যধামের গোলযোগ মিটবার নয়। ও লেগেই আছে। তবে তাতে আমাদের কোনো অশুবিধে হবে না।

ভাস বলিলেন—সুবন্ধু এখন কি রচনা করচো ?

—আজ্ঞে কিছু না। আপনাদের নাম তো মর্ত্যে এখনো যথেষ্ট। আমার নামই তো লোকে ভুলে গিয়েচে। আমার ‘বাসবদন্তা’ এখন

বিভূতিভূষণ : সরস গল্প

আর কে পড়ে ?

—আমার নাটক কে পড়ে ?

—ও-কথা যদি আপনি বলেন তো আমাদের আশাই নেই।
আপনারা ঋষি হয়ে গিয়েছেন, আপনাদের কথা দ্বতন্ত্র।

ভাস উত্তর দিতে যাইতেছিলেন, এমন সময় সুবন্ধু বলিয়া উঠিলেন—
পূজাপাদ ভবভূতি এদিকে আসছেন দেখচি—

ভবভূতি অঙ্গনে প্রবেশ করিতে করিতে বলিলেন—আমার কি
মৌভাগ্য ! এখানেই যে আজ দেখচি কবি সম্মেলন।

সুবন্ধু বলিলেন—কিন্তু আমার মৌভাগ্য সকলের চেয়ে বেশী।
সংস্কৃত সাহিত্যের তিনজন বিখ্যাত কবি আজ এখানে মিলিত হয়েছেন।
দেখে ধন্য হোলাম।

কালিদাস বলিলেন—আমিও সে কথা বলতে পারি।

সুবন্ধু হাসিয়া বলিলেন—আপনি বলতে পারেন না।

—কেন ?

—আপনি দেখেন দুজনকে। আমি দেখচি তিন দিক্‌পালকে।
আমি বিখ্যাত কবি নই। আমাকে বাদ দিয়ে বিচার করবেন।

ভবভূতি বলিলেন—ওহে ছোকরা তুমি থাম তো! তোমাদের
বিনয়ের কলহ এখন রাখো। আমি যে জন্তু এসেছি কালিদাসকে
বলি। আমার সময় কম। পিতৃব্য ভাস, আপনার কোন অশ্লুবিধে
হবে না?

ভাস ঘাড় নাড়িয়া বলিলেন—স্বচ্ছন্দে বল বাবাজী। আমার কি
অশ্লুবিধে।

ভবভূতি কালিদাসকে সম্বোধন করিয়া বলিলেন—পৃথিবীতে আমি
দাস্তিক বলে গণ্য হয়েছিলাম একটি শ্লোক লিখে, এখন দেখছি আমার
সেই শ্লোক আমার কাব্যের চেয়েও খ্যাতি লাভ করেছে। এখন আমার
একটা কথা। শুনলাম, দাদা, আপনার মেঘদূতের নাকি বায়য়-আলেখ্য

হয়েচে পৃথিবীতে ?

—হ্যাঁ ভাই।

—আমার 'উত্তররামচরিত'খানার ওইরকম করা যায় না ? কিংবা 'মালতী-মাধবের' ? সেইজন্মেই আপনার কাছে এলাম আজ।

কালিদাস কিছু উত্তর দিবার পূর্বেই সুবন্ধু বলিলেন—ও ক'রে দেবো দাদা। সুধাংশু রায় নিপুণ বাঙ্গায়-আলেখ্য নির্মাণকারক। সে স্বর্গে এসেচে কিছুদিন হোল, আমার সঙ্গে পরিচয় আছে। আমার বাসবদত্তা কাব্যখানার জন্য তাকে বলেছিলাম—

ভবভূতি অধীরকণ্ঠে বলিলেন—আচ্ছা, তার দেহ হাওয়া হয়ে রয়েছে—মর্ত্যধামে তার কিছু করবার ক্ষমতা আছে আজকাল ? বড় অসার কথা বলা ছোকরা।

—আজ্ঞে আমার কথা প্রণিধান করুন। আমার সঙ্গে ছিল সোড়ল—

—সে আবার কে ?

—আজ্ঞে আপনারা সফরী মৎস্যের খবর কি রাখবেন ? আমরা হোলাম কাব্য-সমুদ্রের সফরী—আপনারা অগাধ জলসঞ্চারী রুই কাংলা—সোড়ল কবি ধরেচে তার কাব্যের বাঙ্গায়-আলেখ্য নির্মাণের উদ্দেশ্যে—

—কি কাব্য ?

—আজ্ঞে উদয়সুন্দরী-কথা নামে চম্পু কাব্য—খুব নামকরা কাব্য— তবে কি আপনার কিংবা পিতৃব্য ভাসের—কিহা কালিদাস দাদার—

—থাক্ আমার কথা বাদ দাও, ওঁদের কথা বলতে পারো। সারা পৃথিবীতে মেঘদূতের নাম ব্যাপ্ত হয়েছে, অভিজ্ঞান-শকুন্তলম্ পড়ে একজন স্নেহ কবি—

ভাস বলিলেন—বাদ ওই সঙ্গে আমার নামটাও দাও। একমাত্র মহাভাজন কালিদাসের নাম এখনো পৃথিবীতে উজ্জল হয়ে রয়েছে।

ই্যা, তুমি যে স্নেহ কবির উল্লেখ করলে, আমি রাখি সে সংবাদ—তার নাম—স্নেহ নাম বড় ছরুচার্য—তার নাম—

কালিদাস মূঢ় হাসিয়া বলিলেন—গয়থী। ছোকরা আমার সঙ্গে দেখা করে মাঝে মাঝে। আমার নাটক তার নাকি ভাল লেগেছে। যাক সে সব কথা। আজ মর্ত্যধামে আমরা যাচ্ছি মেঘদূতের আলেখ্য-দর্শনে। ভবভূতি তুমিও চলো, আমরা বড় আনন্দ পাবো। তোমার শিক্ষা মর্ত্যে অমর হয়ে আছে, অথবা বিনয় কেন? আলেখ্য-দর্শনের বাঁজ তুমিই বপন করেছিলে তোমার অমর নাটকে। তোমার সমানধর্মী লোকেরা তোমাকে এখন চিনেচে। ঠিকই বলেছিলে, কাল নিরবধি এবং পৃথিবীও বিপুল। ধন্য তুমি।

কথা শেষ করিয়া কালিদাস ভবভূতিকে সাদর আলিঙ্গনে আবদ্ধ করিলেন।

মর্ত্যধামে রাত্রিকাল উপস্থিত হইবার পূর্বেই এই দলটি যাত্রা করিলেন কাঁবকুঞ্জ হইতে। পথে বাণভট্টের সঙ্গে দেখা। এতগুলি কবিকে একসঙ্গে দেখিয়া বাণভট্ট বিস্মিত দৃষ্টিতে চাহিয়া বলিলেন,—উপাধ্যায়গণ, আপনারা কোথায় চলেছেন? একসঙ্গে এতগুলি জ্যোতিষ? এই যে সুবন্ধু—ব্যাপার কি?

ভাস প্রবীণতম এবং এই দলের অধিনায়ক। তিনি বালিলেন—আমরা যাচ্ছি কালিদাসের মেঘদূতের বাঙ্গয়-আলেখ্য দর্শনে, মর্ত্যে—তোমারও তো—

বাণভট্টের পরিধানে মহার্ঘ পীতবর্ণের পট্টবাস। মাথার চুল সাদা হইলেও কুঞ্চিত, পারিপাট্যযুক্ত ও দীর্ঘ। তাঁহার হস্তে একটি পুষ্পগুচ্ছ, দুই কর্ণে কর্ণিকার পুষ্পের গুঞ্জিকা, বেশ শৌখিন ধরণের লোকটি। ভাসের কথায় তাঁহার বিস্ময় যেন আরও বাড়িয়া গেল। শুধু বলিলেন—ও!

কালিদাস সাদর আমন্ত্রণ জানাইলেন বাণভট্টকেও।

এতক্ষণে বাণভট্ট যেন ব্যাপারটা বুঝিতে পারিলেন। বলিলেন—
না না, আমাকে ক্ষমা করবেন। তাতঃপদ ভাসও চলেচেন দেখচি। এসব
সুবন্ধুর ক্রিয়াকলাপ আমি জানি। যখন তখন মর্ত্যধামে ঘুরঘুর ক'রে
যাওয়ার কল আর কি। আজকাল কি অতিরিক্ত আসব পান ক'রে
থাকো সুবন্ধু ?

সুবন্ধু অপ্রতিভের সুরে উত্তর দিলেন—না দাদা।

—সেদিনও তো দেখলাম বাজায়-আলেখ্য প্রেক্ষাগৃহে— ?

—আজ্ঞে না, আপনার ভ্রম হয়েছে ! ও আসব নয়, একপ্রকার
বৃক্ষপত্রের কাথ, ছদ্ম ও শর্করা সহযোগে পান করা হয়। একটু আশ্বাদ
ক'রে দেখাছিলাম—মর্ত্যে সবাই খায়—

—মর্ত্যবাসীদের অলীক বাসনা তোমাকে পেয়ে বসচে ক্রমে ক্রমে।
আর একটি হচ্ছে এই বাজায়-আলেখ্য। মর্ত্যে এর প্রাচুর্য্য অত্যন্ত
বেশ। সেদিন এই সুবন্ধুব পরামর্শে ওর সঙ্গে আমার 'কাদম্বরী'র
বাজায়-আলেখ্য দেখতে গিয়ে হতাশ হয়ে এসেছি—

ভাস সাগ্রহে বলিলেন—কেন ? কেন ?

—আচার্য ভাস, আপনি প্রবীণ ও প্রাচীন, আপনাকে সেই রকম
ভক্তি করি, আপনার সামনে আর সে সব কথা বলাতে চাই নে। আর
কথায় কথায় গীত। নাঃ, আমি তো ছুখে আক্ষেপে চলে এলাম—সুবন্ধু
সব জানে, আবার আপনাদের আজ নিয়ে যাচ্ছে—

সুবন্ধু হাসিয়া বলিলেন, আমি নিয়ে যাই নি দাদা। কালিদাস
দাদাই আমাকে বললেন, উনিই আমাকে নিয়ে যাচ্ছেন। বরং আপনি
ওঁদের জিজ্ঞেস করুন—

কালিদাস বলিলেন—সে ঠিক। সুবন্ধু জানতো না। আমি ওকে
যেতে বলেছি। দেখেই আসি কেমন হোলো মেঘদূত। চললাম ভায়া
বাণভট্ট—

রাত্রিকাল। কলিকাতায় 'প্রদীপ' সিনেমাতে 'মেঘদূত' হইতেছে।

বিভূতিভূষণ : সরস গল্প

ভিড় খুব। ডিম ভাজা ও ঘুঘুনি, চানাচুর, বাদাম ভাজা, আলু-কাবলি-
ওয়ালাদের পাশ কাটাইয়া কবিদল সিনেমা হলে প্রবেশ করলেন।
কিছুক্ষণ পরে ছবি আরম্ভ হইল। ছবি কিছুদূর অগ্রসর হইবার পর
কালিদাস বিস্ময়ে বাঁলয়া উঠিলেন—এ কি ? এ কার মেঘদূত ? আমার
তো নয়—

ভাস বলিলেন—তাই তো। আমও তাই ভাবছি।

—ভবভূতি বলিলেন শুধু নামটাই নিয়েচে।

কালিদাস ক্ষোভের সঙ্গে বলিলেন—এ এখানে বসে দেখে কি
করবো। বাণভট্ট ঠিক বলেছিল। চলুন আর সময় নষ্ট করার প্রয়োজন
নেই।

বাহিরে আসিয়া কালিদাস বলিলেন—ওহে সুবন্ধু, তুমি সেই
বৃক্ষপত্রের ক্বাথ শ্রবণ করবে নাকি ?

—আজ্ঞে না, চলুন। ও অভ্যাস নেই আমার, দৈবাৎ সেদিন একটু
আশ্বাদ করেছিলাম মাত্র।

এমন সময় দুটি ছোকরা যাইতে যাইতে একজন আর একজনকে
বলিতেছে শোনা গেল—‘মেঘদূত’ কার লেখা বই হে ?

অপর ছোকরা জবাব দিল—অতীন ঘোষের।

—‘ভাবীকাল’ ?

—তা জানি নে। বই উঠেচে জানিস ?

—কাল একখানা ‘মেঘদূত’ আর একখানা ‘ভাবীকাল’ খুঁজে
দেখতে হবে পাওয়া যায় কিনা।

কালিদাস পিছন ফিরিয়া চাহিয়া দেখিলেন, তাঁহার ঠিক পিছনে
ছোকরা দুটি। রাগে ও ক্ষোভে কালিদাস কিছুক্ষণ নির্বাক হইয়া
রহিলেন। ছবি দেখিয়াও এত রাগ তাঁহার হয় নাই। ভাসের দিকে
চাহিয়া বলিলেন—শুনেচেন এ অর্বাচীন বালক দুটি কি বলচে ? অতীন
ঘোষ নামক কোনো ব্যক্তির লেখা নাকি এই বই। বাস্তব-আলেখ্যই

প্রধান জিনিস, লেখকের নামটা জানবার আবশ্যক কি ?

সুবন্ধু বলিলেন, এই বাঙ্গায়-আলেখ্যের নির্মাণকার হোলো অতীন ঘোষ নামক কোন লোক । ওরা অত কৌতূহলী নয় গ্রন্থকর্তা সম্বন্ধে । আলেখ্য নিয়ে আসল কথা । অতীন ঘোষকেই ভেবেছে গ্রন্থকর্তা । মহাস্থবির অশ্বঘোষের নাম করলেও কালিদাস দাদার মানটা থাকতো । তা নয়, অতীন ঘোষ !

সুবন্ধু হি হি করিয়া হাসিয়া ফেলিলেন ।

কালিদাস রাগের সুরে বলিলেন—অত হাস্য কিমের ? বৃক্ষপত্রের কাথ পান না করেই এই । চলো এখান থেকে যাই ।

—বৃক্ষপত্রের কাথে বিহ্বলতা আসে না দাদা, এ আসব নয় । আপনি আশ্বাদ ক'রে দেখতে পারেন ।

ফিরিবার পথে ভবভূতি বলিলেন—না হে সুবন্ধু, তোমার সেই সুধাংশু রায়কে আর কোন কথা বোলো না, আমার উত্তররামচরিতের বাঙ্গায়-আলেখ্যে কোন প্রয়োজন নেই—

ভাস বলিলেন—আমারও ‘সপ্ন-বাসবদত্তা’ সম্বন্ধে ওই কথা, বাণভট্ট ছোকরা যথার্থ কথাই বলেছিল, এখন দেখা যাচ্ছে—

কালিদাস বলিলেন—সুবন্ধু কিন্তু ওর বাসবদত্তার এক আলেখ্য করাবে আপনি দেখে নেবেন—ও এখনো আসক্তি পরিত্যাগ করে নি—সেই সুধাংশু রায়কে ও ধরবে ঠিক—

সুবন্ধু হাসিয়া বলিলেন—যা বলেন দাদা । আপনারা হোলেন প্রথিতযশা কবি, আপনাদের কথা আলাদা—নাম যা হবার আপনাদের হয়েই গিয়েচে—আপনাদের কি ?

ইহার অপেক্ষাও বিষ্ময়কর ঘটনা সেদিন কালিদাসের জন্ম অপেক্ষা করিতেছিল ।

কালিদাস ভাসকে সঙ্গে লইয়া নিজের আশ্রমে প্রবেশ করিয়া

বিভূতিভূষণ : সরস গল্প

বিশ্বায়ের সঙ্গে দেখিলেন স্বয়ং শ্রীকৃষ্ণদ্বৈপায়ন ব্যাসদেব চম্পক বৃক্ষের বেদীমূলে বসিয়া আছেন। ব্যাসদেব প্রবীণতম ও প্রাচীনতম কবি, তিনি কখনো আসেন না। শুধু কবি নহেন, দার্শনিক ও তত্ত্বজ্ঞ পুরুষ বলিয়াও তিনি সকলের শ্রদ্ধার পাত্র। ব্যাসদেবের আকৃতি প্রাচীন ঋষিদের ন্যায়, পরিধানে কাষায় বস্ত্র, মস্তকে শুভ্র কেশভার, গম্ভীর ও সৌম্য মুখভাব। উভয়ে সসম্মুখে ব্যাসদেবের পাদ-বন্দনা করিলেন। কালিদাস বিনীতভাবে বলিলেন, আমার গৃহ পবিত্র হোলো আপনার চরণ-স্পর্শে। আমার প্রতি কি আদেশ, তাত্ত্বপাদ ?

ব্যাসদেব আশীর্বাদ করিয়া বলিলেন—তোমার মঙ্গল হোক। কালিদাস, তোমার কুশল ? ভাস, তুমি ভাল আছ ? বোস, বোস। কোথায় গিয়েছিলে ? মর্ত্যবাসে ? ভবভূতিও সঙ্গে ছিল ? ছোকরা ভাল লেখে। সেখানে কেন ?

কালিদাস কারণ বালিলেন।

ব্যাসদেব বলিলেন—আমিও এই কারণেই এসেছিলাম, গীতার একটি বাঙ্গয়-আলেখ্য নির্মাণ করিয়ে দিতে পারো ? অবশ্য আমি প্রচারের দিক দিয়েই বলছি। তত্ত্ব-প্রচারের সুবিধে হবে। তোমরা তো আজকালকার ছেলে, মর্ত্যের সঙ্গে তোমাদের যোগাযোগ আছে, আমার তা নেই। ভাস কি বলো ?

ভাস বলিলেন—অনুমতি যদি করেন তো বলি, ও সব কলঙ্ককারী ব্যাপারের মধ্যে আপনি যাবেন না। বলো না হে কালিদাস সব খুলে ঘটনাটা ?

পরে ব্যাসদেব সব শুনিয়া নীরব রহিলেন।

ভাস বলিলেন—এখন আপনি বিবেচনা করে দেখুন। আপনাকে আমি কি বলবো ?

ব্যাসদেব বলিলেন—তোমার যে কাব্যের বাঙ্গয়-আলেখ্য হয়েছে, তার নামটি কি বললে ? মেঘদূত ? কি অবলম্বনে লেখা ? কাব্যের

ঘটনাটি কি ?

কালিদাস লজ্জিত সুরে বলিলেন—সে আর আপনার শোনার প্রয়োজন নেই, তাতঃপাদ । সে কিছু না । ওই একটা দেশবিদেশের বর্ণনার মত । আমাদের কথা বাদ দিন । আপনি এবেলা আতিথ্য গ্রহণ ক’রে আমাকে ধন্য ক’রে যান ।

ব্যাসদেব থাকিতে পারিবেন না । তাঁহাকে ব্রহ্মার কাছে যাইতে হইবে । বেদ সম্বন্ধে কি আলোচনা আছে । অগ্ন সময়ে চেষ্টা করিবেন । এখন বিশেষ ব্যস্ত আছেন ।

ব্যাসদেব বিদায় লইয়া অন্তর্হিত হইলেন ।

তাস কালিদাসের দিকে অর্থপূর্ণ দৃষ্টিতে চাহিয়া বলিলেন—বোঝ ব্যাপার !

জওহরলাল ও গড়



সেদিন হাওড়া স্টেশনে সকাল হইতেই ভিড় হইবে এই রকম একটা আভাস পাওয়া গিয়াছিল।

সংবাদপত্রের প্রথম পাতায় বড় বড় করিয়া খবর বাহির হইয়াছিল জওহরলালজি সেদিন বস্বে মেলে কলিকাতায় আসিতেছেন। আরও একটি খবর বাহির হইয়াছিল, 'ভগবান স্মরণ পাঞ্জাব মেলে কলিকাতা আসিতেছেন, হিমালয়ের কোন একটা স্থান হইতে।

এই পর্যন্ত। টাইম টেবিল দেখিয়া জানিলাম উভয় ট্রেন আসিয়া পৌঁছিবে দু'ঘণ্টার ব্যবধানে। বস্বে মেল আগে আসিবে, বেলা সাতটা সাড়ে সাতটার মধ্যে।

গিয়া দেখি হাওড়া স্টেশন পর্যন্ত অগ্রসর হওয়া সম্পূর্ণ দুঃসাধ্য ব্যাপার। স্ট্র্যাণ্ড রোডের পর হাওড়া পুলের দিকে এক পা-ও বাড়ানো সম্ভব নয়। মনে মনে ভাবিলাম; ভগবান ও জওহরলাল একই দিনে যখন কলিকাতা আসিতেছেন, তখন এমন ভিড় হওয়া স্বাভাবিক বটে।

জওহরলালজি আসিবার কথায় তত বিস্মিত হই নাই, কারণ তিনি ইতিপূর্বেও কলিকাতায় আসিয়াছেন। কিন্তু ভগবান কখনও কোথাও আসেন না, তিনি নিরাকার, এ পর্যন্ত তাঁহাকে কেহ দেখে নাই বলিয়াই গুনিয়াছি। তিনি হঠাৎ অথ পাঞ্জাব মেলে কেন যে কলিকাতা আসিতেছেন, কিছু বোঝা গেল না। কোথা হইতে আসিতেছেন, তাহাও জানি না।

ভিড়ের মধ্যে দেখি একদল সংকীর্তন পার্টি চলিয়াছে, বোধ হয় ভগবানকে অভ্যর্থনা করিবার জন্ত। ভগবানকে অভ্যর্থনা করিবার জন্ত সংকীর্তন পার্টি কি হইবে? কারো গঙ্গাযাত্রার সময় সংকীর্তনের ব্যবস্থা করা হয় জানি, কিন্তু ভগবান যখন স্বয়ং হাওড়া স্টেশনে আসিয়াছেন, তখন এর অপেক্ষা ভালো ব্যবস্থা কি করা যাইত না?

অতি কষ্টে প্ল্যাটফর্মের ভিড় ঠেলিয়া সম্মুখভাগে আগাইবার চেষ্টা করিলাম।

সঙ্গে সঙ্গে জওহরলালজির ট্রেন আসিয়া দাঁড়াইল।

ইহার পর স্টেশন ভাঙ্গিয়া পড়ে আর কি, বহুবিধ স্লোগানের সমবেত উচ্চকণ্ঠের উচ্চারণে। সাংবাদিক ও ফটোগ্রাফারের দল দেখিতে দেখিতে পণ্ডিতজিকে ঘিরিয়া ফেলিল। তারপর সেই বিরাট জনতা তাঁহাকে লইয়া পথে নামিল এই পর্যন্ত দেখিলাম—ইহার পর কি ঘটিল না ঘটিল বলিতে পারিব না, কারণ আমি জওহরলালজির সে বিশাল শোভাযাত্রায় যোগদান করি নাই, ভগবানকে দেখিবার জন্ত প্ল্যাটফর্মেই ছিলাম।

দল চলিয়া গেল।

প্ল্যাটফর্ম প্রায় খালি।

সেই সংকীর্তন পার্টি ছাড়া ভগবানকে অভ্যর্থনা করিবার জন্ত কেহই উপস্থিত নাই গোটা প্ল্যাটফর্মে। একজন রোগা, গৌফদাড়িকামানো লোক আমার কাছে আসিয়া বলিল—মশায়, আজ নাকি ভগবান আসচেন?

—এই রকমই তো কাগজে লিখেচে।

—কোন প্ল্যাটফর্মে জানেন?

—পাঞ্জাব মেলে তো আসছেন। এন্কোয়ারি অফিসে একবার জিজ্ঞেস করে আসুন না?

—উঃ মশাই, যা ভিড়ের কাণ্ড! কি কষ্টে যে হাওড়া পুলটুকু

বিভূতিভূষণ : সরস গল্প

ছাড়িয়ে এসেচি !

—প্রসেশন কতদূর গেল ?

—জওহরলালজির মোটর তো স্ট্র্যাণ্ড রোড দিয়ে হাইকোর্ট-মুখে চলে গেল দেখলাম—আর কিছু বলতে পারি নে। বসুন, এনুকোয়ারি আপিসে জিজ্ঞেস করে আসি।

লোকটা সেই যে চলিয়া গেল, আর ফিরিল না। অন্তত আমি আর তাহাকে দেখিলাম না।

মিনিট কুড়ি পরে পাঞ্জাব মেল আসিয়া সশব্দে স্টেশনে প্রবেশ করিল। বিশেষ কোনো দলকে আগাইয়া যাইতে দেখিলাম না, সেই ক্ষুদ্র সংকীর্তন পার্টি ছাড়া, তাহারা ততক্ষণ খোল ও খঞ্জনীর সাহায্যে উদ্দগু রেচো কীর্তন জুড়িয়া দিয়াছে।

প্ল্যাটফর্মময় ফুল ও ছেঁড়া ফুলের মালা ছড়ানো। কিছুক্ষণ পূর্বে পণ্ডিতজির উদ্দেশে যে বিরাট পুষ্পবৃষ্টি হইয়া গিয়াছে, তাহারই চিহ্ন। একগাছা মালা কেন সংগ্রহ করিয়া আনিলাম না ভগবানের জগু, ভাবিয়া মায়া হইল সে বেচারীর উপর। সংকীর্তনের দল কি মালা আনিয়াছে? আনিতে পারে।

ছড়ছড় করিয়া লোক নামিয়া গাড়ী খালি হইয়া আসিল। বাঙালী, বিহারী, মাদ্রাজী, পাঞ্জাবী, পাঠান যাত্রীর দল নিজের নিজের জিনিসপত্র কুলীর মাথায় চাপাইয়া, ব্যাগ ও টিফিন-ক্যারিয়ার নিজের নিজের হাতে বুলাইয়া গেটের দিকে চলিয়াছে। স্থানে স্থানে স্তূপাকার বাস্ক ও হোল্ড-অল-বাঁধা বিছানাকে কেন্দ্র করিয়া মেয়েরা বালক-বালিকাসহ দাঁড়াইয়া আছে, সঙ্গের পুরুষেরা কুলীদের সঙ্গে দরদস্তুর করিতেছে। খুব একটা ব্যস্তত্বস্ততার ভাব চারিদিকে।

কিন্তু—ভগবান কই ?

ফাস্ট ক্লাস দেখিলাম, সেকেন্ড ক্লাস দেখিলাম। দুই তিনটি বাঙালী পরিবার একটি সেকেন্ড ক্লাসের কামরা হইতে নামিয়া কামরার

সামনেই মালপত্র নামাইয়া জটলা করিতেছে। এঞ্জিনের সামনে ফাস্ট-সেকেণ্ড ক্লাস কম্পোজিট বগিখানিতে মিলিটারী বোঝাই। তাদের সঙ্গে বহু মালপত্র। কুলীরা ঠেলাগাড়ী আনিয়া মাল বোঝাই করিতেছে! এখানেও তো ভগবানের আসিবার কথা নহে।

সংকীৰ্তন পাৰ্টি কীৰ্তন থামাইয়াছে। তাহাদের কাছে গিয়া বলিলাম—মশায়, ভগবানকে খুঁজে পেলেন?

উহাদের একজন বলিল—না মশায়, আমরাও তো খুঁজছি।

—পেছন দিকটা দেখে এসেচেন?

—সব দিকে দেখা হয়ে গিয়েচে।

—ইন্টার ক্লাসটা দেখা হয়েচে?

—কোনো ক্লাসই বাদ দিই নি আমরা। কোথাও তো তেমন কোনো লোককে দেখলাম না মশাই। আমরা বাগবাজার গোড়ীয় মঠ থেকে আসছি।

আরও খানিকটা অপেক্ষা করিবার পর আমি নিরাশ মনে প্ল্যাটফর্ম হইতে বাহির হইয়া রাস্তায় পড়িলাম। কি মনে করিয়া ট্রাম না ধরিয়া হাওড়া পুল ধরিয়াই চলিয়াছি, হঠাৎ চোখে পড়িল একজন লোক পুলের মাঝামাঝি রেলিং ধরিয়া অগ্ন্যম্নস্কভাবে গঙ্গার জলের দিকে চাহিয়া আছে।

আমি পাশ দিয়া যাইতেছি, লোকটি হঠাৎ আমার দিকে ফিরিয়া চাহিল। লোকটির চেহারায় কি যেন ছিল, দীন-ভৃংখীর মত অকিঞ্চন ভাব মুখে, অথচ চোখ-ছুটিতে অতলম্পর্শ গভীরতা ও বালকোচত সারল্য একসঙ্গে মাখানো। আকৃষ্ট হইয়া পড়িলাম ওর এই মুখ-ভাবের আশ্চর্য পবিত্রতা ও সরলতায়। বলিলাম—কোথায় যাবেন?

লোকটি গঙ্গার দিকে হাত দিয়া দেখাইয়া বলিল—এই নতুন পুল বুঝি?

—হ্যাঁ।

বিভূতিভূষণ : সরস গল্প

—বেশ পুল করেছে। সাহেবেরা করে ভালো।

—আপনি কোথায় যাবেন? অনেকদিন আসেন নি বুঝি কলকাতায়?

—আমি ভগবান। কলকাতায় এসেছি এই ট্রেনে। হাওড়া স্টেশনে কেউ তো আমায় অভ্যর্থনা করবার জন্তে যায় নি?

কি সর্বনাশ, লোকটা বলে কি। ভগবান? এই লোকটা? এ'কে তো নিতান্ত অভাজন বলিয়া মনে হইতেছিল—যদিও কি গুণে লোকটা মনকে আকৃষ্ট করিয়াছে বটে।

আমি পায়ের ধূলা লইয়া প্রণাম করিলাম। বলিলাম—আপনি?

—হ্যাঁ। বলি ওরা আমাকে কেউ স্টেশনে অভ্যর্থনা করতে এলো না কেন?

—ওরা জওহরলালজিকে এগিয়ে নিয়ে গেল কিনা—তাই—

—আর আমার বেল। কেউ বুঝি এলো না?

ভ্রলোক দেখিলাম ছেলেমানুষের মত ঠোঁট ফুলাইয়া অভিমানের সুরে কথা কয়টি বলিলেন। আমার দুঃখও হইল, হাসিও পাইল। ভগবান এত ছেলেমানুষ!

সাস্তুনার সুরে বলিলাম—তা কেন, গোড়ীয় মঠের বাবাজিরা কীর্তন পার্টি নিয়ে এসেছিলেন তো? তা বোধ হয় আপনাকে তাঁরা চিনতে পারেন নি। আপনার কোনো ফটো তো ইতপূর্বে কোনো খবরের কাগজে বার হয় নি, চেনাই যে দায়।

ভগবান আমার কথায় ছেলেমানুষের মতন অগ্নে সাস্তুনা পাইয়া বলিলেন—তা বটে। চিনতে পারে নি তা কি করবে। শোনো, আমার একটা ফটো তুলিয়ে খবরের কাগজে ছেপে দিতে পারবে?

—আজ্ঞে বলেন—আজ্ঞে আমি—ফটো, আমি তুলিয়ে দিতে পারি। কিন্তু কোনো খবরের কাগজের লোকের সঙ্গে আমার আলাপ নেই। কাগজে ফটো ছাপাবার ব্যবস্থা তো করতে পারিনে—

ভগবান নিরাশ ভাবে বলিলেন—ও !

আমার আবার মায়া হইল। তাঁর এই অসহায় বালকের মত কণ্ঠের ‘ও !’ শুনিয়া বলিলাম—চলুন না কেন, এই কাছেই বর্মণ স্ট্রীটে ‘আনন্দবাজার পত্রিকা’ আপিসে, ওরা আপনার ফটো নিশ্চয়ই যত্ন করে ছাপবে আপনার নাম শুনলে—চলুন সঙ্গে করে নিয়ে যাচ্ছি—

ভগবানের মুখ আনন্দে উজ্জ্বল দেখাইল। আগ্রহের সুরে বলিলেন—চলো, চলো—তাই চলো—এইবার ফটো ছাপালে সামনের বারে অনেক লোক আসবে।

তারপর যেন খানিকটা আপন মনেই বলিলেন—লোকে চেনে না তাই, না চিনলে—

আমি কিন্তু যে কথাটা ভাবিতেছিলাম, সেটা তাঁহাকে বলিলাম না। ফটো ছাপানো হয় না বলিয়া চিনিবার অসুবিধার জন্ত যে তাঁহার অভ্যর্থনা হয় নাই তাহা তো কথা নয়, আসলে প্র্যাটফর্মে তখন লোকজনই ছিল না তিনি যে সময় আসিলেন।

হঠাৎ মনে পড়িয়া যাওয়াতে কথাটা বলিলাম যে তিনি কোথায় উঠিবেন, ঠিক করিয়াছেন ?

তিনি বলিলেন—কেউ তো আগ্রহ করে নিয়ে যাচ্ছে না, কোথায় উঠবো কি জানি !

—যদি কিছু মনে না করেন, আমার একধানা ঘর আছে দোতলায়। ভাড়াটে ঘর, একলাই থাকি। সেখানেই যদি আজ রাত্রে থাকেন—

—তা বেশ। যাবো এখন।

—আপনার খাওয়া-দাওয়া তো কোনো—মানে ওখানে সব আঁষ, মাছ-মাংস খাই। অবিশি নিরামিষ যদি খান, তবে তার ব্যবস্থা করে দেবো এখন।

ভগবান হাসিয়া বলিলেন—আমার আবার ওসব কি ? যা দেবে,

বিভূতিভূষণ : সরস গল্প

তাই খাবো। আমি কি বোষ্টম গোসাঁই?

অপ্রতিভ সুরে বলিলাম—আজ্ঞে, ক্ষমা করবেন। বৈষ্ণবেরা নিরামিষ ভোগ আপনাকে নিবেদন করে দেন কিনা তাই বলছিলাম—

—আবার অন্ত্রলোকে মাছ-মাংস দিয়ে ভোগ দেয়—মুরগি বলি দেয়, গরু মহিষ ছাগল কাটে—তাও খাই। আমরা এক অবতারে আমি ভক্তের দেওয়া শূকরের মাংস খেয়ে রোগগ্রস্ত হয়ে নরদেহ ত্যাগ করি।

—আজ্ঞে জানি, বুদ্ধ অবতারে।

—ব্যাপার কি জানো, আদিম নীহারিকাটা ঘুরিয়ে দেবার পরে বিশ্বসৃষ্টি আপনা-আপনি হচ্ছে, আমার কোনো কাজ নেই। আজ কোটি কোটি বৎসর ধরে বেকার বসে আছি। যুরে যুরে বেড়াই, কোথায় কি হচ্ছে দেখি। এখন আমি শুধু দ্রষ্টা ও সাক্ষী মাত্র। জগতে দেখতে পাই আমায় কেউ চায় না, কেউ বোঝে না—একা একা থাকি। সর্বত্রই আছি অথচ কেউ ফিরে চেয়েও দেখে না। কেউ মানে না আজকাল আর, বলে উনি তো বেকার। জগৎ আপনা-আপনিই চলচে, ওঁর আবশ্যকতা বা কি?

কষ্ট হইল বেচারীর জন্ম। এমন সুরে কথা বলিলেন, তাঁর উপর কেমন একটা মায়াও হইল।

মানুষ বেকার হইত, চেষ্টা যত্ন করিয়া একটা কাজ জোগাড় করিয়া দিতাম। ভগবানের বেকার-সমস্যার সমাধান করা আমার সাধ্যায়ত্ত নয়।

সামনেই চিৎপুর রোড। বড় ট্রাফিকের ভিড়।

পিছনে ফিরিয়া বলিলাম—আমুন, এই সামনেই ‘আনন্দবাজার আপিস’—আপনার ফটোটা তাহলে—

আহ্লাদের সুরে বলিলেন—বেশ, চলো চলো—ওদের আমার পরিচয়টা দিয়ে দিও—

নাঃ, বড্ড সরল ও ছেলেমানুষের মত। এত ছেলেমানুষ কেন ভগবানের মধ্যে ? আহা, কেন লোকে ওঁকে মানে না, গ্রাহ করে না, না মানিয়া মনে কষ্ট দেয় !

চিৎপুর রোড পার হইয়া ওপারের ফুটপাথে উঠিয়া পিছন ফিরিয়া তাঁহাকে ডাকিতে গিয়া দেখি, তিনি নাই। ভিড়ের মধ্যে কোথাও হারাইয়া গেলেন নাকি ? কলিকাতায় চলাফেরা অভ্যাস নাই তো !

তল্ল তল্ল করিয়া খুঁজিয়াও আর তাঁহাকে দেখিতে পাইলাম না।

ভিড়ের মধ্যে হারাইয়া গেলেন, না অভিমান করিয়া আবার তাঁহার সন্ধানমই ফিরিয়া গেলেন—কি করিয়া বলিব।

মূলো—র্যাডিশ—হর্স র্যাডিশ



নবীনবাবু ঘুম হইতে উঠিয়া কয়লা চাকরকে ডাকাডাকি করিতেছেন শুনিতে পাইয়াও আবার মুড়ি দিয়া পাশ ফিরিয়া শুইয়া এবং তার একটু পরে বোধ হয় ঘুমাইয়াও পড়িয়াছি। জানালার ফাঁক দিয়া পাশের আতাগাছের ডাল যখন দেওয়ালের গায়ে অনেকখানি রোদের মধ্যে ছায়া সৃষ্টি করিয়াছে, তখন কয়লার ডাকে তন্দ্রা ভাঙিল।

—বাবুজি, চা তৈয়ার!

—চা? এখানে নিয়ে আয়, বিছানায়।

নবীনবাবু বোধ হয় প্রাতঃভ্রমণ সারিয়া আমার ঘরের পাশের সরু করিডোর দিয়া গট্‌গট্‌ করিয়া চলিয়া গেলেন আমার আলস্তুর প্রতি কটাক্ষ করিয়াই বেশ জোরে জোরে পা ফেলিয়া গেলেন! চা-পান বিছানায় বসিয়াই শেষ করিয়া উঠিব উঠিব ভাবিতেছি, এমন সময় নবীনবাবু তাড়াতাড়ি আসিয়া আমার বিছানার পাশের দিকের জানালায় দাঁড়াইয়া বলিলেন—উঠুন মশাই, যোধপুরী মূলো এসেছে, -র্যাডিশ।

আমি চটি পায়ে দিতে দিতে বলিলাম—হর্স র্যাডিশ। একা, না মিস সোরাবজিকে নিয়ে?

নবীনবাবু রাগ করিয়া বলিলেন—আম্বন না, উঠেই আম্বন না।

মিস সোরাবজির বাবা-মার দায় পড়েছে ওর সঙ্গে মেয়েকে পাঠাতে সকাল বেলা। একাই এসেছে।

পরে পিছন ফিরিয়া বলিলেন—আচ্ছা, রোজ রোজ কেন সকালে এসে জোটে বলুন তো? কি কাজ এখানে বাপু তোর? বিরক্ত করলে! আর আপনিও আটটার আগে বিছানা ছেড়ে উঠবেন না একদিনও—

বলিলাম—আপনার উক্তি দুটির মধ্যে পরস্পর সম্বন্ধটা কি ভাল বুঝলাম না নবীনদা—

—বুঝবেন বুঝবেন—শীগগিরই বুঝবেন। যদি সকালে সকালে বেরিয়ে যাই, তাহলে তো আর এ হাঙ্গামা এসে জোটে না সকাল-বেলা। এখন চা কর রে, খাওয়াও রে, ভ্যাজ ভ্যাজ করে বকো রে—

—নবীনবাবু, শিওরলি ইউ ডোন্ট গ্রাজ ইওর গেস্ট এ কাপ অব টি।

—থাক থাক হয়েছে—গেস্ট! ভারি আমার গেস্ট রে!

যাহার অভ্যর্থনার আয়োজন এত হৃদয়তাপূর্ণ, সে বেচারী নির্বিকার ভাবে হাসিমুখে বাংলোর বারান্দায় দাঁড়াইয়া ছিল। আমায় দেখিয়াই হাত বাড়াইয়া পরম বন্ধুত্বের সুরে বলিল—গুডমর্নিং মিস্টার রায়!

আমি হাত ঝাঁকাইতে ঝাঁকাইতে পরিপূর্ণ অমায়িকতার সঙ্গে বলিলাম—গ্ল্যাড ইউ হ্যাভ কাম মিঃ শুকরাম—গুডমর্নিং।

নবীনবাবু উদাসীনভাবে অতিথির করমদন করিয়া ইংরেজিতে বলিলেন, বসুন মিঃ শুকরাম। আমি একবার জেনারেল পোস্টা পিস থেকে একটা তার করে আসি, আপনি ততক্ষণ চা খান।

আমার দিকে চাহিয়া বাংলায় বলিলেন—মূলোকে শীগগির ভাগাবার চেষ্টা করুন। আজ এখুনি আমাদের বেকুতে হবে, কাজ আছে অনেক।

মূলো যাহাকে বলা হইয়াছে সে বাংলার একবর্ণও বোঝে না তাই রক্ষা। আমাদের মধ্যে কথাবার্তা ইংরেজিতেই হয়।

মূলো জাঁকিয়া বসিয়া আমায় বলিল—বাঙালীদের মত লুচি কবে খাওয়াচ্ছেন মিঃ রায় ? ও আমার বড় ভাল লাগে । আমি বাঙালীদের সঙ্গে একবার মিশেছিলাম—লুচি খাইয়েছিল । সে এখনও ভুলিনি ।

শুনিয়া মনে মনে বলিলাম—নবীনদার পিত্তি জ্বলে যেত—যদি কথাটা শুনত । ভাগ্যিস নেই এখানে । যে অভ্যর্থনার ঘটনা তাঁর ! কয়লা চাকরকে ডাকিয়া খানকতক লুচি ভাজিতে বলিতে গিয়া শুনিলাম ঘি ও ময়দা বাজার হইতে না আনিলে চলিবে না, ফুরাইয়া গিয়াছে । বুঝিলাম অতিথির অদৃষ্টে লুচি নাই । নবীনবাবু হয়তো ইতিমধ্যে আসিয়া পড়িতে পারেন । দরকার নাই সেসব হাঙ্গামায় । চা ও টোস্ট খাওয়াইয়া দিলাম মূলোকে । মূলো তাহার স্বভাব-সিদ্ধভাবে বকিতে শুরু করিয়া দিল । বকুনি আর থামায় না, বেলা নটা বাজিয়া গেল, তবুও তাহার ছুঁশ নাই । ইতিমধ্যে নবীনবাবু আসিয়া পড়িলেন, মূলোকে তখনও বাসয়া থাকিতে দেখিয়া বিরক্তির সহিত অগ্রদিকে মুখ ফিরাইয়া বলিলেন—মূলোটা এখনও যায়নি ? হর্স র্যাডিশটা ?

—না গেলে তো তাড়িয়ে দিতে পারি নে ! ও বলছে আমাদের সঙ্গে খিন্সি লেক দেখতে যাবে ।

—মাটি করেছে ! সারলে দেখছি ।

মূলো আমাদের কথাবার্তা বুঝিতে না পারিয়া বলিল—মিঃ রায়, খিন্সি লেক সম্বন্ধে কি বলছেন ?

নবীনবাবু তাহার দিকে ফিরিয়া বলিলেন, অবশ্য ইংরেজিতে—খিন্সি লেক সম্বন্ধে একটা পরামর্শ করছি ওর সঙ্গে । আপনি আসবেন নাকি আমাদের সঙ্গে ?

—নিশ্চয় মিঃ বোস, খুব খুল্লীর সঙ্গে ।

—বেশ বেশ । বড় আনন্দ হোল । বড় খুল্লী হোলাম ।

আমি বলিলাম—মিঃ শুকরামের মত সঙ্গী পেলে তো খিন্সি তো খিন্সি, উদ্ভর মেরুতে গিয়েও সুখ আছে ।

নবীনবাবু ইংরেজিতে সায়সূচক কথা বলিয়া আমায় বাংলাতে বলিলেন—স্বর্গেও যদি যাও মূলোকে নিয়ে স্বর্গের হাওয়া পর্যন্ত তেতো হয়ে উঠবে, ওকে ভাগাবার চেষ্টা কর।

মূলো বলিলে—তাহলে কখন রওনা হব আমরা, মিঃ বোস ?

—রওনা ? সে তো এখনও ঠিক হয়নি, দেখি—

—যদি বলেন আমার এক জানাশোনা গাড়ী আছে—পেট্রোলের খরচা দিলেই রাজী হয়ে যাবে। বলব তাকে ?

—বলুন না, বেশ বেশ !

আমরা সবাই বেশ উৎফুল্ল হইয়া উঠিলাম।

পরদিন মূলোর চেষ্টাতে গাড়ীর জোগাড় হইয়া গেল। আহারাди সারিয়া আমরা তিনজনে শহর হইতে চল্লিশ মাইল দূরবর্তী থিন্সি হ্রদ দেখিতে রওনা হইলাম। নাগপুর জব্বলপুর রোডের যে স্থান হইতে থিন্সি হ্রদের রাস্তা বাহির হইল, ঠিক সেই জায়গাটিতে পড়ে মান্‌সারের ম্যাঙ্গানিজ খনি।

মূলো আমাদের সঙ্গে আসিতে পাইয়া বড়ই খুশী হইয়া উঠিয়াছে এবং ভীষণ বকুনি শুরু করিয়াছে। নবীনবাবু বাংলায় বলিলেন—মূলোটা তো বড় জ্বালাচ্ছে হে ! ওকে ওই ম্যাঙ্গানিজের মাইনে রেখে গেলে কেমন হয় ?

মূলো জিজ্ঞাসা করিল—কি, মিঃ বোস ?

তাহার সব বাংলা কথার মানে জানা চাই।

নবীনবাবু উত্তর দিলেন—এই ম্যাঙ্গানিজ খনিটা ইণ্ডিয়ার মধ্যে একটা বড় খনি তাই বলছি।

নাগপুরে আমরা দুজনে আসিয়াছি বেড়াইতেও বটে, কিছু ইনসিওরের আসামী যোগাড় করিতেও বটে। সিভিল লাইনে কোতোয়াল সাহেবের বাংলা ভাড়া লইয়া যেদিনটা বারান্দায় ক্যানভাসের আরাম-কেদারা

পাতিয়া বসিয়া একটি সিগারেট ধরাইয়াছি—সেদিন এবং সেই মুহূর্তে এই লোকটি আসিয়া আমাদের সঙ্গে গায়ে পড়িয়া আলাপ করিয়াছে। একটি তরুণ যুবককে বাড়ীর হাতায় ঢুকিতে দেখিয়া আমি চেয়ার ছাড়িয়া উঠিয়া আগাইয়া গেলাম এবং ইংরেজিতে জিজ্ঞাসা করিলাম—
কাকে চান ?

যুবকটির চেহারা একহারা, দাঁত উচু, শ্যামবর্ণ, মুখে দুই একটা বসন্তের দাগ, ছোট ছোট চোখ, পরনে নিখুঁত সাহেবী পোশাক। সে একগাল হাসিয়া বলিল—আপনারা এই বাসা ভাড়া নিয়েছেন ? বাঙালী ? সে আমি দেখেই বুঝেছি। সেইজন্যই এলাম—বাঙালীর সঙ্গে আলাপ করার ইচ্ছে আমার অনেক দিন থেকে আছে।

বলিলাম—আমুন বমুন। এঁইখানেই বাড়ী বুঝি ?

যুবক পাশের চেয়ারে বসিয়া পড়িয়া বলিল—দেশ আমার যোধপুর। এখানে কলেজে পড়ি—ফোর্থ ইয়ারে।

—বেশ বেশ। একটু চা খান—

সেই হইতে ইহার যাতায়াত শুরু এমন একটি দিন যায় নাই, যোদিন ছোকরা ছুবেলা আসে নাই এবং নানাপ্রকার আলোচনার অবতারণা করে নাই। দিন কয়েক পরেই নবীনবাবু এবং আমি আবিষ্কার করিলাম যে ছোকরা কিছু স্থূলবুদ্ধি, ঠিক সকালে ও বিকেলে চা পানের আগে আসিয়া জুটিবে এবং ছপুর পর্যন্ত বসিয়া বসিয়া শুধু বকিবে—উঠবার নামটি করিবে না। বাধ্য হইয়া প্রায়ই ছপুর রাত্রে—কোন কোন দিন ছুবেলাই তাহাকে খাইতে বলিতে হইয়াছে। সে খাইয়াছেও। এড়াইয়া চলিবার চেষ্টা করিলেও সে বুঝিতে পারে না।

হয়তো নবীনবাবু বলিলেন—মিঃ শুকরাম (তাহার নাম রত্নাকর শুকরাম জৈন), ওবেলা আমরা একটু হাইল্যাণ্ড ড্রাইভে বেড়াতে যাব, বিকেলটাতে থাকব না।

—বেশ বেশ, আমি সন্ধ্যার পর আসব।

—ও তা বেশ। তবে বোধ হয় ফিরতে একটু দেরিও হবে।

না হয় আমি একটু রাত করেই আসব এখন। আপনারা অনেক উঁচু বিষয়ে কথাবার্তা বলেন—আমার শুনতে বড় ভাল লাগে। এই জন্তেই আমি বাঙালীদের সঙ্গে মিশতে বড় ভালবাসি। তা এখানে বাঙালী বেশি নেই—যারা আছেন, তাঁরা বড় মেশেন না।

এই ধরনের নিবুন্ধিতার পরিচয় দেওয়ার দরুন আমরা তাহাকে ‘মূলো’ আখ্যা দিলাম এবং তাহার সাক্ষাতে পর্যন্ত নিজেদের মধ্যে বাংলায় তাহাকে ‘মূলো’ বলিয়া উল্লেখ করিতাম। কখনও কখনও ‘মূলো’র ইংরেজি অনুবাদ করিয়া তাহার সামনেই তাহাকে ‘র‍্যাডিশ’, কখনও ‘হর্স র‍্যাডিশ’ বলিতাম। বেচারী আমাদের বাংলা কথার অর্থ একবর্ণও বুঝিত না। ‘মূলো’ কথার ইডিয়মগত অর্থই বা বুঝবে করূপে। মাঝে মাঝে আমাদের মুখে ‘র‍্যাডিশ’, ‘হর্স র‍্যাডিশ’ শুনিয়াও কিছু না বুঝিয়া হয়তো ভাবিত—ইহারা এ তিনটা কথা এত ব্যবহার করে কেন ?

আমরা আর একটি জিনিস লক্ষ্য করিলাম। ফোর্থ ইয়ারের ছাত্র বটে, কিন্তু ‘মূলো’র বিত্তাবুদ্ধির দৌড় বিশেষ নয়, একজন ভাল বাঙালী ম্যাট্রিক ছাত্র তাহার অপেক্ষা অনেক কিছু জানে। বলা বাহুল্য অবাঙালী ছাত্রদের সম্বন্ধে ধারণা স্বভাবত খুব উচ্চশ্রেণীর নয়। কলিকাতা বিশ্ববিদ্যালয় আর নাগপুর বিশ্ববিদ্যালয় ? রামোঃ, এখানে মানুষ আছে কে ?

আমাদের এই মনোভাবের পটভূমিকায় আসিয়া উপস্থিত হইলে মূলোর ন্যায় একজন স্থূলবুদ্ধি ছাত্রের যে দুর্দশা একরূপ দাঁড়াইবে আমাদের বিচারের মাপকাঠিতে ইহা আর বেশি কথা কি ?

মজার ব্যাপার এই, যাহাকে লইয়া এই ব্যাপার সে কিছুই বুঝিত না। বরং ভাবিত, আমাদের মত অমায়িক বাঙালী ভদ্রলোকদের সঙ্গে

বিভূতিভূষণ : সবস গল্প

ঘনিষ্ঠ বন্ধুত্বসূত্রে আবদ্ধ হইয়া সে লাভবান হইয়াছে। এজ্ঞ সে মাঝে মাঝে গর্বও করিত।

মূলোর মুখে শুনেছিলাম ম্যাঙ্গানিজ খনির ম্যানেজারের সঙ্গে তার আলাপ আছে। গাড়ী জব্বলপুর রোডের উপর খনির সামনে দাঁড়াইতেই সে দোর খুলিয়া ছুটিয়া গেল ম্যানেজারকে খবর দিতে। যেন আমরা লাটসাহেব আসিয়াছি মানসারের ম্যাঙ্গানিজ খনি দর্শন করিতে— এমনভাবে সে হস্তদস্ত অবস্থায় আমাদের সঙ্গে পার্চয় বরাইয়া দিল। ইনি মিঃ বোস, ইনি মিঃ রায়—বাঙালী, খুব পণ্ডিত লোক এঁরা দুজনেই। আমার বিশেষ বন্ধু।

কি মুশকিল! পাণ্ডিত্যের মধ্যে তো আমরা করি ইন্সিওরেন্সের দালালি! অবশ্য আমাদের প্রাচীন কীর্তি ও পুরাতত্ত্বের ওপর কিছু ঝোঁক আছে—কিন্তু সে ফটোগ্রাফির দিক হইতে, বিছা বা পাণ্ডিত্যের দিক হইতে নয়।

মূলোর কাণ্ড দেখিয়া আমরা মনে মনে কৌতুক অনুভব করিলাম।

ম্যানেজার নাগপুরের লোক, ছিন্দাওয়ারা জেলার আধবাসী, বেশ ইংরেজি বলে। জব্বলপুর রোডে গাড়ী দাঁড় করাইয়া আমরা প্রায় দু'শ ফুট চড়াই ভাঙিয়া খনির মুখে গিয়া পৌঁছিলাম। একটা ক্ষুদ্র ডন্কি এঞ্জিনে খাদের জল তুলিয়া লম্বা রবার ও তারের নল দিয়া পাহাড়ের পাশ দিয়া ফেলিয়া দেওয়াতে ছোটখাটো একটা জলপ্রপাতের সৃষ্টি হইয়াছে—সেটা দেখিয়া আমরা সকলে খুশী হইলাম।

ম্যানেজার আমাদের চা পান করিতে বলিলে আমরা অস্বীকার করিয়া আবার নাচে নামিয়া আসিয়া মোটরে উঠিলাম। ম্যানেজারকে যথেষ্ট ধন্যবাদ দিলাম, কষ্ট করিয়া আমাদের সব দেখাইবার জন্য। গাড়ী পুনরায় চলিল।

নবীনদা কহিলেন—মূলো বড় গণ্ডগোল করে। আমাদের নিয়ে

এমন করছিল....।

মূলো জিজ্ঞাসা করিল—কি, মিঃ বোস ?

তাহার আবার সকল কথারই মানে জানা চাই।

নবীনদা বলিলেন—চমৎকার খনিটা, তাই বলছিলাম।

—ও, তা র্যাডিশের কথা কি বলছিলেন ? এখানে তো র্যাডিশ পাওয়া যায় না !

আমরা দুজনে হো হো করিয়া হাসিয়া উঠিলাম। নবীনদা বলিলেন,
—ওটা একটা বাংলা ইডিয়ম মিঃ শুকরাম। ভাল জিনিসকে বাংলায়
আমরা মূলো বলি।

—তাই নাকি ? হাউ ইন্টারেস্টিং !

আমি বাংলায় বলিলাম,—তোমার মুণ্ড—বোকারাম কোথাকার !

নবীনদা বলিলেন—মূলো আর সাধে বলে ! একেবারে হর্স
র্যাডিশ !

রামটেকের পাহাড় বাঁদিকে রাখিয়া কিছু দূর গিয়া রিজার্ভ
ফরেস্টের নিবিড় ছায়াভরা বীথিপথে চড়াই-উৎরাই ভাঙিয়া মোটর
অপেক্ষাকৃত ধীরে চলিতেছে। শরৎ-অপরাহ্নের অপূর্ব শোভা বনতলে।
কোথায় যেন পাকা আতার গন্ধ, দু-একটা বনফুলের সুবাসের সঙ্গে
শেফালির পরিচিত সুবাস ভাসিয়া আসিতেছে বাতাসের ঝাপটায়।
এমন শোভার মধ্যে বসিয়া আমরা কিছুক্ষণের জন্ত ইন্সপেক্টরের
দালাল বিস্মৃত হইয়া গেলাম।

খিন্সি হ্রদে উঠিবার সময় পাহাড়ের পাশে ঘুরিয়া ঘুরিয়া পথ।
অনেক দূর উঠিয়া গেলে শৈলবেষ্টিত হ্রদের শান্ত জলরাশি দৃষ্টিগোচর
হয়। চতুর্দিকের শৈলসাহু ঘন বনে সমাকীর্ণ, স্থানটা নিতান্ত নির্জন।
একদিকে অপরাহ্নের ছায়া, অপর পারের পাহাড়ের গায়ে হলুদ রঙের
রোদ। হ্রদের এপারের ডাকবাংলোয় গিয়া আমরা চৌকিদারকে ডাকিয়া
চেয়ার বাহির করাইয়া বসিলাম। চৌকিদার আমাদের নির্দেশমত

বিভূতিভূষণ : সরস গল্প

চায়ের জল চড়াইতে ছুটিল।

নবীনদা ও আমি হৃদের জলে স্নান করিবার জন্ত নামিলাম। বনের মধ্যকার সরু পথ ধরিয়া ধরিয়া কতদূর নামিয়া গেলাম ছুজনে। মূলো এসব ভালবাসে না, সে ডাকবাংলোর বারান্দাতে বসিয়াই রহিল। জলের উপর বুনো শিউলি ফুলের রাশি সকালের রোদে ঝরিয়া পড়িয়াছে—হু তিন দিনের জমানো ফুলের রাশি। আমরা জলের ঢেউ দিয়া একপাশে সরাইয়া স্নান করিলাম।

নবীনদা বলিলেন,—বাঘ নেই তো ? বড্ড জঙ্গল চারিধারে—

—আশ্চর্য নয় কিছু।

—মূলোটাকে বাঘে না নিয়ে যায়। একা বসে আছে—

—কেন ড্রাইভার ?

—ও চৌকিদারের সঙ্গে গিয়েছে। বলে গেল ফিরতে আধঘণ্টা দেরী হবে, দুধ আনতে গেল। ভয়ে ভয়ে উপরে উঠিয়া দেখি মূলো নির্বিকার-চিত্তে খবরের কাগজ পড়িতেছে। নাগপুর হইতে আনা বস্ত্রে ক্রনিক্ল, আগের তারিখের। আমাদের দেখিয়া বলিল—আমেদাবাদের দুটো মিলে স্ট্রাইক হয়েছে বড় জোর—

নবীনদা আমার দিকে চাহিয়া বলিলেন—মূলোর কাণ্ড শোন— এমন একটা জায়গায় এসে ওর এখন আমেদাবাদের মিলের কথা বড্ড দরকারী হোল !

কিছুক্ষণ থাকিতে ইচ্ছা ছিল কিন্তু ড্রাইভার তাড়াতাড়ি করিতে বলিল। পাহাড়ের পথ, তাহার গাড়ীর আলোটা ভাল নাই—আমরা দেরি করিলে শেষে মুশকিলে পড়িতে হইবে।

মূলো বলিল—চলুন মিঃ বোস। আজ যাওয়া যাক, আর কি দেখবেন, দেখা তো হয়ে গেল—

নবীনদা বলিলেন—তোর মুণ্ড হোল, হতভাগা হর্স র্যাডিশ !

মূলো বলিল—কি ?

—মানে, আমাদের এখন যাওয়াই দরকার তাই বলছি।

—হোয়াট হ্যাজ হর্স র্যাভিগ টু ডু উইথ ইট ?

—বাংলা ইডিয়ম—ওর মানে মূলো খেতে যেমন ঝাল, অথচ দেখতে রাঙা তেমনি এ জায়গা যতই ভাল হোক—মানে—এই গিয়ে—

আমি নবীনদার সাহায্যে অগ্রসর হইয়া বলিলাম—ঠাণ্ডা লাগতে পারে তাই তাড়াতাড়ি যাওয়া উচিত—বাংলা ইডিয়ম। মূলো হাসিতে লাগিল। বলিল—ফ্যানি, ছোট র্যাভিগ ইজ অলওয়েজ মিক্সড উইথ ইওর বেঙ্গলি ইডিয়ম্‌স্‌।

খিন্দি হৃদের পাহাড় হইতে নামিয়া রিজার্ভ ফরেস্টের কুসুমাস্থত পথে আমরা রামটেক পাহাড়ের তলদেশে পৌঁছিলম। নবীনদার আদেশে ড্রাইভার নাগপুরের রাস্তা ছাড়িয়া বগু আতাবুক্ষ শোভিত রামটেক পাহাড়ের ঘোরানো পথ ধরিল। মূলোর এ জিনিসটা মনঃপূত হইল না। সে দু-একবার মুহু প্রতিবাদও করিল, বিশেষ কোনও ফল হইল না। আসল কথাটা আমরা জানিতাম। মিস সোরাবজি নামে একটি পার্শী তরুণীর সঙ্গে মূলো ভাব জমাইবার ব্যর্থ চেষ্টা করিতেছে আজ মাস ছ-সাত ধরিয়া। মেয়েটির বাবা নাগপুরের ডাক্তার, তাহাদের বাড়ী সন্ধ্যাবেলাটা কাটানো মূলোর অনেক দিনের অভ্যাস, যদিও মেয়ের বাপ-মা তাহা যে খুব পছন্দ করেন তাহা নয়। মূলোর মুখে শুনিয়াই বুঝিয়াছি তাঁহারা মূলোকে এমন ইঙ্গিত করিয়াছেন যে, এত ঘন ঘন সে যেন তাঁহাদের বাড়ী না আসে। কিন্তু মূলোর বুদ্ধি ও বিবেচনাশক্তির স্থূল আবরণ তাঁহারা ভেদ করিতে সমর্থ হন নাই।

পাহাড়ের নীচে গাড়ি রাখিয়া সিঁড়ি বাহিয়া উপরিস্থিত রামসীতার মন্দিরে উঠিতেছিলাম।

মূলো বলিল—মিঃ রায়, একদিন মিস সোরাবজি বলেছিল রামটেকের মন্দির দেখবে, বড় ভাল হোত যদি আজ আসিতাম।

নবীনদা আমার গা টিপিলেন। আমার হাসি পাইতেছিল, অতি

কষ্টে চাপিলাম !

পাথরে বাঁধানো অনেকগুলি সিঁড়ি ভাঙিয়া উপরে উঠিলাম । সিঁড়ির দু-ধারে অসংখ্য বগ্ন আতা, পড়াসি ও তিন্দুক গাছের নিবিড় বন । ডান দিকে অনাবৃত পর্বতগাত্র হেলিয়া থাকিয়া দৈত্যপুরীর মাইল-স্টোনের মত দেখাইতেছে । সন্ধ্যার ধূসর ছায়ামাখা নিস্তরুতার মধ্যে পেশোয়াদের নির্মিত এই শৈলমন্দির দুর্গটি ভারতের অতীত গৌরবের বার্তা বহন করিয়া আনিয়া দিতেছিল আমাদের কানে কানে । শুধু সে গান্ধীর্থময় নিস্তরুতার তপোভঙ্গ হইতেছিল মূলোর অসম্ভব বকুনি দ্বারা । উপরে উঠিয়া আমরা বিগ্রহ দর্শন করিলাম । সামান্য কিছু প্রসাদ ও চরণামৃত পাইলাম । উঁচু পাহাড়ের উপর মন্দির, অনেক নীচে একদিকে রামটেকের বাজার ।

মূলোর প্রতি আমাদের শ্রদ্ধা হইত, যদি সে এখানে আসিয়া মিস সোরাবজি সম্বন্ধে কিছু বলিত—আমরা ভাবিতাম লোকটার প্রাণে তবুও কবিত্ব আছে । কিন্তু মন্দির-দুর্গের চওড়া প্রাচীরের উপর বসিয়া আমরা যখন দূরের জ্যোৎস্নালোকিত খিন্‌সি হ্রদের দিকে চাহিয়া আছি, মন্দিরে প্রাচীন মারাঠী পুরোহিত রামসীতার আরতি করিতেছেন, পেশোয়াদের আমলের প্রথামুযায়ী আরাতির সময় গম্ভীর নিঃশ্বাসে রণবাত্ত দামামা ও ডগর বাজিতেছে, ঐদিকে বহুদূরে কাম্‌টি ক্যান্টনমেন্টের ক্ষীণ সারি, তখন যদি সে তাহার প্রণয়িনীর কথা তুলিত—আমরা ভাবিতাম এই রামগির আশ্রমে জনকতনয়ার স্নান হেতু পুণ্যোদকের স্পর্শে হর্স র‍্যাডিশ বুঝি কালিদাসের বিরহী যক্ষের দশা পাইয়া বসিল । কিন্তু তাহা হইবার নয়, সে মহাডুধরে গল্প জুড়িয়া দিল—দেশের এক মিউনিসিপ্যাল কমিশনারকে সে কি করিয়া ভোট যোগাড় করিয়া দিয়াছিল । তাহা হইতে নামিল তাহাদের দেশে কি করিয়া ‘ফুটেরি’ তৈরি করে । আমরা কহিলাম—ফুটেরি কি ?

মূলো হাত দিয়া গোলাকার জিনিস দেখাইবার ইঙ্গিতে বলিল—এই

এত বড় বড়, আটার তৈরি, ভেতরে ছাতু, যুঁটের আগুনে সেকে ঘি দিয়ে খায়। আলুর চোখা আর বেগুনের ভর্তার সঙ্গে ।

নবীনদা বলিলেন—মূলোর সঙ্গে নয় ?

—নো, র্যাডিশ ইজ নট ইট্‌ন্—

—আশ্চর্য !

—হোয়াই আশ্চর্য ? র্যাডিশ ইজ মাচ রেলিশ্‌ড্ ইন বেঙ্গল ইট্‌
সিম্‌স্—বাট নট মো ইন আওয়ার কাণ্টি ।

—বুঝলাম ।

—আচ্ছা, এই দুর্গের পাঁচিলটা এত চওড়া কেন ?

মূলোর স্থূল বুদ্ধিতে আর কতটুকু বোঝা সম্ভব ? তাহাকে বুঝাইয়া দিলাম, পেশোয়াদের সময়ে এই মন্দিরটি দুর্গের মত করিয়াই তৈরি হয়—আসিবার পথে অতগুলি ফটক দেখিয়া তাহা সে নিশ্চয়ই কিছু আন্দাজ করিয়াছে । পেশোয়া বালাজি বিশ্বনাথ এই মন্দির-দুর্গ নির্মাণ করিয়া এখানে একটি গুপ্ত ধনাগার স্থাপন করেন । আকস্মিক রাষ্ট্র-বিপ্লবের দিনে নাগপুর হইতে বিশ-বাইশ ক্রোশ দূরবর্তী এই অরণ্যাবৃত পাহাড়ের চূড়ায় রামসীতার মন্দিরে তাঁহার ধনভাণ্ডার অনেকটা নিরাপদ থাকিবার ভরসাতেই এটি নির্মিত হয় । বিশেষত তখনকার যুগে না ছিল রেল, না ছিল এখনকার দিনের মত চওড়া মোটর রোড ! রাম-টেকের পাহাড় ছিল দুর্গম অরণ্যভূমির অন্তরালে—শত্রু সন্দেহ করিবে না যে জঙ্গলের মধ্যে কোথায় কোন্ পাহাড়ে রামসীতার মন্দির—সেখানে আবার ধনভাণ্ডার থাকিতে পারে । তবুও সাবধানের মার নাই ভাবিয়া বালাজি বিশ্বনাথ মন্দিরটিকে দুর্গের মত করিয়াই নির্মাণ করেন—মন্দিরকে মন্দির, দুর্গকে দুর্গ । আবশ্যক হইলে কিছুকাল ধরিয়া এখানে শত্রুর আক্রমণ প্রতিহত করাও চলিতে পারিত । জঙ্গলের অভাব দূর করিবার জন্য পাহাড়ের নীচে একটি পুষ্করিণী খনন করা হয়—আসিবার সময় যে পুকুরটা ডান দিকে পড়িয়াছিল । মূলো আমার মুখে রামটেকের

বিভূতিভূষণ : সবস গল্প

ইতিহাস শুনিয়া কিছুক্ষণ চুপ করিয়া রহিল। পরে বলিল—আপনি এসব নিয়ে খুব নাড়াচাড়া করেছেন দেখছি, বহুৎ পড়াশুনো করেছেন। এইজন্তেই তো বাঙালীদের আমি বড় ভালবাসি—বাঙালীর সঙ্গে আলাপ করলে আমার মন বড় খুলী হয়।

মন্দিরের আরতি থামিয়াছিল। আমি বলিলাম—এখানে একটা অস্ত্রাগার আছে বইয়ে পড়েছি—চলুন সেটা দেখে আমি সবাই, এখনও আছে বলে জানি।

মন্দিরের পুরোহিত বৃদ্ধ রংড়ে ব্রাহ্মণ, পূর্বেই পরিচয় পাইয়াছিলাম। তিনি প্রথমে আপত্তি তুলিলেন, রাতে অস্ত্রাগার দেখানোর নিয়ম নাই—অবশেষে আমাদের নিতান্ত নাছোড়বান্দা দেখিয়া, বিগ্রহ যেখানে থাকেন তাহার পাশের একটা কুঠুরি খুলিয়া দিলেন। আমরা টর্চের আলোয় সেখানে মারাঠী যোদ্ধাদের প্রকাণ্ড চওড়া ছুধার তলোয়ার, সাতহাত লম্বা বন্দুক, বিশাল ঢাল, লোহার জালের টুপি ও বর্ম, নানা রকমের তীর, আরও কত কি অস্ত্রশস্ত্র দেখিলাম। যোদ্ধাজাতির যুদ্ধের উপকরণ পাঁচ রকম থাকিবে—ইহার মধ্যে আশ্চর্য হইবার কিছু নাই। প্রশংসার ভাব মনে জাগিত হয়তো, যদি বগির হাঙ্গামার কথা মনে না উঠিত।

মূলো বলিল—এ আর কি, যোধপুর ওল্ড ফোর্টে একটা মিউজিয়াম আছে, সে এর চেয়ে অনেক বড়।

কোন কিছু দেখিয়া আশ্চর্য হইবার ক্ষমতা একটা বড় ক্ষমতা—এ ক্ষমতা সকলের থাকে না, মূলোর মধ্যে তাহা থাকিবার আশা করি নাই; সুতরাং বিস্মিত হইলাম না।

নবীনদা বলিলেন—আপনাদের দেশে যোধপুরে একবার নিয়ে যাবেন আমাদের? অস্ত্রাগার দেখে আসব।

—নিশ্চয়ই। ইন ফ্যাক্ট, আমাদের নিজ বাড়ীতেই একটি অস্ত্রাগার আছে, আমার পূর্বপুরুষের আমলের।

—বলেন কি মিঃ শুকরাম !

—হাঁ। আমার অতিবৃদ্ধ প্রপিতামহ ছিলেন আওরঙজেবের আমলের লোক। তাঁর নাম—আচ্ছা নোটবুক দেখে বলব। আমরা হলাম ডোগরা রাজপুত—ওয়ারিয়ান ক্ল্যান ডোগরা রাজপুত জানেন তো ? আমাদের সেই পূর্বপুরুষ, তিনি লড়েছিলেন জয়সিংহের সৈন্যদলে। এখনও অস্ত্রাগারের পূজো হয় আমাদের বাড়ী। ধূপধূনো জ্বালাতে হয়, সিঁদুর মাখাতে হয়—

নবীনদা বাংলায় বলিলেন—সাবাস মূলো ! ডোগরা রাজপুত হয়ে মরতে এসেছ কেন ইউনিভার্সিটির ডিগ্রি নিতে ? ও কি তোমার হবে ?

আমিও বাংলায় জবাব দিলাম—বিষ হারিয়ে টোঁড়া, মূলোর ছু-কূলই গিয়েছে। অস্ত্র ধরবার ক্ষমতা নেই, লেখাপড়ারও বুদ্ধি নেই—একে বলে হর্স র্যাডিশ।

মূলো বলিল—কি ?

নবীনদা বলিলেন—কি রকম বড় বংশে জন্ম আপনার তাই বলছি—ডোগরা রাজপুত যোদ্ধা, জাত কিনা !

মূলো বলিল—যাক, মিঃ বোস, একটু চা খাওয়ার জোগাড় হয় না ? চা না খেলে আর তো চলে না।

মন্দির হইতে নামিয়া রামটেকের বাজারে চায়ের দোকানে চা পান করিয়া নাগপুরে ফিরিলাম। এত ভাল ভাল জিনিস যে সারাদিন ধরিয়া দেখিলাম মূলো সেসব সম্বন্ধে একটি কথাও বলিল না। তাহার যতসব বাজে গল্প আর অনবরত বকুনির জগু আমরা নিজেদের মধ্যে কিছু আলোচনা করিবার অবকাশ পাইলাম না।

পরদিন সকালবেলা মূলো আসিয়া হাসি মুখে বলিল—আপনাদের ওবেলা আমার সঙ্গে যেতে হবে।

বিভূতিভূষণ : সবস গল্প

জিঙ্গেস করিলাম—কোথায়?

—মিস সোরাবজির বাড়ীতে চায়ের নিমন্ত্রণ।

—আমরা কেন?

—আপনাদের নিয়ে যাবার জন্তে আমাকে অনুরোধ করেছেন ওঁর বাবা।

আমরা বিকালে সাজগোজ করিয়া বসিয়া আছি, মূলো আর কিছুতেই আসে না। নবীনবাবু বলিলেন—ওহে, মূলোটোর মতলব শুনে আমাদের হাইল্যাণ্ড ড্রাইভে বেড়াতে যাওয়া বন্ধ হয়ে গেল দেখছি। ও এল না।

এমন সময় মূলো আসিয়া হাজির হইল—সে নিখুঁত সাজপোশাক করিয়া কোটের বোতামে গোলাপ ফুল গুঁজিয়া রুমালে এসেন্স ঢালিয়া আসিয়াছে এবং বোঝা গেল যে, সে কিছু পূর্বে নাপিতের দোকান হইতে চুলও কাটিয়া আসিয়াছে।

মিস সোরাবজির পিতা এখানকার ডাক্তার। পূর্ব হইতেই তাঁহার সহিত আমাদের পরিচয় ছিল—বন্ধ অতি অমায়িক লোক। দেখিলাম তিনি শুধু আমাদের তিনজনকে চা-পার্টিতে নিমন্ত্রণ করিয়াছেন তাহা নহে, শহরের আরও আট-দশটি ভদ্রলোককে বলিয়াছেন—তাঁহার পুত্রের জন্মতিথি উৎসব চা-পার্টির আসল কারণ।

মিস সোরাবজি আঠার-উনিশ বছরের একহারা মেয়ে, আমরা তাহাকে অনেকবার দেখিয়াছি। খাঁড়ার মত উঁচু সূচাল নাকের জন্ত কোনদিনই মিস সোরাবজিকে বিশেষ সুন্দরী বলিয়া আমার মনে হয় নাই—যদিও রং বেশ ফরসা ও গলার সুর কষ্টকৃত মেমসাহেবিয়ানার দোষমুক্ত না হইলেও মন্দ নয়। মেয়েটি নাকি লেখাপড়াতে ভাল।

একটা জিনিস লক্ষ্য করিলাম আমরা দুজনেই। মিস সোরাবজি মূলোর প্রতি বিশেষ আকৃষ্ট—অস্তুত হাবভাবে আমাদের তাহাই মনে হইল। বাহিরের বারান্দায় দুজনে নির্জনে মাঝে মাঝে যাইয়া দাঁড়াইতে

লাগিল। মূলোর এতটুকু ইচ্ছাও যেন মিস সোরাবজি তখনই পূর্ণ করিতে ব্যগ্র। অতিথির প্রতি যতটুকু কর্তব্য করা উচিত শেষ করিয়া মেয়েটি মূলোকে লইয়া সব সময় ব্যস্ত রহিল।

চা-পাটি হইতে ফিরিবার পথে মূলো কি আমাদের ছাড়ে—সঙ্গে সঙ্গে আসিল!

কিন্তু তাহার যা স্বভাব—মিস সোরাবজি সম্বন্ধে একবারও একটি কথাও বলিল না। চা-পাটির কথাই যেন তাহার মন হইতে মুছিয়া গিয়াছে এটুকু সময়ের মধ্যে।

নবীনদা বাংলায় বলিলেন—বাঁদরের—বাঁদরের গলায় মুক্তোর মালা! কলেজের বেশ ভাল মেয়ে বলে শুনেছি—র্যাডিশটার মধ্যে কি পেলে খুঁজে!

দু দিন মূলো কি জানি কেন আমাদের বাংলাতে আসিল না। তৃতীয় দিন সকালবেলা একখানা মোটরগাড়ী বাসার সামনে দাঁড়াইতেই আমি আগাইয়া গেলাম—নবীনদা তখন বাসায় নাই। মোটর হইতে নামিলেন ডাঃ সোরাবজি। আমাকে ডাকিয়া বলিলেন—শুকরামকি এখানে এসেছিল? একটা জরুরী কথা আছে। আপনারা ওকে কত দিন জানেন?

—খুব বেশি দিন নয়। কেন বলুন তো?

—ও আমার কাছে কিছু বলে না। কিন্তু আমার মেয়ের কাছে বিবাহের প্রস্তাব করেছে। আমি ওকে বাড়ী ঢুকতে দেব না। ওকে আপনারা বারণ করে দেবেন।

মূলোর হইয়া ওকালতি করিবার ইচ্ছা হইল। বলিলাম—ওকে কি উপযুক্ত পাত্র বলে বিবেচনা করেন না?

ডাক্তার সোরাবজি রাগের সঙ্গে বলিলেন, ও একটা লোফার—ওর সঙ্গে আমাদের মেয়ের বিয়ে হবে কেন? ওরা হল ভোগরা—আমি

বিভূতিভূষণ : সরস গল্প

আর্মিতে ছিলাম, ওরা সেখানে সাধারণ সেপাই এর কাজ করে ;
সুবাদার হতে কাটকে দেখি নি। কেন জানেন ?

বলিলাম—কি ?

—খুব সাহস আছে, যা বলবেন তাই করবে—কিন্তু—

বলিয়া ডাক্তার সোরাবজি আঙুল দিয়া নিজের মাথায় ছু-তিন-
বার টোকা দিয়া ঘাড় নাড়িলেন।

—তাহলে বলে দেবেন দয়া করে।

—আজ্ঞে ওটা বলা আমাদের পক্ষে একটু শক্ত, বুঝতেই পারেন।

—আমি বললে একটু রুঢ় হয়ে যাবে।

—কিন্তু একটা কথা বলি যদি কিছু মনে না করেন—মিস
সোরাবজির মনোভাব কেমন মিঃ শুকরামের ওপর, সেটা একবার—

—সে বিষয়ে নিশ্চিন্ত থাকুন। ওর মত একটা বাজে অপদার্থ
লোকের হাতে মেয়ে দেব ? ও কোনওকালে বি-এ পাশ করতে
পারবে ? কোনদিন নয়। আমার মেয়ে অনার্স ক্লাসের ছাত্রী, সকলের
চেয়ে ভাল ছাত্রী—ওর সঙ্গে তার বিয়ে ! হাসির কথা।

পরদিন সকালে মূলো আমার কাছে আসিয়া গোপনে বলিল, মিঃ
রায়, সব ঠিক হয়ে গেল।

—কি ঠিক হয়ে গেল মিঃ শুকরাম ?

—জালুর সঙ্গে বিয়ের। অবিশিষ্ট ওর সঙ্গেই কথা হোল—ওর বাবা
এখনও জানেন না।

—খুব খুশী হলাম শুনে। তবে ডাক্তার সোরাবজিকে একবার
বলুন।

—সে হয়ে যাবে। তা—বললেও হয়।

নবীনদা শুনিয়া বলিলেন—বাঁদরের গলায় মুক্তোর হার—মূলোর
সঙ্গে অমন একটি চমৎকার মেয়ের বিয়ে।

ইতিমধ্যে মূলোর পরীক্ষা পড়িল—সে বি-এ পরীক্ষা দিয়া কিছু-

দিনের জন্ত দেশে গেল। আমাদের বার বার অনুরোধ করিয়া গেল, আমরা যেন তাহাকে না ভুলি—চিঠি দিলে যেন উত্তর দিই।

দুই মাস কাটিয়া গেল।

হঠাৎ একদিন আমাদের অত্যন্ত আশ্চর্য করিয়া দিয়া ডাক্তার সোরাবজি তাঁহার কন্যার বিবাহে আমাদের নিমন্ত্রণ করিয়া গেলেন। শুনিলাম পাত্র পুণার মেডিকেল অফিসার, আই এম এস পদবীর লোক। মোটা বেতন পান।

আমরা বন্ধুর প্রতি কর্তব্য স্মরণ করিয়া বলিলাম,—ও, আমরা জানতাম মিঃ শুকরাম—

বৃদ্ধ ডাক্তার রাগত-ভাবে বলিলেন, সে একটা লোফার, আগেই বলেছি। গেজেটটা দেখেছেন? তার নাম খুঁজে দেখবেন কোথাও নেই। আর আমার মেয়ে ফাস্ট ক্লাস অনার্স পেয়েছে।

আমরা সত্যিই চুঃখিত হইলাম মূলোর জন্ত।

এত কথার পর বিকেলে যখন মূলো আসিয়া জানাইল মিস সোরাবজি ও আমাদের লইয়া সে পরদিন পিকনিকে যাইবে, তখন আশ্চর্য হইয়া গেলাম। নবীনদা হাঙ্গামায় পড়ার ভয়ে প্রথমটা যাইতে চাহিলেন না—কিন্তু শেষে যখন মূলোর মুখে শুনিলাম, মিস সোরাবজির ভাইও এই সঙ্গে যোগ দিবে তখন আমাদের যাইতে কোন আপত্তি রহিল না।

গোরেওয়াড়া হ্রদের ধারে পিকনিক ঠিক হইয়াছিল। পরদিন সকালে দল বাঁধিয়া ছুখানা মোটরে হ্রদের ধারে পৌছিলাম। নাগপুরের পাহাড়ের মধ্যে যতগুলি হ্রদ আছে এটি সর্বাপেক্ষা বড়, দৃশ্যও চমৎকার। আমরা উত্তর পাড় ধরিয়া হ্রদের ওপারে অল্প পাহাড়ের তলায় বড় বড় তিন্দুক গাছের ছায়াতে আমাদের বনভোজনের স্থান নির্দেশ করিলাম। মিস সোরাবজির ভাইটির বয়স চোদ্দ-পনেরর বেশি নয়,

বিভূতিভূষণ : সরস গল্প

বালক মাত্র—তাহার মনে দেখিলাম খুব ফুটি, হৃদের জলে সাতার কাটিবার জ্ঞতা সে স্নানের পোশাক পর্যন্ত সজে করিয়া আনিয়াছে।

মিস সোরাবজি মেয়েটিকে ঠিক বোঝা কঠিন। এদিনও দেখিলাম মূলোর প্রতি তাহার যথেষ্ট আকর্ষণ, তাহার এতটুকু সুখ-সুবিধার জ্ঞতা মেয়েটির কি উদ্বেগ। অবশ্য আমাদের দুজনের সঙ্গেও সে ভাল ভাবেই মিশিল। এতটুকু অহংকার নাই, বাঙালী মেয়ের মতনই সরলতা, পরের সুখ-সুবিধা দেখার অভ্যাস, নিজের হাতে সেবা করিবার ঘোঁক। সে যে বি-এ ক্লাসের ভাল ছাত্রী তাহার কথাবার্তা হইতে এতটুকু তাহা বুঝিবার উপায় নাই।

আমাকে বলিল—মিঃ রায়, একটা বাংলা গান করুন না ?

আমি গান গাহিতে ভালই পারিতাম। এখন চর্চার অভাবে গলায় সুর নাই—সে আপত্তি বলা বাহুল্য টিকিল না, পর পর তিনটি রবীন্দ্রনাথের গান গাহিতে হইল। বাঙালী সমাজ নয়, বিশেষত কলিকাতা হইতে বহুদূরে, কাজেই তুল ধরিবার কেহ নাই—বেপরোয়া হইয়া গাহিলাম। প্রশংসাও অর্জন করিলাম মূলো ও মিস সোরাবজির কাছে।

মূলো বলিল—ওয়াগ্গারফুল। এমন গান যে আপান গাইতে পারেন, তা জানতাম না বাস্তবিক।

মিস সোরাবজি বলিল—টাগোরের কবিতা মুখস্থ আছে ?

—হু-একটা—

—আবৃত্তি করুন না ! আমাদের কলেজে মিঃ সেনের মেয়ে এক-বার করেছিল, বড় ভাল লেগেছিল আমার।

‘জীবনদেবতা’ কবিতাটি মুখস্থ ছিল ভাল, আমার মুখে শুনিয়া মিস সোরাবজি উচ্ছ্বসিত সুরে বলিল—ভারি সুন্দর !

তাহার পর সে তাহার শুভ্র গ্রীবাটি ঢুলাইয়া আবদারের সুরে বলিল—মিঃ রায়, আর একটা আবৃত্তি করবেন দয়া করে ?

—আগে আপনি একটা ইংরেজি আবৃত্তি করুন।

—করবেন তাহলে ?

মিস সোরাবজির খড়্গের মত সূক্ষ্ম ও উগ্র নাসিকাকে ক্ষমা করিলাম, মেয়েটি অত্যন্ত চালবিহীন ও অমায়িক, তখনই সে ব্রাউনিঙের ‘বৈয়াকরণের শব্দাত্মা’ নামে বিখ্যাত কবিতাটি সুন্দরভাবে আবৃত্তি করিয়া আমাদের মুগ্ধ করিল।

পুনরায় আমাকে একটি রবীন্দ্রনাথের কবিতা আবৃত্তি করিতে হইল। এবার হাত-মুখ নাড়িয়া শিশির ভাঙুড়ীর অনুকরণে ‘বন্দীবার’ আবৃত্তি করিয়া, ইংরেজিতে ভাবার্থ বুঝাইয়া দিলাম। পূর্বের কবিতাটি অপেক্ষা এইটিই মিস সোরাবজির বেশি ভাল লাগিয়াছে, তাহা তাহার কথার সুরে ও চোখ-মুখের ভাবে আমার বুঝিতে দেরি হইল না। আমায় বলিল—দেখুন মিঃ রায়, টাগোরের কবিতার ইংরেজি অনুবাদ পড়েছি কিন্তু বাংলা ভাষার ধ্বনি আর ঝংকারের মধ্য দিয়ে যে ওসব কাবতা এমন চমৎকার শোনায়, তা আমি আজ এই প্রথম জানলাম। এর আগে একবার বাংলা আবৃত্তি শুনেছিলাম কলেজে, সে তেমন কিছু নয়। আমার বাংলা শেখার বড় ইচ্ছে, কি করে শেখা যায় বলতে পারেন ?

মূলো দেখিলাম খুব খুশী হইয়াছে—কবিতা শুনিয়া নয়, কারণ সে সূক্ষ্ম রসবোধ তাহার ছিল না—বাংলা কবিতা ও প্রকারান্তরে বাঙালীর প্রশংসা করা হইতেছে এইজন্ত। লোকটা অন্ধ বাঙালীভক্ত।

বলিল—জালু, তুমি মিঃ রায়ের কাছে কেন বাংলা শেখ না ? বেশ ভাল হবে—

মিস সোরাবজি পুনরায় আবদারের ভঙ্গিতে তাহার স্মৃষ্টাম গুত্র গ্রীবাটি ঢুলাইয়া বলিল—শেখাবেন আমাকে মিঃ রায় ? আমি রোজ আপনার বাসায় আসব এক ঘণ্টা করে ?

মূলো পরম উৎসাহের সুরে বলিল—হ্যাঁ হ্যাঁ বেশ, বেশ !

নবীনদা বাংলায় বলিলেন—ওর তাহলে বড় সুবিধে হয়, ছুবেলা দেখা হয় কিনা। মূলোর কাণ্ড দেখ—সাধে কি বলে হর্স র্যাডিশ !

মূলো মিস সোরাবজির সঙ্গে কথা কহিতে অগম্যনস্ক ছিল, নবীনদার বাংলা কথা শুনিতে পাইল না—নতুবা বলিত, হোয়াট। কি বললে বাংলাতে ?

আমি ভক্ততা বজায় রাখিয়া বলিলাম—শেখালে তো বেশ হোত—কিন্তু আমাদের সময় নেই কিনা। দুজনকে টো টো করে সারাদিন নিজের কাজে বেড়াতে হয়, নইলে এ তো বড় আনন্দের কথা।

আমরা গোরেওয়াড়ার জলে নামিয়া সবাই স্নান করিলাম, মিস সোরাবজি পর্যন্ত। ছপুর ঘুরিয়া গিয়া একদিকে ছায়া পড়িয়াছে—এখনও সেদিনকার সেই দিনটি চোখের সামনে যেন ভাসিতেছে—একদিকে অল্প কালো পাথরের পাহাড়, অল্পদিকে শিউলি ও তিন্দুক গাছের সারি, দু-দশটা বড় বড় শালও আছে। আকাশে খর রৌদ্র, ছপুরের রোদে ঝক-ঝক করা চোখ-ঠিকরানো ছোট ছোট ঢেউ-এর সারি হ্রদের বুকে, অথচ এপার অনেকখানি ছায়াসিক্ত। আঁটসাঁট স্নানের পোশাকে শুভ্রদেহ কৃশাঙ্গী ভেনাসের মত পার্শী তরুণী জালু শৈল-বেষ্টিত হ্রদের নীল জল হইতে উঠিতেছে—দূরে ওপারে গোরেওয়াড়ার উঁচু পাড়ের উপর একটা বাংলা ধরনের বাড়ী, বোধ হয় এক ডাক-বাংলো।

আমরা রান্না করিয়া স্নান করিতে গিয়াছিলাম, মিস সোরাবজির নিজের হাতে রান্না ভাত ও ডাল, কিছু মাংস, দু'একটা ভাজা। পার্শী ধরনের হুন দিয়া রান্না ভাত ও মশলাবিহীন সাদা রঙের মাংসের স্টু ও বেশনে টোমাটো ভাজা—সবগুলিই আমার মুখে সমান অখাদ্য। ভাগ্যে বুদ্ধি করিয়া নবীনদা কিছু আচার আনিয়াছিলেন—তাই দিয়া গ্রাস কয়েক ভাত খাওয়া গেল। মূলো পোষা কুকুরটির মত মিস সোরাবজির পিছনে পিছনে ঘুরিতে লাগিল এবং তাহার রান্নার প্রশংসায়

পঞ্চমুখ হইয়া উঠিল।

একটা জিনিস লক্ষ্য করিবার মত বটে—দেখিলাম তাহার বাঙালী-প্রীতি তাহার প্রণয়িনীর প্রতি ভালবাসা অপেক্ষা কম নয়। বাঙালীর সব-কিছুর সে আজ ভক্ত, আমাদের কত কি ব্যাপারের প্রশংসা সে শতমুখে যদি বলিতে পারিত তাহার প্রণয়িনীর নিকট—তবে যেন তাহার তৃপ্তি হইত। বলিল, জান জানু, ওঁরা বাংলাতে মূলো কথার বড় ব্যবহার করেন, প্রায়ই ওঁরা বলেন র্যাডিশ—আমি শিখে নিয়েছি, একটা বাংলা ইডিয়ম, মানে ‘খুব ভাল’।

নবীনদা অল্পক্ষণে বলিলেন, মরেছে হতভাগা !

মিস সোরাবজি আমাদের দিকে চাহিয়া কৌতূহলের সুরে বলিল—
ও, হাউ ইণ্টারেস্টিং। সত্যি মিঃ রায়—আপনারা বুঝি—ইত্যাদি।

মেয়েটিকে যা তা বুঝাইয়া ও অল্প কথা পাড়িয়া চাপা দিলাম জিনিসটা।

বেল। তিনটার সময় আমাদের নোটর নাগপুর হইতে ফিরিয়া গোরেওয়াড়ার ওপারে আসিয়া ভেঁপু দিল। সকালে পৌছাইয়া দিয়া গাড়ী ছুখানা চলিয়া গিয়াছিল। আমরা যাওয়ার উত্তোষ করিতে মিস সোরাবজি বলিল—সূর্যাস্তটা দেখে যাবেন না ?

—ওদিকে দেরি হয়ে যাবে ফিরতে—আপনার বাবা কি ব্যস্ত হয়ে উঠবেন না ?

—কিছু না মিঃ রায়, ভাববেন না। আমি বলে এসেছি—আমি ওই পাথরের ওপার থেকে দেখব সূর্যাস্তটা। তুমি এস না শুকরাম।

—যেমন ইচ্ছে আপনার। শীগগির আসবেন।

অদ্ভুত সূর্যাস্ত। এখানে আসিয়া অবধি হাইল্যাণ্ড ড্রাইভ হইতে সাতপুরা শৈলমালার দিকে প্রায়ই দেখিতেছি। সন্ধ্যার ছায়া নামে, আমি সামান্য শৈত্যের জন্ম গরম আলোয়ান ভাল করিয়া গায়ে টানিয়া দিই, হাইল্যাণ্ড ড্রাইভে সাহেব মেমদের মোটরের ভিড় বাড়ে,

বিভূতিভূষণ : সরস গল্প

আশ্বাসিরি লেকে পার্কে দলে দলে সুসজ্জিতা নরনারীরা বেড়াইতে আসিতে আরম্ভ করে, আমি বড় একটা শাল গাছের তলায় নির্জন প্রস্তরখণ্ডে বসিয়া দেখি ধীরে ধীরে সাতপুরা শৈলশ্রেণীর আড়ালে লাল সূর্যটা নামিয়া পড়িতেছে। আজও দেখিলাম গোরেওয়াড়া হ্রদের বিস্তীর্ণ জলরাশি যেন আবীর-গোলা টকটকে লাল। যেমন সূর্য অস্ত গেল, অমনি চারিদিকে ঘনছায়া নামিল, মোটর হুথান। অধীরভাবে ভেপু বাজাইতে লাগিল, বাহুড়ের দল পাহাড়ের দিকে ফিরিতে লাগিল, ক্রমে ছায়া ঘন হইয়া অন্ধকার নামিল।

নবীনদা বলিলেন—কই, মিস সোরাবজি কোথায় ?

—এই তো ছিল, সূর্যাস্ত ভাল দেখা যাবে বলে পাথরটার ওপারে গিয়েছে বোধ হয়।

এমন সময় মূলের সঙ্গে মিস সোরাবজি পাথরের ওপাশের ঘাট থেকে উঠিয়া আসিল। উভয়েই স্নান করিয়া আসিল। এই অবেলায়, দেখিয়া আশ্চর্য হইলাম।

মূলো কৈফিয়তের সুরে বলিল—বড় গরম, তাই জালু বললে, বেশ স্নান করা গেল।

নবীনদা বাংলায় বলিলেন—তার পর তোমার জালুর নিউমোনিয়া হলে তার বাবা দেখে নেবে তোমাকে—মূলোগিরি খাটবে না তখন—

মূলো বলিল—কি ?

আমি উত্তর দিলাম, জালু নামটা বড় চমৎকার ! মিঃ বোসের মতে। অবশ্য আমারও সেই মত।

মিস সোরাবজি সলজ্জ হাসিয়া মেমসাহেবী সুরে বলল—ও ইউ হরিড ক্রিচার্স !

আমরা গাড়ীতে উঠিয়া চলিলাম।

সাউথ টাইগার গ্যাস রোডের কিছু পূর্বে পাহাড়ী ঢালুতে অনেক বনশিউলি ফুল ফুটিয়া আছে দেখিয়া মেয়েটি বলিল—ও মিঃ রায় কি

চমৎকার ফুল ফুটেছে ! শেফালি—না ?

—মোটর থামাইয়া মূলো গোটাকয়েক ভাল ভাঙিয়া আনিল। তখন সন্ধ্যা হইয়াছে, জ্যোৎস্নার ক্ষীণ লেশ মাটির বুকে। সাউথ টাইগার গ্যাস রোডের এদিকটা নির্জন, এ সময় খুব বেশী লোকজন নাই। হঠাৎ মেয়েটি বলিল—চলুন, আশ্বাসিরি লেক দেখে আসি। এ জ্যোৎস্নায় বেশ লাগবে

আমরা সকলেও হতবুদ্ধি। আশ্বাসিরির দিকে যাইতে হইলে আবার পাহাড়ে উঠিতে হইবে। বপদে ফেলিল দেখিতেছি খেয়ালী পাশী মেয়েটা। কি করা যায়, সুন্দরী তরুণীর আবদার উপেক্ষা করিবার সাধ্য নাই আমাদের—মোটর ঘুরাইয়া আবার সবাই পাহাড়ে উঠিয়া আশ্বাসিরির দিকে ছুটিলাম। সেখানে লেকের ধারে পার্কে বিভিন্ন বোধ্যতে তখনও কেহ কেহ বসিয়া আছে। ক্রমে সুন্দর জ্যোৎস্না উঠিয়া হৃদের জলে পড়িয়া সোদনকার খন্স লেকের স্মৃতি মনের মধ্যে আনিয়া দিল। পাহাড়ের উপর ছ ছ ঠাণ্ডা বাতাসে সমস্ত শরীরে কাপুনি ধরিল। জনাবরল হৃদ-তরের পার্কটিতে দূরে দূরে দু-একটি নরনারী বেড়াইতেছে। ঠাণ্ডা লাগার ভয়ে সবাই নামিয়া চলিয়া গিয়াছে বলিয়াই আরও চমৎকার লাগিতোছিল, নতুবা সাধারণত আশ্বাসিরিতে বিকালের দিকে বড় ভিড় থাকে।

মিস সোরাবজিকে বলিলাম—কেমন লাগছে ?

সে মেমসাহেবী সুরে সরু মিষ্টি গলায় টানিয়া বালল—ও, ইটুজ ফাইন !

‘ফা’ হইতে ‘ন’ পর্যন্ত টানিয়া সুরের নামা-ওঠা করিয়া উচ্চারণ করিতে প্রায় পাঁচ সেকেন্ড সময় লইয়া মধুর ধরনে গ্রীবা বাঁকাইয়া মুছ হাসির সঙ্গে কথাটা বলিল। এই তো কলেজের ছাত্রী, কতই বা বয়স, কুড়ি-একুশের বেশি নয়—এ সব শিখিল কোথা হইতে কে জানে। নবীনদা অত্যাঁদকে মুখ ফিরাইয়া বাংলায় বলিল—মেয়েটার আবার

ভাবন দেখছ ?

আমিও বাংলায় বলিলাম—আমেরিকান ফিল্ম থেকে হলিউডের অ্যাকট্রেসদের সুর নকল করেছে কষ্ট করে। গলা মিষ্টি বলে মানিয়েছে।

মূলোর মনে কোনও কবিত্ব নাই। সে দেখিলাম মেয়েটির সহিত সূতা ও চরকা-কাটা সম্পর্কে কি কথা বাঁলতেছে। মিস সোরাবজি আমার কাছে আসিয়া বলিল—একটা কবিতা বলতে হবে—বলুন। এমন জায়গায় টাগোরের কবিতা একটি শুনব।

আবৃত্তি করিলাম—কি আর করি। মেয়েটির প্রাণে দেখিলাম সত্যই কবিত্ব আছে। সে উচ্ছ্বসিত হইয়া উঠিল প্রশংসায়। কিছু না বুঝিলেও ভাষার ধ্বনিতে ও ঝংকারে সম্পূর্ণ নিজের ইচ্ছায় শেলির একটি কবিতা আবৃত্তি করিল।

বলিলাম—গান করুন না একটা।

মিস সোরাবজি হাসিয়া বলিল—ইংরিজি গান জানি, আপনাদের পছন্দ হবে না।

—ভারতীয় মেয়ে, দিশি গান শেখেননি কেন ?

—আমাদের কমিউনিটির সাহেবিয়ানা এজেন্সে দায়ী মিঃ রায়। বাবা গভর্নেন্স রেখে ছেলেবেলায় পড়িয়েছেন, গান শিখিয়েছেন—তারা যে পথে নিয়ে গিয়েছে, সেই পথে যেতে হয়েছে আমায়। এখন জ্ঞান হয়ে সব বুঝতে পারি। এখন আমি গান্ধীবাদী, তা জানেন ? খন্দর পরি অনেক সময়, মা পরতে দেন না—এই হোল কথা। ইচ্ছে হয় আমি শিখি ভারতীয় গান—খুব ভাল লাগে আমার।

নবীনদা হাসিয়া মনের আনন্দে একটা ভাটিয়ালি গান বেশুরে গাহিয়া ফেলিলেন। মিস সোরাবজিকে ইংরিজিতে তাহার অর্থও বুঝাইয়া দেওয়া হইল। গানে, গল্পে, কবিতা-আবৃত্তিতে, হাসিখুশিতে সারাদিনটা কাটাইয়া রাত্রে যখন বাড়ী আসিয়া শুইয়া পড়িলাম—তখন যেন মাথার মধ্যে উগ্র মদের নেশা। নবীনদারও তাই, কারণ—

তিনি আসিয়া পর্যন্ত গুন গুন করিয়া গান করিতেছিলেন ।

মিস সোরাবজির বিবাহের অল্পদিন পরেই আমরা দুই বন্ধু নাগপুর হইতে চলিয়া গেলাম । বছরখানেক পরে আবার একবার বিশেষ কাজে নাগপুরে আসি ।

সংবাদ লইয়া শুনিলাম বৃদ্ধ ডাক্তার সোরাবজি ইতিমধ্যে মারা গিয়াছেন । তাঁহার পরিবারবর্গ কেহই এখানে নাই—বৃদ্ধের মৃত্যুর পরে তাহারা বোম্বাই চলিয়া গিয়াছে ।

মূলোর খবর জানিবার বিশেষ ইচ্ছা সত্ত্বেও আমরা কাহাকে তার কথা জিজ্ঞাসা করিব বুঝিতে পারিলাম না । ডাক্তার সোরাবাজ শহরের বিশিষ্ট নাগরিক হিসাবে সকলের নিকটই পরিচিত ছিলেন । কিন্তু মূলো জনৈক বিদেগী তরুণ ছাত্র—অমন ছাত্র নাগপুরে বহু আছে—কে কাহার খবর রাখে ! আমরা ছাড়া আর সে কাহার সঙ্গে মিশিত জানি না, সুতরাং মূলোর খোঁজ লইবার ইচ্ছা থাকা সত্ত্বেও উপায় হইল না ।

কিন্তু আশ্চর্যের বিষয়, সপ্তাহখানেকের মধ্যে একদিন অপ্রত্যাশিত-ভাবে হুদে বেড়াইতে গিয়া মূলোর দেখা পাইলাম । নবীনদা তাহাকে প্রথম দেখেন । একখানা পাথরে ঠেস দিয়া কে একজন নির্জনে বসিয়া আছে দেখিয়া নবীনদাই বলিলেন—ওখানে কে দেখ তো হে !

গোরেওয়াড়া শহর হইতে বহুদূরে, এত দূরে কেহ বেড়াইতে আসে না সাধারণত—স্থানটাও নির্জন পাহাড়-জঙ্গলের মধ্যে । আমি একটু কাছে গিয়া দেখি—মূলো ! নিখুঁত সাহেবী পোশাক পরা সেই রকমই, তবে দাড়ি কামায় নাই, মাথার চুল ছোট করিয়া ছাঁটা ।

ভাল করিয়া লক্ষ্য করিয়া দেখিলাম—মূলো একখানা খাতাতে কি লিখিতেছে । এত নিবিষ্টমনে লিখিতেছে যে, আমার পদশব্দ সে শুনিতে পাইল না । ক'বি হইয়া গেল নাকি ছোকরা ?


তাহার পর আমাদের সঙ্গে সে নাগপুরে ফিরিল। শুনলাম সে এবারও পরীক্ষায় পাশ করিতে পারে নাই। আমাদের পাইয়া মূলো ছেলেমানুষের মত খুশী। চাপেবার দুঃখমন্দিরে লইয়া গিয়া আমাদের মিষ্টান্ন শরবত খাওয়াইয়া দিল। শুনলাম দেশে তাহার মা-মারা গিয়াছেন এই বৎসরেই।

বলিল—বড্ড একলা বোধ করি এখানে। মিশব কার সঙ্গে? এখানে মেশবার লোক নেই। বাঙালীদের সঙ্গে মিশে আরাম। গোরে-ওয়াড়া লেকে মাঝে মাঝে গিয়ে বসে থাকি। বেশ লাগে। একদিন এখানে বেশ কেটেছিল। মনে আছে সেই আমাদের পিকনিক? ওরা কোথায় যে তা তো জানি নে।

দেখিলাম মূলের চোখের সামনে ভাসিয়া উঠিল একটা ছবি—কয়েক শত বৎসর পূর্বের রাজপুতানায় বিশাল মরুভূমির মধ্যে উটের পিঠে চড়িয়া ইহার সেই বীর পূর্বপুরুষ চলিয়াছে জয়সিংহের সৈন্যদলের সহিত দেওধার যুদ্ধে, সেলিমগড়ের যুদ্ধে—চণ্ডা গালপাট্টাওয়ালা রক্ষ-দর্শন মুখাবয়ব, দীর্ঘ দেহ, পাশে খোলা দীর্ঘ ছুধার তলোয়ার, হাতে সাত হাত লম্বা বন্দুক—মৃত্যু তাই, ভয় নাই—কবাকের মত বিশাল বক্ষে জলন্ত দুঃসাহস—কাহার সাধ্য ছিল তাহার মনোনিষ্ঠ কণ্ঠকে স্পর্শ করে! সে ছিনাইয়া আনিত তাহার প্রণয়িনীকে যে কোন লোকের হাত হইতে। লড়িত, খুন করিত।

আধুনিক যুগের আবহাওয়ায় জয়সিংহের সৈন্যদলের সেই বীর নায়কের বংশধর এই সাহেবী পোশাক-পরা, নিখুঁত টাই বাঁধা, ঘাড়-টাঁচা, ক্লিন শেভড, হাতে রিষ্টওয়াচ বাঁধা ছোকরা নিতান্ত নরুপিয়া। কবিতা লেখা বা চোখের জল ফেলা ছাড়া সে হারানো প্রণয়িনীর জন্য কি করিতে পারে? বিশেষত যখন ছুইবার ইউনিভার্সিটির ডিগ্রী না পাইয়া সে আরও দমিয়া গিয়াছে।

ছোকরার জন্য এই সর্বপ্রথম দুঃখ হইল।



আচার্য কৃপালনী কলোনী

আমার জী আমাকে কেবলই খোঁচাইতেছিলেন।

পূর্ববঙ্গে বাড়ী। এই সময় জমি না কিনিলে পশ্চিমবঙ্গে ইহার পরে আর জমি পাওয়া যাইবে কি? কলিকাতায় জমি ও বাড়ী করিবার পয়সা আমাদের হাতে নাই, কিন্তু পনেরোই আগস্টের পরে কলিকাতার কাছেই বা কোথায় জমি মিলিবে? যা করিবার এইবেলা করিতে হয়।

সুতরাং চারিদিকে জমি দেখিয়া বেড়াই। দমদমা, ইছাপুর, কাশীপুর, খড়দহ, ঢাকুরিয়া ইত্যাদি স্থানে। রোজ কাগজে দেখিতেছিলাম জমি ক্রয়-বিক্রয়ের বিজ্ঞাপন। পূর্ববঙ্গ হইতে যে সব হিন্দুরা আতঙ্কগ্রস্ত হইয়া চলিয়া আসিতেছেন, তাঁহাদের অসহায় ও উদ্ভ্রান্ত অবস্থার স্বেযোগ গ্রহণ করিতে বাড়ী ও জমির মালিকেরা একটুও বিলম্ব করেন নাই। এক বৎসর আগে যে জমি পঞ্চাশ টাকা বিঘা দরও হইত না, সেই সব পাড়াগাঁয়ের জমির বর্তমান মূল্য সাত-আটশো টাকা কাঠা।

বহুস্থানে খুঁজিয়া খুঁজিয়া হয়রান হইলাম।

কলিকাতার খুব কাছাকাছি জমির দর অসম্ভবরূপে চড়িয়াছে, আমাদের সাধ্য নাই ওসব স্থলে জমি কিনিবার। তাছাড়া জমি পছন্দই বা হয় কই?

বিভূতিভূষণ : সরস গল্প

এমন সময়ে আমার স্ত্রী একথানা কাগজ আনিয়া হাতে দিলেন । বলিলেন—তোমার তো জমি পছন্দই হয় না । ঠক্ বাছতে গাঁ উজোড় করে ফেললে । সিনারি নেই তো কি হয়েছে ? এটা পছন্দ হয় না, ওটা পছন্দ হয় না । এবার কি আর কিনতে পারবে কোথাও ? যাও এটা দেখে এসো । খুব ভালো মনে হচ্ছে । তোমার মনের মত । পড়ে রাখো—

আমাকে আমার স্ত্রী যাহাই ভাবুন, হিম হইয়া বসিয়া আমি নাই । সত্যিই খুঁজিতেছি, মন-প্রাণ দিয়েই খুঁজিতেছি । ভালো জিনিস পাইলে আমার মত খুশী কেহই হইবে না ।

বলিলাম—এ কাগজ কোথায় পেলেন ?

—বীণাদের বাড়ী গিয়েছিলাম । ওরাও জমি খুঁজচে, ওদের দেশ থেকে সব উঠে আসচে ইদিকে, কলকাতার আশেপাশে । ওরা এটা কোথা থেকে আনিয়েচে ।

পড়িয়া দেখিলাম । লেখা আছে—

‘আচার্য কৃপালনীর কলোনী ।’

আজই আসুন ! দেখুন !! নাম রেজিস্ট্রি করুন !!!

কলিকাতার মাত্র কয়েক মাইল দূরে অমুক স্টেশনের সুবিস্তৃত ভূখণ্ডে এই বিরাট নগরটি গড়িয়া উঠিতেছে । সুন্দর প্রাকৃতিক দৃশ্য । কলোনির পাদদেশ ধৌত করিয়া স্বচ্ছসলিলা পুণ্যতোয়া জাহ্নবী বহিয়া যাইতেছেন । পঞ্চাশ ফুট চওড়া রাস্তা, ইলেকট্রিক আলো, জলের কল, স্কুল, মেয়েদের স্কুল, গ্রন্থাগার, নাগরিক জীবনের সমস্ত সুখ-সুবিধাই এখানে পাওয়া যাইবে । আপাতত পঞ্চাশটি টাকা পাঠাইলে নাম রেজিস্ট্রি করিয়া রাখা হইবে ।’

স্টেশনের নাম পড়িয়া মনে হইল, কলিকাতার কাছেই বটে ।

আমার স্ত্রী বলিলেন—দেখলে ? ভালো না ?

—খুব ভালো । বীণার কাশা জমি নিয়েচেন এখানে ?

—না, নেবেন। নাম রেজেষ্ট্রি করেচেন। তুমি ওঁর সঙ্গে দেখা করে পঞ্চাশটি টাকা পাঠিয়ে দাও। কাঠা-পিছু পঞ্চাশ টাকা পাঠিয়ে দিতে হবে, জমি পরে দেখো। উনিও ত দেখেনান এখনো।

—জমি দেখবো না? আচ্ছা, বীণার কাকাকে জিগ্যেস করি।

বীণার কাকার নাম চিন্তাহরণ চক্রবর্তী। চিরকাল বিদেশে চাকুরী করিয়াছেন, কোথাও বাড়ীঘর করেন নাই, জমি বাড়ী সম্বন্ধে খুব উৎসাহ। আগে-আগে ভাবিয়া আসিয়াছেন কলিকাতায় বাড়ী করিবেন, সম্প্রতি সে আশা ত্যাগ করিয়াছেন।

চিন্তাহরণবাবু বলিলেন—আমুন। ও কাগজটা আপনি দেখেচেন? ভালো জায়গাই বলে মনে হ'চ্ছে।

—একটু দূরে হয়ে যাচ্ছে না কি?

—ওর চেয়ে কাছে আর কোথায় পাবেন মশাই?

—তা বটে! স্টেশনের কাছেই, গঙ্গার পারে।

—এখনো সস্তা আছে। এর পরে আর থাকবে না। ইলেকট্রিক আলো, জলের কল, পঞ্চাশ ফুট চওড়া রাস্তা—

—আপনি টাকা পাঠিয়েচেন?

—নিশ্চয়। রসিদ এসে গিয়েচে। আপনি যদি নেবার মত করেন— তবে টাকা পাঠিয়ে দিন।

—জমি না দেখেই?

—ও মশাই, এইবেলা নাম রেজেষ্ট্রি করে রাখুন। এর পরে আর পাবেন না। ঠিকানাটা হচ্ছে—দি নিউ গ্রাশনাল ল্যাণ্ড ট্রাস্ট, রাজীব-নগর।

আমার ত্রী আমার নামের রসিদ দেখিয়া খুশী হইলেন। বলিলেন—কাঠা-পিছু পঞ্চাশ টাকা। ক' কাঠার জন্তে টাকা পাঠালে, মোটে দু'কাঠা?

—এখন এই থাক্ ! পনেরোই আগস্ট কেটে যাক । সীমানা-কমিশনের রায় বের হোক । পরে—

পনেরোই আগস্ট পার হইয়া গেল । সীমানা-কমিশনের রায় আর বাহির হয় না । আমার স্ত্রী বলিলেন—একবার জমিটা দেখে এসে না ? বীণার কাকাকে সঙ্গে নিয়ে যাও—অনেক লোক আসচে ময়মনসিং, পাবনা, নোয়াখালি থেকে পালিয়ে । আমাদের পাশের বাড়ীর ফ্ল্যাটগুলো সব বোঝাই । এক-এক গেরস্ত বাড়ীতে তিন-চার ঘর লোক আশ্রয় নিচ্ছে ।

—কেন নিচ্ছে ? কোথাও তো কোনো গোলমাল নেই ।

—তা কি জানি বাপু, অত-শত জিগ্যেস করেচে কে ? বীণাদের বাড়ীই ওর পিসতুতো ভাই আর বীণার দাদামশায়ের ছোট ভাই এসেচেন ছেলেমেয়ে নিয়ে ।

কথাটা মন্দ নয় । নাম রেজেষ্ট্রি করিয়াছি, জমি কোথাও যাইবে না । তবে আর এক-আধ কাঠা বেশী রাখিব কি না, ইহাই ধাৰ্য্য করিবার পূর্বে কলোনিটা একবার চোখে দেখা উচিত নয় কি ?

সন্ধ্যার সময় ঝড়ের বেগে বীণার কাকা আমার ঘরে প্রবেশ করিলেন । বলিলাম—ব্যাপার কি ? এত ব্যস্ত কেন ?

—নিয়ে নিন, নিয়ে নিন । জমি কোথাও এতটুকু পাওয়া যাবে না এর পরে । হাজার হাজার লোক আসচে ‘ইস্টবেঙ্গল’ থেকে । আমার বাড়ী তো ভর্তি হয়ে গেল । জমি এইবেলা যা যেখানে নেবার নিয়ে নন ।

—বলেন কি ?

—সত্যি বলচি । কলোনির জমিটা চলুন কাল দেখে আসি । দেখে এসে কিছু বেশী করে জমি ওইখানেই কিনে রাখুন । কত করে দ্বীপ নেবে তা কিন্তু এখনো বলে নি । কাল সেটাও ওদের আপিস থেকে জেনে আসি চলুন—

—কোথায় যেন ওদের আপিস ?

—রাজীবনগর। কোল্লগরের কাছে।

পরদিন কিন্তু আমাকে একাই যাইতে হইল।

বীণার কাকা যাইতে পারিলেন না, তাঁহার বাড়ীতে আবার ছুটি গৃহস্থ আসিয়া উঠিয়াছেন। তাঁহাদের লইয়া তিনি বিব্রত হইয়া পড়িলেন।

কোল্লগর স্টেশনে নামিয়া রাজীবনগর যাইতে মনটা বড় খারাপ হইয়া গেল। স্টেশনের সংলগ্ন তো নয়ই। পাকা আড়াই মাইল দূরে। কাঁচা রাস্তা কাদায় ভর্তি। যেমন জঙ্গল, তেমনি মশা।

খোঁজ করিয়া এক গ্রাম্য ডাক্তারবাবুকে জমির মালিক হিসাবে পাওয়া গেল! তিনি একখানা টিনের ঘরে রোগীপত্র দেখিতেছিলেন, যাহাদের সংখ্যা আর যাহাই হউক ডাক্তারের পক্ষে ঈর্ষার বস্তু নহে। আমার দিকে চাহিয়া জিজ্ঞাসা করিলেন—কাকে চাচ্ছেন ?

বিনীতভাবে বলিলাম—আপনারই নাম মণীন্দ্র ঘটক? আমি যশোর থেকে আসচি। আপনি কাগজে বিজ্ঞাপন দিয়েছিলেন—

ডাক্তারবাবু নিস্পৃহভাবে বলিলেন—ও—

এবং পরক্ষণেই রোগীদের দিকে মনোযোগ দিলেন পুনরায়।

আমি বড় আশা করিয়াই গিয়াছিলাম। কলিকাতা হইতে মাত্র নয় মাইল দূরে স্টেশনের গায়ে জমি, এ জমিটা লইতে পারিলে নানা-দিক দিয়াই সুবিধা। কিন্তু জমির মালিক অত নিস্পৃহ কেন। তবে কি বিক্রয় করিবেন না মনস্থ করিলেন ?

প্রায় মিনিট দশেক কাটিয়া গেল।

দাঁড়াইয়াই আছি। কেউ বসিতেও বলে না।

আবার সাহস সঞ্চয় করিয়া বলিলাম—আমি—মানে, এই ট্রেনেই আবার—মানে—

ডাক্তারবাবু মুখ তুলিয়া বলিলেন—কি বলছেন ?

বিভূতিভূষণ : সরস গল্প

—জমিটা—

—কোন্ জমি ?

—কাগজে বিজ্ঞাপন দিয়েছিলেন—স্টেশনের সংলগ্ন—কৃপালনীর কলোনি—

—ও ।

আবার রোগীদিগের প্রতি তাঁহার দৃষ্টি নিবদ্ধ হইল । আমিও অতটা সুবিধাসম্পন্ন যে জমিটুকু তাহার খোদ মালিককে বিরক্ত করিতে সাহস করিলাম না ।

দশ মিনিট কাটিল ।

এবার ডাক্তারবাবুই আমাকে বলিলেন—তা, বসুন ।

বসিবার অনুমতি পাইয়া কৃতার্থ হইলাম । অনেকক্ষণ হইতে খাড়া দাঁড়াইয়া আছি । বসিবার মিনিট দুই পরে আমি বলিলাম—ইয়ে—জমিটার কথা—মানে—

ডাক্তারবাবু মুখ তুলিয়া বলিলেন—কী বলচেন ?

—জমিটার কথা বলছিলাম । মানে—একবার দেখলে ভালো হয় । এদিকে বেলা হয়ে যাচ্ছে—

—জমিটা দেখবেন ? ও কার্তিক, কার্তিক ! যাও, এই বাবুকে জমিটা দেখিয়ে আনো ।

ভাবিলাম, তাই তো ইহা আবার কি । ডাক্তারখানার পাশের ঘরে বড়-বড় হরফে ইংরাজীতে লেখা আছে বটে, ‘দি নিউ ন্যাশনাল ল্যাণ্ড ট্রাস্ট’ ।

গঙ্গার ধারে বিরাট ভূখণ্ড লইয়া এই উপনিবেশ গড়িয়া উঠিবে—কিন্তু গঙ্গা হইতে রাজীবনগরই তো দেখিতেছি আড়াই মাইল দূরে । তবে ইহাও হইতে পারে দি নিউ ন্যাশনাল ল্যাণ্ড ট্রাস্টের আপিস এখানে, জমি গঙ্গার ধারে ।

কার্তিক নামধেয় লোকটি ডাক্তারবাবুর আহ্বানে এইমাত্র আসিয়া—

ছিল। বলিল—কোন জমি বাবু?

—আরে, ওই যে বরোজের পশ্চিম গায়ে—

—জমি?

—আ মলো যা। হাঁ করে সঙের মত দাঁড়িয়ে রইলে কেন? হ্যাঁ, জমি। কোথাকার ভূত?

বাড়ীর চাকরটা বোধ হয় বোকা, প্রভুর এমন মূল্যবান ভালো বহুবিজ্ঞাপিত ভূমিখণ্ডের সম্বন্ধে কোন খবর রাখে না কেন?

আমি পথে বাহির হইয়া বলিলাম—চলো—

লোকটা পশ্চিমদিকে যাইতেছে দেখিয়া বলিলাম—ওদিকে কোথায় যাচ্চো? ইন্টিশানের কাছে যে জমি—কৃপালনীর কলোনি—

—ইন্টিশানের কাছে কোনো জমি নেই বাবু।

—আলবৎ আছে? তুমি কোনো খবর রাখো না।

—না বাবু, কোনো জমি নেই ওদিকে।

—শোনো। ইন্টিশানের গায়ে। কাগজে যে জমির বিজ্ঞাপন দেওয়া হয়েছিল। পঞ্চাশ টাকা খরচ করে নাম রেজিস্ট্রি করতে বলা হয়েছিল যে জমির জন্তে। আমি নাম রেজিস্ট্রি করে রেখেছি—রসিদ আছে পকেটে—

—এ-কথাটা আপনি ওখানে বললেন না কেন বাবু। আমি তো আর কোনো জমির সন্ধান জানি না। কালও তো এক বাবু এসেছিলেন, তিনিও নাম রিজিস্ট্রি করে নিয়ে গেলেন।

—জমি দেখেন নি?

—না। ডাক্তারবাবু বললেন, জমি দেখে যাবেন সামনের রবিবারে।

—বেশ, আমায় নিয়ে চলো—

—বাবু—

—কি বলে আবার?

—আপনি জমি দেখতে চান?

—কি বলে আবেগ-তাবোল ? জমি দেখবো না তো কি ?

—আপনি এখানে দাঁড়ান। আমি জিজ্ঞেস করে আসি।

আমি বিরক্ত হইয়া নিজেই আবার ডাক্তারবাবুর কাছে গেলাম। বলিলাম—আপনার চাকর জানে না আমাকে কোথায় নিয়ে যেতে হবে।

এবার ডাক্তারবাবু দেখিলাম, আর একজন ভদ্রলোকের সঙ্গে কথা কহিতেছেন। তিনিও জমির জন্মই আসিয়াছেন মনে হইল। কারণ তিনি পকেট হইতে টাকা বাহর করিয়া নাম রেজিস্ট্রি করিলেন। ডাক্তারবাবু রসিদ কাটিয়া দিলেন দেখিলাম। লোকটির সঙ্গে আরো কি কথা হইয়াছে জানি না, দু'টাকা দিয়া রসিদ লইয়া লোকটা চলিয়া গেল।

আমাকে ডাক্তারবাবু বলিলেন—জমি দেখবেন ? আচ্ছা, চলুন, আমিই যাচ্ছি।

পরে আমাকে দুর্গন্ধময় জল-ভর্তি নালা, কচুৰন, ভাঙা চালাঘর প্রভৃতির পাশ দিয়া কোথায় কোন্ অনির্দেশ্য রহস্যের দিকে লইয়া যাইতে লাগিলেন, তিনিই জানেন।

আমি একবার ক্ষীণ প্রতিবাদ করিবার চেষ্টা করিলাম। তিনি বোধ হয় ভুলিয়া যাইতেছেন, এ জায়গাটি স্টেশনের খুব কাছে। স্টেশনের সংলগ্ন বলিয়া বিজ্ঞাপনে আছে—

ডাক্তারবাবু আমার দিকে কটনট দৃষ্টিতে চাহিয়া বলিলেন—আপনার তো আইডিয়া দেখাছ বেশ। স্টেশন-সংলগ্ন মানে কি একেবারে কোমলগর ইন্সটেশনের টিকিটঘরের পাশে হবে মশাই ?

বলিতে পারিতাম, ‘সংলগ্ন’ বলিতে দুই মাইল দূরবর্তীই কি বোঝায় ? কিন্তু না, দরকার নাই ! পূর্ববঙ্গের অসহায় হিন্দু আমি, এখানকার জমির মালিকের সঙ্গে অনর্থক ঝগড়া করিব না। স্থান পাওয়া লইয়া কথা। চটিয়া গেলে জমি না দিতেও তো পারে।

বিনীতভাবে বলিলাম—কলোনি কতদূর ?

—মাইলখানেক দূরে ।

বিস্মিত হইয়া বলিলাম—বলেন কি ? তবে সাড়ে-তিন মাইল দূর পড়লো স্টেশন থেকে । এর নাম ‘সংলগ্ন’ ? এ তো কখনো শুনিনি—

ডাক্তারবাবু থমকিয়া দাঁড়াইয়া গেলেন । বললেন—না শুনেচেন কি করবো ? কিন্তু আপনাকে বলছি, কলোনির এক ইঞ্চি জমি পড়ে থাকবে না । সব নামে-নামে রেজেষ্ট্রি হয়ে যাচ্ছে । আপনার ইচ্ছে না হয়, না নেবেন । তবে কি দেখতে যাবেন, না, দেখবেন না ?

—চলুন যাই ।

পকেট হইতে একগোছা চিঠি বাহির করিয়া ডাক্তারবাবু আমার নাকের কাছে ধরিয়া বলিলেন এই দেখুন । মনিঅর্ডারে টাকা আসচে অফিসে, রোজ একগোছা চিঠি আসচে, আপনি দেখুন না মশাই । না দেখলে ঠকবেন এর পরে । তবে আপনি না নিলে জোর করে তো আপনাকে দেওয়া হবে না—

রাস্তায় ভীষণ কাদা । একটা গোয়াল-পাড়ার ভিতর দিয়া যাইতেছিলাম, মহিষ ও গরুর বাথান চারিদিকে । অত্যন্ত দুর্গন্ধ বাতাসে । ইহাতে মশা বিন্-বিন্ করিতেছে । খানিকদূর গিয়া একটা অবাঙালী কুলি বস্তু, যেমন নোংরা, তেমনি ঘিঞ্জি । তারপরে আবার জঙ্গল বাশবন আর ডোবা ।

মাইলখানেক দূরে জঙ্গলের একপাশে রাস্তার ধারে একটা টিনের সাইনবোর্ডে বড়-বড় করিয়া লেখা আছে—‘আচার্য কৃপালনীর কলোনি’ ।

এখানে আসিয়া ডাক্তারবাবু দাঁড়াইলেন । সামনের দিকে হাত দিয়া দেখাইয়া বলিলেন—এই —

চারিদিক চাহিয়া চুপ করিয়া দাঁড়াইয়া রহিলাম । বিস্ময়বোধের শক্তিও যেন হারাইয়া ফেলিয়াছি । ইহার নাম, আচার্য কৃপালনীর কলোনি । এই সেই বহু-বিজ্ঞাপিত ভূখণ্ড ? কোথায় ইহার পাদদেশ

ধৌত করিয়া গঙ্গা প্রবাহিত হইতেছে ? কোথায় সুন্দর প্রাকৃতিক দৃশ্য ? পঞ্চাশফুট চওড়া রাস্তা, ইলেকট্রিক আলো, জলের কল প্রভৃতি হবির সঙ্গে এই অন্ধকার বাঁশবন, কচুবন, এলবন আর মশাভরা ডোবার সহিত খাপ খাওয়াইতে অনেক চেষ্টা করিলাম ; মনকে অনেক বুঝাইলাম, রাসবিহারী অ্যাভিনিউ কি ছিল ? অমুক কি ছিল ? কিন্তু পারিয়া উঠিলাম না । তাহা ছাড়া এখানে ডাঙ্গা-জমিই বা কোথায় ? সব তো জলেডোবা আর জলের মধ্যে মাথা তুলিয়া দাঁড়াইয়া আছে বনকচুর ঝাড় ।

সে কথা বলিয়া লাভ নাই ।

ডাক্তারবাবু গর্বের সহিত বলিলেন—সাড়ে ছ'শো করে কাঠা, তাই পড়তে পাচ্ছে না । সব প্লটের নাম রেজেষ্ট্রি হয়ে গিয়েচে মশাই ।

কিন্তু 'প্লট' বলিতে জমির টুকরো বোঝায়, এখানে জমিই যে নাই, এ তো সবই জলাভূমি । পুণ্যতোয়া স্বরূপসলিলা জাহ্নবী ইহার ত্রি-সীমানায় আছেন বলিয়া মনে হইল না ।

বলিলাম—গঙ্গা এখান থেকে কতদূর ?

—বেশী নয় । মাইল খানেক হবে কিংবা কিছু বেশী হবে—

তাই বা কি করিয়া হয় ? গঙ্গা এখান হইতে চারি মাইলের কম কি করিয়া হয়, বুঝিলাম না ।

সে যাহা হউক, তর্ক করিলাম না । ফিরিয়া আসিলাম । এই জলাভূমি আর কচুবনই হয়তো ইহার পর পাইব কি না কে জানে । মন ভীষণ খারাপ হইয়া গেল ।

বাড়ী আসিতেই স্ত্রী ব্যস্ত হইয়া জিজ্ঞাসা করিলেন—হ্যাঁ গা, কি রকম দেখলে ? ভালো ?

বলিলাম—চমৎকার !

—বলো না, কি রকম জায়গা ? গঙ্গার ওপর ?

—সংলগ্ন বলা যেতে পারে ।

—বেশ বড় রাস্তা করেছে ?

—মন্দ নয় । বড়ই ।

বীণার কাকাকে সেদিন কিছু বলিলাম না । পঞ্চাশ টাকা জলে ফেলিলাম বটে, কিন্তু হাঁপ ছাড়িয়া বাঁচিলাম ! পূর্ববঙ্গই ভালো ! আর জমি খুঁজিব না ঠিক করিয়া ফেলিলাম !

পরদিন র‍্যাডক্লিফের রায় বাহির হইল ।

আমাদের দেশ পশ্চিমবঙ্গে পড়িয়াছে ।

কমপিটিশন



শিবশঙ্কর সকালে উঠেই ছ' দফা ফোন করলেন। একবার য়্যাটনি রায় ও মিত্রের জীবনধন রায়কে ও আর একবার প্রসন্নদাস বড়ালের অংশীদার ও কর্তা হরিদাস বড়ালকে; কারণ ওঁদের আপিস এখনো খোলে নি।

—নমস্কার, কি খবর?

—আম্মন একবার। কতদূর করলেন?

—আসবো এখন?

—এখানেই চা খাবেন।

একটু পরে বাড়ীর বাইরে মোটরের শব্দ শোনা গেল এবং জীবনধন রায় ঘরে ঢুকলেন। জীবনধন রায়ের পরনে সাহেবি পোশাক, চোখে স্টীলের ফ্রেমের চশমা, পায়ে পেটেন্ট চামড়ার চকচকে বুট, বগলে ফোল্ডিও ব্যাগ।

—আম্মন, মিঃ রায়, বসুন। নমস্কার।

—নমস্কার।

—ওরে, চা নিয়ে আয়। তারপর?

—তৈরি। সরেজমিন তদারক করবেন না?

—রেজেষ্ট্রী আপিস সার্চের রেজাল্ট কি ?

—ভালো। দাগী মাল নয়, তবে দেড়—দেড়ের কমে হবে না।
আমাদের তিন পার্সেন্ট।

শিবশঙ্কর বাবু হরিশ মুখ্যের স্ট্রীটে তিনতলা বড় বাড়ী কিনেছেন
এদের দালালিতে। দেড় লক্ষ টাকা দাম, য্যাটনিরা তিন পার্সেন্ট
কমিশন নেবেন—আসল কথা হচ্ছে এই।……রূপোর ট্রে ভরে টোস্ট,
ডিম সেদ্ধ, আলু সেদ্ধ ও লেটুস সেদ্ধ এল, তার সঙ্গে চায়ের লিকার,
তুখ চিনি আলাদা।

শিবশঙ্কর বাবু বললেন—মিষ্টি দিই নি—কারণ আমাদের এ
বয়সে—

—না না। থাক। তারপর আমার গাড়ী রেডি, চলুন একবার
সরেজামনে। জিনিসটা দেখুন।

—বেড রুম কতগুলো ?

—উনশটা রুম সবসুদ্ধ ওপরে নিচে। ছটা বাথরুম, এ বাদে বাইরে
তিনটে আলাদা পাইখানা। খুব ভালো বাড়ী। কুণ্ডু কোম্পানীকে রাজী
করতে বেগ পেতে হয়েছে খুব। বুড়ো একেবারে বেঁকে বসেছিল
শেষকালে।

—এখন যেতে পারবো না—মাপ করুন। এখন বেলা দশটা পযন্ত
মরবার ফুরসত নেই—এখুনি আবার লোক আসবে—

—আচ্ছা উঠি তাহলে। ওবেলা আপিসে ফোন করবেন এখন—
ওখান থেকে যাওয়া যাবে।

একটু পরে হরিদাস বড়ালকে আবার ফোন করা হোল।

—নমস্কার কি খবর ? হ্যাঁ, একবার, করেছিলাম—হ্যাঁ—এই আধ
ঘণ্টা আগে। হ্যাঁ। সোনাটার কি হোল ? বারের দাম কত বললেন ?
তিন আনা ? আমার চাই কিছু—হ্যাঁ-হ্যাঁ-হ্যাঁ—আচ্ছা। আজ ?—হ্যাঁ
—আচ্ছা। আপিসে ? আচ্ছা।

সাধারণ লোকে এ কথাবার্তা থেকে বিশেষ কিছু বুঝবে না, কিন্তু প্রায় পঞ্চাশ হাজার টাকার ওপর 'বড়াল বার' নামক বিখ্যাত সুবর্ণের বাট কিনবার পাকাপাকি ব্যবস্থা হয়ে গেল।

ক্রয়-বিক্রয়ের পালা শেষ হোতেই শিবশঙ্করের আপিস ম্যানেজার ও তদারককার মিঃ ঘোষাল দুকে শিবশঙ্করকে খানিকটা নিচু হয়ে নমস্কার জানিয়ে একটা চেয়ারে বসলেন। দুজনের মধ্যে যে কথাবার্তা শুরু হোলো তা স্কোয়ার ফুট রেট, পার্সেন্ট, ইম্পাতের জালতি, সিমেন্ট, এক্সপ্রেস টেলিগ্রাম, গ্যারিসন্ এনজিনিয়ার প্রভৃতি শব্দে পরিপূর্ণ ও কটকিত। আজই মিঃ ঘোষালকে আপিসের কাজে তেজপুরে যেতে হচ্ছে, ফোনে এখুনি আসাম মেলে বার্থ রিজার্ভ সম্বন্ধে শেয়ালদা স্টেশনের কর্মচারীর সঙ্গে আলাপ হোলো। অল্প অল্প কথার পরে বেলা ন'টার সময়ে মিঃ ঘোষাল বললেন—তা হোলো আমি উঠি—

—কত টাকার দরকার ?

—সতেরো হাজার তো ওদের পেমেন্ট করতে হবে, আর পূজোর ব্যবস্থা—তাও তিন হাজার নেবে সুপারিটেণ্ডেন্ট, হাজার খানেক দিতে হবে উপদেবতাদের। মিসেস বর্মণকে একটা প্রেজেন্ট দিতে হবে ভাল দেখে। কি দেওয়া যায়, স্মার, আপনিই বলুন।

—একটা জড়োয়ার কিছু দাও গিয়ে—হাজার খানেকের মধ্যে। বিশ হাজারের একটা চেক নিয়ে যাও—

—আজ্ঞে স্মার, ব্যাঙ্কে টাকা ভাঙানোর আমার সুবিধে হবে না। একটায় আসাম মেল। তার আগে আমার অনেক কাজ। একবার আপিসে যেতে হবে। ড্রয়ারের মধ্যে কাগজপত্র রয়েছে, নিয়ে যেতে হবে। গহনাই বা কিনবো কখন ?

—আচ্ছা গহনার জন্মে আমি সুরেশকে পাঠিয়ে দিচ্ছি বজ্রদাসের বাড়ী। যদি কিছু ভালো থাকে দেখে আনুক। সেজন্মে তোমায় ভালতে হবে না। তুমি এখান থেকে বাড়ি যাও—নেয়ে খেয়ে গাড়ী নিয়ে

ব্যাঙ্কে গিয়ে আগে চেক ভাঙাও। ওখান থেকে ইন্টিশানে চলে যাও—
গহনা যদি পাই সুরেশকে দিয়ে ট্রেনে পাঠাবো। মিসেস বর্মণকে খুশী
রাখা চাই মোটের ওপর। দেবতাকে তুষ্ট রাখতে হোলে দেবীর পূজা
না দিলে হয় না। কমপিটিশনের বাজার, বুঝে কাজ করবে।

ডাক এল। এক গাদা চিঠি। হাতে নিয়ে তাড়াতাড়ি একবার দেখে
নিতে নিতে শিবশঙ্কর ডেকে বললেন—ও রিতুয়া, নিয়ে যা—বড় বৌমার
চিঠি, নিয়ে যা—সুলেখার—ছোট বৌমার—ওপরে দিগে যা! আর
শোন—বলে আয় আমি চান করবো এখনি।

খাবার ঘরে পুত্রবধু নন্দা ভাত নিয়ে এলো টেবিলে। ছোট বাটিতে
কাঁচামুগের ডাল, বে-মশলার মৌরলা মাছের ঝোল আর কাগজি লেবু
কাটা পৃথক ডিশে। সামান্য একটু ঘরে-পাতা দই শ্বেতপাথরের বাটিতে।
শিবশঙ্কর খেয়ে হজম করতে পারেন না, লিভারের রুগী। পুত্রবধু বললে
—ও বেলা কখন ফিরবেন বাবা?

—তা কি বলতে পারি কখন ফিরবো? নানা কাজ। তারপর আজ
গ্যাটনির সঙ্গে গুরুতর কাজ রয়েছে। কেন?

পুত্রবধু হেসে বললে—আমরা ভাবচি বেহালা যাবো পিকনিক
করতে। গাড়ীখানার দরকার ছিল—

ও—। তা—কটার সময় যাবে। গাড়ী না হয় শোভা সিং আপিস
থেকে নিয়ে আসবে এখন। তোমাদের পৌঁছে দিয়ে চলে আসবে।
আসবার সময় তোমরা ট্যাক্সিতে এসো। পৌঁছে গাড়ী ছেড়ে দিও—
বিমান কোথায়? ওপরে আছে?

পুত্রবধু মুখ নত করে বললে—তা তো জানি নে বাবা।

—তার মানে? বেরিয়েছে?

পুত্রবধু পায়ের নখে মাটি খুঁটতে খুঁটতে সেদিকে চেয়ে থেকে উত্তর
দিলে—উনি কাল রাত্তিরে তো বাড়ী আসেন নি।

—সে কি কথা! কালও আবার আসে নি—হঁ—

শিবশঙ্কর ভ্রূ কুণ্ঠিত করলেন, আর কিছু বললেন না।

বেলা একটা। শিবশঙ্করের আপিস বেটিক্স স্ট্রীটে। বেশি বড় আপিস নয়। জন আট নয় কেরানী বিবিধ খাতা নিয়ে ব্যস্ত। একজন ছোকরা টাইপরাইটারে ঠকঠক টাইপ করচে। শিবশঙ্করকে আপিসে ঢুকতে দেখে সবাই একটু সম্ভ্রান্ত হয়ে উঠলো। সম্ভ্রান্ত হবার কথা।

দেখতে আপিস ছোট হোক, কিছু দিন আগে এই আপিসে বসেই শিবশঙ্কর সরকার চালের কারবারে কম করেও সাত লক্ষ টাকা মুনাফা পেয়েছেন। তেরশ' পঞ্চাশ সালে ছুঁভিক্ষের বছর। তেরো সিকে দরে ধানের মণ কিনে সাথে ষোল টাকা মণ দরে ধান বিক্রি করেন। চালের কন্ট্রোল নিয়ে এক হাজার টন চাল খরিদ করেন ত্রিপুরা জেলা থেকে। তারপর সে দেশে চালের দর উঠে গেল চল্লিশ টাকা মণ।

ভালো করেন নি তা নয়। দেশের বাড়ীতে প্রায় দুহাজার লোককে ফেন-ভাতের খিচুড়ি খাইয়েছেন, কাপড় বিতরণ করেছেন কত লোককে। সম্প্রতি দুটি মিলিটারী কন্ট্রোল্টের কাজে শিবশঙ্কর অনেক টাকা রোজগার করেছেন। দুহাতে ঘুষ বলিয়েও ছ লক্ষ টাকা ঘরে এনেছেন। এ বাদে খুচরো কারবার তাঁর অনেক রকম আছে, এই ছোট আপিসটাতে বসে সারা বাজারের গুপ্ত খবর রাখেন। টেলিফোনের বিরাম বিশ্রাম নেই এক মিনিট। বাজারে তাঁর বহু চর সবদা ঘোরাঘুরি করচে, শেয়ার মার্কেট থেকে সর্বো পর্যন্ত কোনো বাজারের গুপ্ত খবর ওদের জানতে বাকি নেই।

মোটের উপর শিবশঙ্করের দিন যাচ্ছে ভালো, ধুলো-মুঠো ধরলে সোনা-মুঠো হচ্ছে। আর কি অসম্ভব খাটিয়ে লোক শিবশঙ্কর। চরাকির মতন ঘুরছেন এখানে ওখানে, এ আপিস ও আপিস, কত লোকের সঙ্গে টেলিফোনে খালাপ করছেন, কত লোক তাঁর বাড়ী গিয়ে তাঁর সঙ্গে দেখা করচে—যে লোক এমনি নরম হয় না, তার জীকে সম্ভ্রান্ত করে অগ্রসর হতে হচ্ছে, ছুঁচ যেখানে গলে না, সেখানে হাতী গলিয়ে

দিচ্ছেন শিবশঙ্কর,—পয়সা কি অমনি হয় ?

শিবশঙ্করের অভিজ্ঞতা এই যে, অর্থ উপার্জনের ক্ষেত্রে দয়া মায়া চক্ষুলাভ ইত্যাদি ছবলতা। যে বিচক্ষণ কারবারী সে এ সব মানবে না। কর্মপিটিশনের বাজার, চক্ষুলাভ এখানে খাটে না।

আর একটা অভিজ্ঞতা, অবিশিষ্ট বড় মূল্যবান অভিজ্ঞতা যে, ঘুষ অসাধ্য সাধন করতে পারে। শিবশঙ্করবাবু বলেই থাকেন—ওহে এমন লোক দেখলাম না যে পূজো পেলে খেতে চায় না। তবে বেশি আর কম। কেউ চায় ষোড়শোপচারে পূজো, কারো বা চাল কলা, কারো চিনির নৈবিত্তি—ঢের ঢের দেখলাম হে, যেখানে ভেবেচি এর কাছে কেমন করে যাবো, এত বড় পদস্থ লোক...পূজো দাও, বাস্ সব ঠিক ! সবাই সমান, তবে ওই যে বললাম, বেশী আর কম। চুরি করার সুবিধে জোটে নি যার, সেই সাধু।

বেলা একটার সময় একটি রোগা, দীর্ঘ চেহারার সাহেবি পোশাক-পরা লোক শিবশঙ্করের আপিসে এসে ঢুকলো।

শিবশঙ্কর বললেন—কি খবর ? আশুন, বশুন।

—বড় বেশি চায়।

—কত ?

—সাড়ে পাঁচ করে কাঠা।

শিবশঙ্কর বিস্ময়ের সুরে বললেন—জমি কার ? ব্যাকের ?

—আজ্ঞে না, মগনলাল মুখনলাল ক্ষেত্রীর। একবার মর্টগেজ আছে। রেজিস্ট্রি আপিস সার্চ করা হয়েছে।

—বড় বেশি দর বলছে না ?

—ও অঞ্চলে ওর কম দর নেই। এর পরে সাত পর্যন্ত উঠবে। ন কাঠা একসঙ্গে আর পাওয়া যায় না স্মার। আপনি কাল নিজে একবার চলুন—বায়নাপত্তর রেজিস্ট্রি না করলে, দু-তিনটে খন্ডের মুখিয়ে রয়েছে।

বিভূতিভূষণ : সবস গল্প

এই সময় টেলিফোন বেজে উঠলো। অল্প খানিকক্ষণ কথা বলে শিবশঙ্কর ফোন রেখে সামনের লোকটিকে বললেন—গ্যাটার্নির আপিস থেকে বলচে হরিশ মুখুয্যার স্ট্রীটের বাড়ীটা এখনি দেখতে যেতে হবে। চলুন না বাড়ীটা দেখে আসবেন—

উভয়ে মোটরে বার হয়ে সোজা হরিশ মুখুয্যে স্ট্রীটে সেই নম্বরের বাড়ীর সামনে এসে দেখলেন মিঃ ঘোষাল তাঁদের পূর্বেই সেখানে মোটর থামিয়ে অপেক্ষা করছেন।

বাড়ীর ওপরের নিচের সব ঘর, বাথরুম, দরদালান, ছাদ সব ঘুরে দেখা হলো। মিঃ ঘোষাল বললেন—মতামত দিন মিঃ সরকার।

—মতামত আর কি, নেওয়া হবে।

—তিন পার্সেন্টের কথা স্মরণ রাখবেন। ও আমাদের একটা সর্ত। নয়তো আমারই হাতে ছুটো খদ্দের। আপনি ক্রেতা, আপনার কাছ থেকে কমিশন নেওয়া নিয়ম নয় জানি—কিন্তু এখানে অবস্থা-অমুযায়ী ব্যবস্থা—

—সে যা হয় হবে। ইলেকট্রিক ইন্সলেশন নেই কেন? অত বড় বাড়ী—

—ছিল। ওয়্যারিং করে নিতে যা খরচ পড়বে তা তো আপনি এমনি বাদ পাচ্ছেন। ওই বাড়ী কি দুইয়ের কমে হয়—চার লক্ষ সত্তর হাজার পঁচাত্তর হাজার তো উইদাউট এনি ডাউট! আপান বলুন, এখনি এক মারোয়াড়ী খদ্দের—

—না, না, সে কথা বলি নি। আপনি নিশ্চিন্ত থাকুন—

শিবশঙ্কর একাই আপিসে ফিরলেন, তখন বেলা পৌনে তিন।

আপিসের চাকর কাকুয়া বললে—হুজুর, টেলিফোন দুবার বাজিয়েছে। হামি লত্বর লিখে রাখিয়েছে।

—কই নম্বর?

—হুজুর, ঘরের টেবিলমে আছে। মনুবাবুকে দিয়ে লিখিয়ে

রাখিয়েসে । এক তো সাউথ ওয়ান ফাইভ—

শিবশঙ্কর চাকরকে থামিয়ে দিয়ে বললেন—আচ্ছা, আচ্ছা, তুই যা—এক পেয়ালা চা জলদি তৈরি কর—

—আউর কুছ বাবু ?

—আজ বাড়ী থেকে টিফিন আনে নি কেউ ? ফল-টল ?

—না ভজুর । সড়া পোচা ছ আপেল ভজুরেব টেবিলমে ছিল, ও হামি ফেকিয়ে দিয়েসে—ও কালওয়ানা—

—বেশ করিচিস । যা চা নিয়ে আয়—

কারুয়া অনেক দিনের চাকর ; আগে শিবশঙ্করের বাড়ীতে ছিল, এখন কাজকর্মের সুবিধের জন্তে ওকে আপিসে নিজের খাসকামরার চাকর রেখেছেন শিবশঙ্কর । শিবশঙ্কর কি খান না খান, কি তাঁর অভ্যাস, কারুয়া এ সব জানে । কারুয়ার আনীত চায়ের পেয়ালাতে চুমুক দিয়ে শিবশঙ্করবাবু ভাবছিলেন আঃ ও কিছু জমির সন্ধান নিতে হবে ।

জমি বড় দরকার ।

এই সব অঞ্চলে বড় বড় প্লটের সন্ধানে আছেন ।

শিবশঙ্কর কাগজ-কলমে ছোট্ট একটু হিসেব করে নিলেন । লাখ দুই টাকার জমি কিনে রাখতে হবে । টালিগঞ্জের দিকে কিছু জমি এখনো আছে । ব্যাঙ্কের জমি কিছু আছে লেক আর ঢাকুরে যাদবপুর অঞ্চলে ।

‘ঢাকা হোলে মাটি করো’ মস্ত বড় কথা । অত বড় ইনভেস্টমেন্ট নেই টাকার । দালালেরা নানারকম সন্ধান নিয়ে আসে । তাঁর টেবিলের ডয়্যারে আছে জমিজমা-সংক্রান্ত নানা রকম খবর, দালালদের দেওয়া । শিবশঙ্করবাবু ডয়্যার খুলে অর্ধ-অনুমনস্ক ভাবে সেগুলোর ওপর চোখ বুলিয়ে যেতে লাগলেন । মেদিনীপুর জেলায় শালের জঙ্গল একশো কুড়ি বিঘে এক প্লটে । ধানের জমি ওই সাথে এক প্লটে সস্তর

বিভূতিভূষণ : সন্ন্যাস গল্প

বিঘে, মাঝখানে বড় পুকুর।

বর্ধমান জেলায় ধানের জমি নব্বুই বিঘে। বনপাশ স্টেশনের কাছে।

কুমারডি কয়লাখনির এক তৃতীয়াংশের মালিকানা স্বত্ব, বড় বাংলোঘর, ইঁদারা, ছোট বাগান একত্রে।

রানাঘাট টাউনে রেলের নিকট স্টেশন রোডের ওপর দুখানা বাড়ী, রেলের ওপারে বাইশ বিঘের সেগুন বাগান, ইটের তাঁটা।

যশোর জেলায় মৌজা ধরমপুর ও মৌজা চণ্ডীরামপুর—দুইটি বড় মৌজা নীলামে উঠেচে। সামনের মাসের বারোই তারিখে যশোর সদরে নীলাম হবে। লোক পাঠিয়ে শিবশঙ্কর জেনেচেন মৌজার আদায় ভালো, একাত্তরটি জমার মধ্যে উনিশটি খাস হয়ে গিয়েচে এবং আশা আছে আরও আটটি জমা এই বছরের মধ্যেই খাস হবে। বাকী খাজনা পড়ে আছে প্রজাদের কাছে কয়েক হাজার টাকা।

হাজারিবাগ জেলায় সিংজানি-ভোজুড়ি অভ্রের খনি ও শালবন, বাংলো, ইঁদারা এবং কিছু ধানের জমি।

উটেটাডিঙির খাল ধার থেকে সামান্য দূরে ৩মহেশচন্দ্র সিমলাইয়ের বাগানবাড়ী ও পুকুর, বাগানে জমির পরিমাণ দশ বিঘে। কলমের আম, লিচু, ফলসা, ম্যাঙ্গোস্টিন প্রভৃতি ফলের গাছ। দোতলা বাড়ী।

অভ্রের খনির ওপর ঝোঁক বেশি শিবশঙ্করের। ছু-পার্সেন্টের অনেক বেশি আসবে টাকার ওপর। স্বাস্থ্যকর স্থান, মাঝে মাঝে গিয়ে থাকার যাবে, কলকাতায় তো যা খান হজম হয় না, লিভারের রোগে কষ্ট পাচ্ছেন।

আর বাকী সব পাড়ারগায়ে জমিজমা, ধানক্ষেত—নাঃ ওদের কি মূল্য আছে? জমি কিনতে গেলে কলকাতায়। কলকাতার সম্পত্তির মত সম্পত্তি নেই—বাড়ী বা জমি। মহেশ সিমলাইয়ের বাগানবাড়ী ভালো, ফলবান গাছ অনেকগুলো, নার্সারি করবার জগ্গে কেউ ভাড়া

নিতে পারে, অনেকখানি জমি—মূল্যবান সম্পত্তি হয়ে উঠতে পারে দু-চার বছর পরে। দালালে বলচে আটঘটি হাজার, ১তনি বলচেন পঞ্চাশ হাজার। যদি ওটা হয়, তবে খুবই ভালো।

শিবশঙ্কর ফেঁপে উঠলেন তো সেদিন। ক'বছরের কথা আর ? কি ছিল শিবশঙ্করের ? বারাসাতের কাছে ভবনহাটি। বয়ুপুর, ক্ষুদ্র গ্রাম, সেখানেই পৈতৃক বাড়ী। অবিশি নিতান্ত গরীব ছিলেন না, সেকেলে বড় গৃহস্থ, তবে ইদানীং নামেই ছিল তালপুকুর, ঘটি ডুবতো না।

নিজের বুদ্ধিতে শিবশঙ্কর সব করেচেন। বীরের মত করেচেন, বীরের মতই ভোগ করে যাচ্ছেন শিবশঙ্কর। এখনো হয় নি, লেক অঞ্চলে বড় একখানা বাড়ী করবার শখ তাঁর, কিন্তু পছন্দসই জমি পাচ্ছেন না।

তেজপুরের কাজটা যদি হাতে এসে যায়, তবে নির্ঘাত তিন লক্ষ ঘরে আসবে। হিসেব করে দেখা আছে তাঁর। এই বছরের শেষেই টাকাটা হাতে আসতে পারে, যদি বিলের টাকা গভর্নমেন্ট এ বছরেই শোধ করে। পুজো দিলে শেষের ব্যবস্থা চটপট হয়ে যাবে। শিবশঙ্করকে কাজ শেখাতে হবে না, যুযু হয়ে বসে আছেন তিনি। অনেস্টি বলে জিনিস নেই এ বাজারে। অনেস্টি একটা মুখের কথা মাত্র। কমপিটিশনের বাজার, অনেস্টিতে হয় না। টাকা...টাকা চাই, টাকা। দুনিয়াতে টাকা ছাড়া আর কিছু নেই। টাকা যে পথে আসে আশুক। টাকা রোজগারের এই তো সময়। যুদ্ধের বাজারে যে যা করে নিতে পারে। কলকাতার হাওয়ায় টাকা উড়চে...যার বুদ্ধি আছে ধরে নাও। কিছুই এখনো রোজগার করা হয় নি। অনেক কিছুই বাকী।

কেবল একটা ব্যাপার শিবশঙ্করকে বড় চিন্তিত করে তুলেচে।

বড় ছেলে বিমান প্রায়ই রাতে বাড়ী আসে না। নিজের আলাদা একখানা মোটর কিনেচে। নানা রকম কথা কানে গিয়েচে শিবশঙ্করের।

ঠিক বুঝতে পারছেন না এখনও তিনি। বিমান এমন ছিল না। বড় বৌমা প্রায়ই কাঁদেন স্নেহের মুখে শুনতে পান তিনি। গিন্নি কিছু বলেন না, এজন্তে গিন্নির ওপর শিবশঙ্কর সন্তুষ্ট নন। গিন্নির প্রশ্রয় না পেলে বিমান এমন হতে পারতো না। যত নির্বোধ নিয়ে হয়েছে তাঁর সংসার।

টেলিফোন বেজে উঠে শিবশঙ্করের চিন্তাজাল ছিন্ন করে দিলে।—
হ্যাঁ, কে ? ও আচ্ছা—বেশ বেশ। তুমি চলেই এসো এখানে। দেরি
করো না।

একটি শৌখীন বাবুমত লোক, চোখে সোনারাঁধানো চশমা, ঘরে ঢুকলো দশ মিনিট পরে। এই লোকটি ঘরে ঢোকবার পরে শিবশঙ্কর সতর্ক দৃষ্টিতে ঘরের দরজার দিকে দু-তিনবার চাইলেন। লোকটি চাপা মৃদুস্বরে মিনিট দশেক কথা বলে তারপর হঠাৎ স্বাভাবিক সুরে ফিরে এসে বললে—বেশ, যাই তা হোলে।

—বোসো, বোসো—

—বুঝতে পারলে না ? সামলে রাখতে বলিগে যাই ! সিনেমায় আজকাল নাম করে উঠেচে ঠেলে, দেখতে পরমা রূপসী—মৌমাছির কাঁক কম নয়। বুঝতে পারলে না ? ঠিক আটটাতে—

বেলা ছটার পরে শিবশঙ্কর ড্রাইভারকে ডেকে বলে দিলেন—
শোভা সিং, চলা যাও বেহালামে। বৌমাদের লে আও। হাম ট্যাক্সিমে
যায়েঙ্গে। ঠিক করে লে আও. যেন মিলিটারি গাড়ীমে ধাক্কা মং
লাগে—

—বহুৎ আচ্ছা হুজুর—বলে শোভা সিং গাড়ী নিয়ে চলে গেল।

সন্ধ্যা পর্যন্ত আপিসে নানা কাজ সেরে সাড়ে সাতটার সময় শিবশঙ্কর ট্যাক্সি নিয়ে বার হোলেন। ভবানীপুরের একটা ছোট গলির মধ্যে গাড়ী ঢুকলো। আগের শৌখীন লোকটি বারান্দা থেকে নেমে এসে বললে—এসো ভায়া, এসো—চা খাবে না ?

—আর এখন চা নয়। চলো—

—এখনো দেরি আছে। আমি কাপড় পরে নি। আসাচ—

হুজনে আবার গাড়ী নিয়ে চললেন—বেলতলা রোডের পার্কে কাছাকাছি একটা বাড়ীর সামনে এসে গাড়ী দাঁড়ালো। হুজনে সিঁড়ি বেয়ে ওপরে উঠতে লাগলেন। লোকটি বললে—আমি ফোন করে-ছিলুম, আটটার সময় সব সরিয়ে দিও। খুব সুন্দরী, আর বয়েস উনিশের বেশী নয়। নিজের চোখেই দ্যাখো ভায়া এ শর্মার নাম গোপাল চক্ৰোত্তি। মাসে চারশোতেই রাজ্য করিয়ে দেবো—তুমি শুধু দেখে যাও—সিনেমাতে আজকাল নাম কি! যত সব চ্যাংড়া ছোকরার ভিড় সেই জন্তে—

ওপরে দিব্যি পরিষ্কার পরিচ্ছন্ন সুন্দর বারান্দা, ফুলের টব সাজানো। অর্কিডের টব ঝুলচে বারান্দার ছাদের প্রান্ত থেকে।

সর্ঙ্গী লোকটি কড়া নাড়তেইও দিকের দরজা দিয়ে যে তরুণটি সিগারেট মুখে বেরিয়ে এসে পাশের সিঁড়ি দিয়ে তরতর করে নেমে গেল—শিবশঙ্কর যেন ভূত দেখলেন তাকে দেখে।

শিবশঙ্করের সর্ঙ্গী বললে—ওই দ্যাখো যত সব ছেলে ছোকরার মরণ—সিনেমার ইয়ে কিনা? আসল কমপিটিশন হচ্ছে এদের কাছে টাকায়—সে কমপিটিশনে দাঁড়ানো চ্যাংড়াদের কর্ম নয়...ও কি! দাঁড়ালে যে? কি হোলো?

শিবশঙ্কর ততক্ষণ দম নিলেন।

যে ওদিকের সিঁড়ি দিয়ে নেমে গেল, সে বিমান, তাঁর ছেলে বিমান।

র‍্যাকমার্কেট দমন কর



চিঠিখানা পাইয়া বড়ই রাগ হইল। সকালে চা পান করিয়া সবে
সেরেস্তায় আসিয়া বসিয়াছি, আর অমনি পিওন আসিল। ঘড়িতে
দেখিলাম মাত্র আটটা। বলিলাম—আজ এত সকালে ?

পিওন বলিল—না বাবু, সকাল আর কই। আপনার ছুটো মনি-
অর্ডার আছে, ভাবলাম আগে বিলি করে তবে অণ্ড জায়গায় যাই—
একট পরে মক্কেলের ভিড় হোলে তখন আপনি ফুরসত পাবেন না
হয়তো। নিন, সেই ছুটো করে দিন—পঞ্চাশ টাকা আর আটাশ টাকা
এগারো আনা—

মক্কেলদের টাকা অবশ্য। কোর্টের খরচ। বিজন মুহুরীকে ডাকিয়া
বলিলাম—দ্যাখো তো এসমাইল বদ্দি বাদী, ফজলুল গাজি বিবাদী।
কেসের তারিখটা কত ?

বিজন আমাদের সেরেস্তায় অনেকদিনের মুহুরী। আমার ও আমার
দাদার। আমার পূজ্যপাদ পিতৃদেবের আমল হইতে উহারা এখানে
আছে। বিজনের বাবা ৩রামলাল চক্রবর্তী আমার স্বর্গীয় পিতৃদেবের
মুহুরী ছিলেন। আমাকে ও আমার দাদাকে কোলে পিঠে করিয়া
মানুষ করিয়াছিলেন। বিজনের সঙ্গে বাল্যে খেলাধুলা করিয়াছি, আবার
সেই বিজন আমাদের সেরেস্তায় মুহুরীগিরি করিতেছেও আজ বাইশ
বৎসর। খুব হুঁশিয়ার লোক।

বিজ্ঞন খাতা দেখিয়া বলিল—২২শে আগস্ট। কত টাকা পাঠিয়েচে এসমাইল ?

—আটাশ টাকা এগারো আনা—

—ফেরত দিন মনিঅর্ডার, সই করবেন না বাবু—

—কেন ?

—আপনার চার টাকা আর কোর্টফির দরুন আমার কাছে ধার ছু টাকা ওর মধ্যে ধরা নেই।

—ঠিক তো ?

—ঠিক বাবু, এই দেখুন খাতা—

লিখিয়া দিলাম ‘রিফিউজ’। অশ্রুটি সই করিয়া লইলাম, মুছন্নীকে বলিলাম—টাকা দেখে নাও। ভজু চাকর আসিয়া বলিল—বাবু বাজারের টাকা—

—দাদার কাছে নিগে যা—

—তিনি বাড়ী নেই। বোরিয়ে ফেরেন নি এখনো। মা ঠাকরুন বলে দিলেন, মাছ এক সের আর মাংস এক সের লাগবে।

—মাংস আবার কি হবে আজ ? আঃ, বিরক্ত করলে সব। খরচ করেই সব উড়িয়ে দিলে। রোজ মাংস। নিয়ে যা একখানা নোট—বিজ্ঞন একখানা দশ টাকার নোট দাও তো ফেলে এদিকে। ছুধের তিন টাকা শোধ করে দিয়ে আসবি আজ। বুঝলি ?

পিওন হাসিয়া বলিল—বাবু, আপনাদের বড় সংসারে আপনারা যদি রোজ মাংস না খাবেন তো খাবো কি আমরা ? আপনাদের দিয়েচেন ভগবান খেতে। আপনারা খাবেন না ? ও আড়াই টাকা মাছের সের হোলেও আপনাদের গায়ে লাগে না, তিন টাকা হোলেও আপনাদের গায়ে লাগে না। আমরা এক টাকাতেই মরি।

পিওন ও চাকর চলিয়া গেল। যাইবার সময় আমার ইঙ্গিতে বিজ্ঞন পিওনকে একটা সিকি ফেলিয়া দিল। ছুজন চাষীলোক ঘরে

বিভূতিভূষণ : সরস গল্প

টুকিয়া বলিল—বাবু ছালাম। শরৎবাবু উকিলের বাড়ী কি এডা?

—হ্যাঁ, কেন?

—একটন মকদ্দমা আছে বাবু। আরজি করে দিতে হবে একটা—

—কি কেস? কোথায় বাড়ী?

—বাবু, আমার বাড়ী রাইপুর আর এ আমার খালাতো ভাই, এর বাড়ী ন-হাটা। আমাদের একটা আমবাগান ছিল—তা আমার চাচা হাবিবর সেখ—

মক্কেল জটিল গল্প ফাঁদিয়ে বুঝিয়া বিজন মুহুরীকে বলিলাম—
এদের কেস শোনো। আমি ততক্ষণ ডাকের চিঠিগুলো দেখে নি—
খবরের কাগজখানা চোখ বুলিয়ে যাই। যাও তোমরা ওদিকে যাও—
টাকা এনেচ সঙ্গে?

—হ্যাঁ বাবু।

—কত টাকা? আরজি করার ফি ছ টাকা লাগবে। সব জিনিসের
দাম বেড়েচে, চার টাকায় আর হবে না।

—তা দেবো বাবু ঝা লাগে—আমাদের শুভুন তবে বাবু কি
নেগগেরো, এই আমার খালাতো ভাই—

—যাও ওদিকে যাও—

এইবার ডাকের চিঠি খুলিতে খুলিতে এই চিঠিখানা পাইলাম।
পড়িয়া বিরক্তি বোধ হইল। চিঠিখানা এই—

শুভাশীর্বাদমস্তুরাশয় বিশেষ:

বাপজীবন অত্র সকল কুশল জানিবা। তোমাদের অনেকদিন
কোনো সংবাদ পাই নাই। পরে লিখি যে আমাদের গৃহদেবতা শাল-
গ্রামের পুজার জন্ত তোমরা যে ছ' টাকা এগারো আনা প্রতি মাসে
পাঠাইয়া থাক, তাহা এ যাবৎ নিয়মিত পাইয়া আসিতেছি। কিন্তু
লিখি যে বর্তমান অবস্থায় সকল জিনিস আক্কা। এক সের আলো
চাউলের মূল্য মাখমহাটির বাজারে আট হইতে দশ আনা। একটি পাকা

কলা এক পয়সা মূল্যে হাটে বিক্রয়। এ অবস্থায় পূজার দরুন প্রতি মাসে ছয় টাকা করিয়া না দিলে আর পারা যাইতেছে না। সকল দিকে বিবেচনা করিয়া আগামী মাস হইতে ছয় টাকা করিয়া পাঠাইবে। খুড়ো মহাশয় রামধন চক্রবর্তী সম্প্রতি পায়ে আঘাত পাইয়া বড় কষ্ট পাইতেছেন জানিবা। বধুমাতাদের আশীর্বাদ জানাইবা।

ইতি—

সাং বাহিরগাছি
বর্ধমান জেলা

নিত্যাশীর্বাদক
শ্রীহরিসাধন দেবশর্মা

একটু পরে দাদা বেড়াইয়া ফিরিলেন, তাঁর পায়ের শব্দ পাওয়া গেল। বিজনকে বলিলাম—একবার বড়বাবুকে ডাক দাও তো। উনি বোধ হয় সেরেস্তায় গিয়ে বসেচেন।

দাদা আসিয়া বলিলেন—কি রে ?

—এই দেখো হরি ভট্টচাজ আজ দেশ থেকে চিঠি লিখেছে, ছ টাকা না পাঠালে মাসে মাসে আর সে ঠাকুরপূজো করবে না।

দাদা পত্র পড়িয়া ক্রুদ্ধিত করিয়া বলিলেন—ও! ঠাকুর-পূজোতেও ব্র্যাক মার্কেট! দয়া করে তো টাকা দিচ্ছি। নামেই পৈতৃক ভিটে, কখনো যাইও নে। জ্ঞাতিরা বাড়ীতে আছে। ও টাকা তো স্টাইপেন্ডের সমান দিচ্ছি আমরা। বেশ, না পূজো করেন, না করবেন। টাকা এক-দম বন্ধ করে দাও সামনের মাসে। গৃহই নেই তো গৃহদেবতা।

তাহাই করিলাম। দু মাস কোনো টাকা গেল না। চিঠিপত্রও নয়।

দু মাস পরে আর এক চিঠি দেশের। খুলিয়া পড়িলাম—

শুভাশীর্বাদমন্ত্ৰ রাশয় বিশেষঃ

অত্র পত্রে কুশল জানিবা। পরে লিখি যে বাবাজীবন পৈতৃক গৃহদেবতা শালগ্রাম সেবার জন্ত যে দুটাকা এগারো আনা করিয়া মাসে

বিভূতিভূষণ : সবস গল্প

মাসে পাঠাইয়া থাকে তাহা আজ দুই মাস বন্ধ হওয়ার কারণ কিছু বুঝিলাম না; আমরা তোমাদের বংশের কুলপুরোহিত। বর্তমানে অবস্থা দরিদ্র হইয়া পড়িয়াছে। যাহা পাঠাইতেছিলে না দিলে পূজাও বন্ধ হয়, সংসারের সাহায্যও পাওয়া যায় না। অতএব টাকা পাঠাইতে বিলম্ব করিবা না। খুড়া মহাশয় সম্প্রতি মৃত হইয়া উঠিয়াছেন। পত্রপাঠ টাকা মণিঅর্ডার যোগে পাঠাইবা। বধুমাতাদের আশীর্বাদ দিবা।

ইতি—

সাং বাহিরগাছি

বর্ধমান জেলা

নিত্যাশীর্বাদক

ঐহরিসাধন দেবশর্মা

দাদাকে পড়াইলাম। দাদা বলিলেন—দাও পাঠিয়ে। বদমাশি ঠাণ্ডা হয়ে গিয়েচে। ব্ল্যাক মার্কেট করতে এসেছে ঠাকুরপুজোয়।

সেইদিনই দাদার বড় ছেলে—গুভেন্দু কলিকাতা হইতে বাড়ী আসিল। তাহার পরনে কাঁচি ধুতি দেখিয়া বলিলাম—এ কোথায় পেলি রে? কত নিলে?

গুভেন্দু প্রেসিডেন্সী কলেজের ছাত্র। দাদার বড় ছেলে। বেশ শৌখীন। সে হাসিয়া বলিল—কাকা, কত বলো তো?

—কি জানি বাপু, আমরা বুড়ো মানুষ। ও সব আগে তো পাঁচ-ছ টাকা ছিল।

—ত্রিশ টাকা একখানা। তাও লুকিয়ে এক দোকান থেকে সন্ধ্যার পর কেনা। এমনি কোথাও মেলবার জো নেই। ভাল না? জরির আজি ছাথো—

এই সময়ে দাদাও আসিলেন। দুজনেই কাপড় দেখিলাম। দেখিয়া গুভেন্দুর ক্রয়-নৈপুণ্যের যথেষ্ট প্রশংসা করিলাম।



অনুশোচনা

বালাদাস আগে সকালে উঠে ব্যস্ত হয়ে পড়লেন। আজ রবিবার, তাতে পাপস্বাকারকারীদের দল আর একটু পর থেকেই আসতে শুরু করবে। স্নান সেরে তিনি তাড়াতাড়ি তৈরী হতে লাগলেন -ভজন-মন্দিরে যাবার জন্তে।

বালাদাস আগে কংকন প্রদেশের টুঙ্গুঘাট ও পানজিম অঞ্চলের একজন নাম-করা লোক। গোয়া থেকে যাতায়াতের বড় সড়কের ওপর সেন্ট জেভিয়ারের যে ক্ষুদ্র গ্রাম্য মন্দির অবস্থিত, বালাদাস সেখানকার সহকারী পুরোহিত, সাধারণ উপাসনা করেন না বড় একটা, রবিবার সকালে পাপস্বাকার গ্রহণ করেন ও বিধি অনুসারে দণ্ড দেন। বালাদাসের পবিত্রতার জন্তে সকলে তাঁকে খুব মানে, ভয়ও করে। কনফেশনালের ক্ষুদ্র যুলবুলি দিয়ে মস্ত বড় জনারের ক্ষেত আর নীচু পশ্চিমঘাট শৈলশ্রেণীর দৃশ্য দেখতে দেখতে অপরাধী ভক্ত এক একবার যখন বালাদাসের দীর্ঘ দাড়ির দিকে চায়, তখন সত্যই নিজেকে সে

বিভূতিভূষণ : সরস গল্প

ঘোর পাপী ও অসহায় মনে না করে পারে না।

বালাদাস জর্ডনের পবিত্র জলের আধার থেকে নিজে একটু জল মাথায় দিয়ে ক্যান্সিসের চটের মত লম্বা গাউন পরে সেন্ট জেভিয়ারের ধর্মমন্দিরের বুলবুলি-জানালায় গিয়ে বসেন টুলের ওপর। গত বিশ বছর ধরে এই কাজ করে আসছেন তিনি। তায় আগে গোয়ার একজন মেসন্ ব্যবসায়ীর নকলনবিশ ছিলেন।

খুব সকালে প্রথমেই এসেছে একজন চাষী লোক।

বালাদাস তাঁর বাঁধা কাজ কলের মত করে যান। চাষী লোকের মাথায় জর্ডনের জল ছিটিয়ে দিয়ে তাঁর নিজেব সম্প্রদায়ের অম্মোমদিত ল্যাটিন মন্ত্র ভুল উচ্চারণে আব্বিও করে চলেন—

আউট ননকমিটিস্ সনকোমিটিস্ ও ডেলা জেসু

ননকমিটিস্ সনকোমিটিস্ ও ইমিড ত্রিস মারি

হিপোক্রিটিএ নিহিল স্মালভিটর এ আউট—

তার পর গ্রাম্যকৃষককে জিজ্ঞেস করেন গম্ভীরস্বরে—কি কি দোষ বলিয়া যাও। পারত্রিকের সভায় ভগবান সিংহাসনে আসীন। দেবদূত-গণ ভেঁপু বাজাইয়া শেষ বিচারের দিন তোমার কৃত সমুদয় পাপরাশি সকলেব কাছে প্রচার করিতেছে। তুমি কি কিছু লুকাইয়া রাখিতে চাও?

সংযত সাধুভাষার বাক্যে চাষা ভীত ও শুদ্ধ হয়ে পুরোহিতের মুখের দিকে চেয়ে বলল—কিছু লুকোব না হজুর। সোমবার সন্দেশে, সলোমন বালকৃষ্ণ যে কুমড়োর ক্ষেত করেছে পাশেই, সেখান থেকে ছোটো কুমড়োর জালি না বলে নিয়ে—

বালাদাস ধমক দিয়ে বললেন—বল চুরি রূপ মহাপাপ—

—আজ্ঞে, চুরি রূপ মহাপাপ করেছি। মঙ্গলবার কিছু নেই। বুধবার—

—মঙ্গলবার কিছু নেই? ভেবে দেখ। প্রত্যেক অস্বীকৃত পাপের

জগ্গে সেণ্ট জেভিয়ারের পবিত্র বেদীতে স পাঁচ আনা—

—মেরী মাতার দোহাই হজুর, মঙ্গলবার আর কিছু নেই।

—আচ্ছা বলে যাও। বুধবার—

—আমার ক্ষেতের খাম-আলু সান্তারা চুরি করে নিয়ে পালাচ্ছিল
বুরুথ টুড় আর তার ছেলে সল্ টুড়, তাদের ঢিল ছুঁড়ে পা ভেঙে
দিয়েছি।

—পা ভেঙে ?

—হ্যাঁ হজুর। পা একেবারে ভেঙে। মিথ্যে কথা বলব কেন ?

—আর তুমি যখন অপরের ক্ষেত থেকে চুরি করলে তখন বুঝি পাপ
হল না ?

—আজ্ঞে—

—বলে যাও। বৃহস্পতিবার ! পবিত্র সেণ্ট টেরেসা বোজার পবিত্র
স্মৃতিতে পুত বৃহস্পতিবার।

পুরোহিত হাঁটু গেড়ে বসে উক্ত সেণ্ট টেরেসার উদ্দেশে আত্মমি
প্রণাম করলেন। সেও তাঁর দেখাদেখি তাই করলে। তার পর বললে—
হজুর, বৃহস্পতিবার একজনের ধার শোধার কথা ছিল—দিই নি !

—ইচ্ছে করে ? মনে ছিল ?

—হ্যাঁ হজুর। টাকাটা হাতছাড়া করতে কষ্ট হচ্ছিল।

—হুঁ ! ধার করবার বেলা মনে থাকে না সেসব ? টাকা শোধ
দিয়েছ ?

—না হজুর।

—আত্মপাপ-শোধনকারীদের উচিত পাপস্বীকারে দিনই গির্জা
থেকে ফিরে গিয়ে পূর্বের ঋণটি সংশোধন করা। আজই টাকা শোধ
দেবে। তারপর ?

—তারপর শুক্রবার জীর সঙ্গে ঝগড়া করে ওকে বলেছিলাম, তুমি
বাপের বাড়ী চলে যাও—

বিভূতিভূষণ : সবস গল্প

—শনিবার ?

—আজ্ঞে—আজ্ঞে—

—বল ।

চামা ছবার টোক গিলে বলল—আজ্ঞে ব্যাপারটা একটু—

—বল ।

—আজ্ঞে ও পাড়ার মজলদাসের শালী এসেছে পানজিম থেকে ।
তাকে দেখবার জন্তে, রাস্তার হাঁদার পাশে যখন মেয়েরা চান করছিল,
তখন বড় ডুমুর গাছের তলায় দাঁড়িয়ে আড়াল থেকে দেখছিলাম ।

বালাদাস ছুই গালে হাত দিয়ে বললে—কি সর্বনাশ ! কেন ?

—আজ্ঞে তা যখন বলতেই এসেছি তখন বলব । মজলদাসের শালী
নামকরা সুন্দরী পানজিমের । সেখানে কী নাচঘরে কাজ করে । অমন
গাইতে নাচতে কেউ জানে না এ দেশে । গরবা নাচ খুব ভাল নাচে ।
খুব ভাল নাচ, সেবার এসে নেচে খুব নাম করে গিয়েছিল সে ।

বালাদাসের অস্পষ্ট মনে পড়ল শুনিয়েছিলেন বটে পানজিমের একটি
সুন্দরী মেয়ে গরবা পরবে হিন্দুদের উৎসব-দিনে বটতলায় অঙ্কিত নাচ
নেচেছিল ।

তিনি ঝুঁকুটি করে বললেন—হঁ । বড় উৎসাহ দেখা যাম্ছে যে ।
ক'বার দেখেছিলে ।

—আজ্ঞে তা চার বার ।

—চার বার ?

—আজ্ঞে হ্যাঁ হুজুর । মিথ্যে কথা কেন বলব ।

—না, তুমি সত্যগ্রহী পল । মেয়েটি কত বড় বললে ?

—আজ্ঞে, তা যুবতী । লেখাপড়া জানে । মজলদাসের সংসারের
অর্ধেক খরচ তো সেই পাঠায় পানজিম থেকে হুজুর ।

—কি নাম ?

—সখীবাই ।

—আচ্ছা যাও ।

চাষা চলে গেল ।

নিজের অপরাধের ভারে তার মন এত ভারাক্রান্ত যে বাড়ীতে গিয়ে সে রাঙা মাদ্‌সা চালের ভাত আর খামআলুর তরকারি খেতেই পারলে না । কংকন উপকূল গোধূম উৎপন্ন করে না । ভাতমাসে জনার আর এই মাদ্‌সা ধান উঁচু জমিতে জন্মায়—অন্য নীচু জমিতে হৈমন্তী ধান । মাদ্‌সা ধান যাট দিনে পাকে বলে গরীব চাষীরা অর্ধেক জমিতে এর চাষ করে, সকালে উঠে ঐ ধানের রাঙা মিষ্টি ভাত পেট ভরে খেয়ে মাঠের কাজে বেরিয়ে যায় ।

তুপুর ঘুরে গেল । মাঠে বসে বসে চাষা ভাবলে কাজটা খারাবি হয়ে গেল সন্দেহ নেই । সেজন্য বকুনিও যথেষ্ট খেয়েছে সে মাননীয় পুরোহিত বালাদাসের কাছে ।

তবে একটা কথা ।

সখীবাই এখানে চিরকাল থাকতে আসে নি ।

তিন চার দিন পরে পানজিমে চলে যাবে । যাবেই ।

আজ না হয় সে জনার ক্ষেতের কাজ শেষ করে বিকেলে ফেরবার পথে সোজা বাড়ী না গিয়ে ওপাড়া দিয়ে একটু ঘুরে সখীবাইকে আর একবার দেখে যাবে এখন ।

ও রকম মেয়েছেলে এদিকে হর-হামেশা বড় একটা আসে না । না হয় এই অপরাধের জন্তে সে আগামী রবিবারে বাতি দেবে সেণ্ট জেভিয়ারের দরগায় । পুরোহিত কিছু জরিমানা করবেন একই অপরাধ ছবার করবার জন্তে ।

একটাকা স পাঁচ আনা । তা দেবে সে । গোয়ার পাইকারদের কাছে এক গাড়ি কুমড়ো বিক্রি করলে উঠে আসবে এখন ও পয়সা ।


কাজ শেষ করে বিকেলের দিকে সে গুটি গুটি চলল মঙ্গলদাসের পাড়ার দিকে আস্তে আস্তে । সে ইদারার অদূরবর্তী বড় ডুমুর গাছটার

বিত্তভিক্ষণ : সরস গল্প

আড়ালে গিয়ে দাঁড়াল। ডুমুরের যে ঝাড় ঝাড় কাঁদ নেমেছে বৃদ্ধ মহা-
পুরুষদের দাড়ির মত, তারই ওপাশে কে যেন একজন মাথা মীচু করে
দাঁড়িয়ে না ?

—কে রে ?

চাষা গুঁড়ির এদিক থেকে ওদিকে ঘুরে গিয়ে দেখলে—ক্যান্সিসের
চটের গাউন পরে লম্বা চুলদাড়ি কাঠের চিরুনি দিয়ে অঁচড়ে ডুমুর
ঝাড়ের তলায় চোরের মত দাঁড়িয়ে আছেন স্বয়ং বালাদাস পুরকোয়াস
আপ্তে, পুরোহিত।



পথিকের বন্ধু

মহকুমার টাউন থেকে বেরুলাম যখন, তখনই বেলা যায় যায় ।

কলকাতা থেকে আসছিলাম বরিশাল এক্সপ্রেসে । বারাসাত স্টেশনে নিতান্ত অকারণে (অবশ্য যাত্রীদের ব্যাখ্যা অনুযায়ী) উক্ত বরিশাল এক্সপ্রেস চল্লিশ মিনিট কেন যে দাঁড়িয়ে রইল দারুণদ্রব্ধবৎ অনড় অবস্থায় তা কেউ বলতে পারলে না । গন্তব্যস্থান বনর্গায়ে পৌঁছে দেখি রাণাঘাট লাইনের গাড়ী চলে গিয়েচে ।

বেলার দিকে চাইলাম । বেশ উঁচুতেই সূর্যদেব, লিচুতলা ক্লাবে খানিকটা বসে আড্ডা দিয়ে চা খেয়ে ধীরে সুস্থে হেঁটে গেলেও এই পাঁচ মাইল পথ সঙ্কারণ আগেই অতিক্রম করতে পারা কঠিন হবে না । রামবাবু, শ্যামবাবু, যত্ন ও মধুবাবু সবাই বেলা পাঁচটার সময় ক্লাবে বসে গল্প করছিলেন । আমায় দেখে বললেন—এই যে বিভূতি, এসময় কোথেকে ?

—কলকাতা থেকে ।

—বাড়ী যাবে ? ট্রেনে গেলে না ?

—ট্রেনটা ফেল হয়ে গেল, বরিশাল এক্সপ্রেস চল্লিশ মিনিট লেট ।

—এসো, খুব ভাল হয়েছে এক্সপ্রেস লেট হয়ে । বোসো চা খাও ।

তারপর গল্পগুজবে (যার বারো আনা পরনিন্দা) সময় হ হ করে কেটে গিয়ে কখন যে গোধূলির পূর্বমুহূর্ত উপাস্থত হয়েছে, তা কিছু বলতে পারি নে । যেতে হবে এখনো অনেকটা রাস্তা, আর দেরি করলে

বিভূতিভূষণ : সরস গল্প

পথেই অন্ধকার হয়ে যাবে, বৃষ্টিও আসতে পারে, কারণ বর্ষাকাল, জ্রাবণ মাস। বড় রাস্তায় উঠে সত্যিই দেখলাম আড্ডা দিতে গিয়ে সময়ের আনন্দাজ বুঝতে পারি নি। তাড়াতাড়ি হাঁটতে লাগলাম, পশ্চিম আকাশে মেঘ করে আসচে।

চাঁপাবেড়ে ছাড়িয়েচি, রাস্তায় জনমানব নেই, পথের দুপাশে ঘন জঙ্গলে পটপটির ফুল ফুটেচে, গন্ধ ভেসে আসছে জেলো বাতাসে, শেয়াল খস্ খস্ শব্দ করে চলে গেল পাতার ওপর দিয়ে দিয়ে, বিলিতি চটকা গাছের ডাল বেয়ে বুলে পড়েচে মাকাললতা। কলকাতা থেকে হঠাৎ এসে বেশ লাগচে এই নির্জনতা।

চাঁপাবেড়ের পুল ছাড়িয়ে কিছুদূর গিয়েচি, এমন সময় দোঁখ একটি লোক কাঁধে বাঁক নিয়ে আমার আগে আগে যাচ্ছে।

আমার পায়ের শব্দে সে চমকে পিছন ফিরে আমার দিকে চাইলো।

ওকে এপথে একা দেখে একটু আশ্চর্য হয়েচি। এ বনপথে এ সময় কেউ একা বড় একটা হাঁটে না।

বললাম—কোথায় যাবি ?

—আজ্ঞে, গোপালনগরে।

—বাঁকে কি রে ?

—দই আছে।

—এত দই কি হবে ?

—নিবারণ ময়রার বাড়ী বায়না আছে। তেনাদের বাড়ী আজ খাওয়ান দাওয়ান।

—তোদের বাড়ী কোথায় ? দই আনচিস কোথা থেকে ?

—আজ্ঞে, বেনাপোল থেকে।

—বলিস কিরে, এই দশ মাইল দূর থেকে দই আনচিস ! তা এত দেরি করে ফেললি কেন ?

লোকটার কণ্ঠস্বরে মনে হয়েছিল ও আমাকে সর্জা হিসেবে পেয়ে

বাঁচলো এই সন্দেবেলা । একা যেতে ওর নিশ্চয় ভয় করছিল ।

আমার প্রশ্নের উত্তরে সে গল্প জুড়ে দিলে কেন তার দেরি হল দই নিয়ে রওনা হতে । ওদের একটা গোরু হারিয়ে গিয়েছিল আজ পাঁচ-দিন । খুঁজে খুঁজে হয়রান হয়ে গিয়েছিল । আজ ছপুরের পর হিজোল-তলার বাঁওড়ে সেই গোরুকে চরতে দেখা গেল । তারপর ওরা দল বেঁধে বেরুলো গোরু আনতে । গিয়ে দেখে বাঁওড়ের ধারে একটা লোক বসে আছে, তার কাছেই ছ'টা গোরু একসঙ্গে চরচে । সবগুলোই বিভিন্ন গ্রামের হারানো গোরু, ক্রমে জানা গেল । লোকটা ত ওদের দেখেই দৌড়—ইত্যাদি ।

এইবার বেশ সন্দেহ হয়ে এসেচে ।

বাঁশ-আমবনের ভেতরে ভেতরে ঘুলি ঘুলি অন্ধকার ।

সামনে একখানা শুকনো কাঠ উঁচু চটকা গাছের মাথা থেকে ভেঙে পড়তেই ও চমকে উঠে বললে—ও কি ? আমি হাসি চেপে বললাম—চটকা গাছের ডাল । লোকটা আশ্বস্ত বললে—ও ।

—তোমার নাম কি ?

—নিধিরাম ।

—বাড়ী ?

—কটক জিলা ।

—সত্যি ? তুমি তো বেশ বাঙালীর মত কথাবার্তা বলচো ।

—তা হবে না বাবু ? বেনাপোলের কাছে কান্দুন্দিয়াতে আমার পনেরো বছর কেটে গেল । ওখানে আমার গোরুর বাখান । কুড়িটা গাইগোরু পনেরো-ষোলটা বকুনা বাছুর, মস্ত বাখান । রোজ আধ মণ দুধ হয় । ঐড়ে বাছুর আমরা রাখিনে, শুধু বকুনা বাছুর রেখে দিই । ঐড়ে বক্রী করে ফেলি বাবু—

লোকটা একটু বেশি বকে । আমাকে পেয়ে ওর বকুনি আর থামতে চায় না । একা যাচ্ছিল, আমায় পেয়ে ও ভারি খুশি হয়েছে, ভরসা

বিভূতিভূষণ : সরস গল্প

পেয়েচে, এই সন্দেরবেলা ।

বললে—বৃষ্টি আর হল না বাবু, কি বলেন ?

—সেই রকমই তো দেখছি ।

—এবার বড় ছুবচ্ছর । আমন ধানের রোয়া হল কই ? বীজপাতা ছিল ছু কাঠা ভুঁই । সে বীজ লালচে হয়ে আসচে । ওই দেখুন, কেমন মেঘ করে আসছিল, আবার ফর্সা হয়ে এল ! এবার আমাদের এদিকে খুব কম বৃষ্টি হয়েছে । আমন ধানের রোয়া হয়নি, চাষামহলে হাহাকার পড়ে গিয়েচে, ধানের দর ছিল চারটাকা মণ । এখন উঠেচে সাড়ে সাত টাকা মণ ? গরিব দুঃখী লোকেরা এর মধ্যে উপোস শুরু করে দিয়েচে ।

আমায় আবার বললে—গোরুগুলো অনেক কষ্ট করে মালুস করা । এবার বিচুলি অভাবে মারা পড়বে বাবু ।

—কাঁচা ঘাস কেটে খাওয়াবে ; বর্ষাকালে কোনো গোরু বিচুলি খায় ? সবই কাঁচা ঘাস খেয়ে বাঁচে ।

—বেত্না নদীর ধারে আগে আগে কত কাঁচা ঘাস পাওয়া যেতো, এখন সব আঁটি বেঁধে এনে এনে বনগাঁ শহরে বিক্রী করে । শহরে বাবুরা চার আনা চোদ্দ পয়সা এক আঁটি কিনচে । আমাদের গোরুর ঘাস নিয়েই মুশকিল । ওটা কি বাবু ?

এইবার লোকটা চমকে উঠে যেন আমার গা ঘেঁষে এসে থমকে দাঁড়ালো ।

আমি বললাম—কই, কি ?

—ওই যে সাদা মত ?

চেয়ে দেখলাম, কিছুই না । মাকাল লতার মোটা সাদা লতা গাছের ডাল থেকে ঝুলে ছলচে অন্ধকারে । লোকটা দেখাচি বিষম ভীত ।

হঠাৎ আমার মনে একটা ছুঁত বুদ্ধি জাগলো ।

আমায় ও বললে—বাবু, আপনি কোথায় যাবেন ?

—আমি একটু গিয়ে ডানদিকের রাস্তায় নেমে যাবো। ওখানেই আমার গাঁ।

—গোপালনগর এখন কতদূর আছে ?

—তা দেড় মাইল।

—পথে কোনো ভয়-টয় নেই তো ?

আমি জ্বরে ঘাড় নেড়ে বললাম—না, ভয় কিসের। এ অঞ্চলে বাঘ-টোষ নেই। বুনো গুয়োরও নেই। সে বললে—আমি বাঘের কথা বলিনি বাবু—বলি এই—সন্দেবেলা আবার নাম করতে নেই—সেই তাঁদের—

—ও, ভূতপ্রেতের ?

—ও নাম করবেন না সন্দেবেলা। রাম রাম রাম রাম ! ও নাম কি করতে আছে এ সময় ? রাম রাম রাম রাম—

আমি অতি কষ্টে হাসি চেপে বললাম—ও, বুঝিচি। তবে একটা কথা, যখন তুমি বিদেশী লোক, তখন তোমাকে সব খুলে বলাই ভালো।

—কি বাবু ?

—দাঁড়াও এখানে। আমি তো এখনি নেমে যাবো, তুমি একা যাচ্চ এতটা পথ—অন্ধকারে—পথে জনপ্রাণী নেই—। আমার বর্ণনার বহর শুনে লোকটা আরও আমার দিকে ঘেঁষে দাঁড়ায়। আমার মুখের দিকে হাঁ করে চেয়ে বললে—তারপর বাবু ?

—তারপর আর কি, তোমাকে বলা আমার উচিত নয়, কিন্তু যখন জিগ্যেস করলে তখন না বলাটা তো ঠিক নয়। বিশেষ করে একা যখন যাচ্চ। সঙ্গে নেই লোক। ওই যে একটা সাঁকো আছে রাস্তার ওপর বনের পাশে, ওই সাঁকোটা বড় খারাপ জায়গা।

—কেন বাবু ?

—ও জায়গাটাতে ভূত—মানে গুঁরা সব আছেন কিনা ! পাশে ফে

বিভূতিভূষণ : সবস গল্প

বড় বাগান, ওটার নাম গলায়-দড়ের আমবাগান। বড় খারাপ জায়গা। অনেকদিন আগে তখন আমি ছেলেমানুষ, একবার একজন এই তোমার মতই বিদেশী লোক একা যাচ্ছিল গোপালনগরে, সন্দের পর। তার পর-দিন সকালবেলা দেখা গেল কিসে তার ঘাড়টা ভেঙে মেরে ফেলে রেখেচে সাঁকোর তলায়। এ আমার নিজের চোখে দেখা। কথাটা তোমায় বলা উচিত নয়, তবে যখন জিগ্যেস করলে, তখন চেপে রাখাও তো উচিত নয়। একটা বিপদ হতে দোর লাগে না, তখন তুমি বলতে পারো বাবু, আপনি জেনে-শুনেও আমায় বলেন নি কেন। সন্দের পর কেউ ও পথে যায় না। প্রাণ হাতে করে যেতে হয়। আজ বছর দুই আগে এক রাখাল ছোঁড়া দিনছপুয়ে অজ্ঞান হয়ে পড়েছিল সাঁকোর তলায়। যাক সে, তুমি রাম রাম বলতে বলতে চলে যাও, কোনো ভয় নেই।

—বাবু, আপনি কি নেমে যাবেন ?

—হ্যাঁ, আগে আমার গাঁয়ের রাস্তা নেমে গেল। আমি এইবার চলে যাবো।

—তাই তো বাবু, একা আমি কি করে যাবো ?

—রাখে কেউ মারে কে ? মারে কেউ রাখে কে ? কপালে মৃত্যু থাকলে কেউ সামলাতে পারে না। না থাকলে কেউ মারতে পারে না। রাম রাম বলতে বলতে চলে যাও। দাঁড়াও, আজ আবার তিথিটা কি ? চতুর্দশী। তিথিটা ভালো নয়। অমাবস্বে, চতুর্দশী, প্রতিপদ এই তিথিগুলো খারাপ।

—কেন, কেন বাবু ?

—সে আর তোমাকে বলে কি হবে ? তুমি সন্দের অন্ধকারে একা রাস্তার ওপর—যেতে হবে এখনো তোমায় এক ক্রোশ পথ। ক্রমশ যুটযুটে অন্ধকার হয়ে আসচে। তবে তোমায় বলা আমার উচিত—বিদেশী লোক, তোমায় সব কথা খুলে না বলাটাও ঠিক নয়। একটা

বিপদ হোতে কতক্ষণ ? তখন তুমি আমায় দোষ দিতে পারো। এই সব তিথিতেই ভূত প্রেত—পিশাচ ব্রহ্মদত্তি—

লোকটা বলে উঠলো—রাম রাম রাম রাম—ও সব নাম করবেন না বাবু—

—মানে ওঁরা সব বার হয়ে থাকেন কিনা—

—তাই নাকি ? তবে তো—

—আবার কি জ্ঞান, এই চতুর্দশী তিথিতে গলায় দড়ি দিয়ে অপমৃত্যু ঘটেছে এমন ভূতেরা বার হয়। আমি একবার বড় বিপদে পড়েছিলুম—

লোকটা আড়ষ্ট সুরে বললে—কি বাবু ?

—একটা শ্মশানের ধার দিয়ে সেবার যাচ্ছিলাম। সেও এই ভূত-চতুর্দশী তিথি। দেখি যে অন্ধকারে গাছের ডাল থেকে কি একটা যেন ঝুলচে—কাছে গিয়ে দেখি একটা মেয়ে-মানুষ গলায় দড়ি দিয়ে ঝুলচে আর হিঃ হিঃ করে হাসচে—

লোকটা আঁৎকে উঠে বললে—কি সর্বনাশ !

—যাক্, ওই আমার রাস্তা নেমে গেল। আমি চললাম এবার। যাও তুমি, একটু সাবধানে যাও, সাবধানের মার নেই।

কথা শেষ না করেই আমি আমাদের গ্রামের পথে নেমে পড়লাম।

ও কঁাদো-কঁাদো সুরে বললে—বাবু, আমাকে একটু এগিয়ে নিয়ে মাকোটা পার করে ছান যদি—

আমি শিউরে বলে উঠি—আমি ? আমার কন্ম নয়। আমাকে তার-পর এগিয়ে দেবে কে ? বাবারে, প্রাণ হাতে করে যাওয়া ওসব জায়গায়। একে আজ ভূতচতুর্দশী—

—রাম রাম রাম রাম !

—তুমি চলে যাও একটু জোর পায়। আবার রাস্তাও তো কম নয়, তোমাকে যেতেও হবে একমাইল দেড়মাইল রাস্তা আর এই অন্ধকার। আচ্ছা চলি—তুমি বিদেশী লোক, জিগ্যেস করলে তাই এত কথা বলা।

বিভূতিভূষণ : সরস গল্প

নইলে কি দরকার ?

আমাদের রাস্তায় নেমে কয়েক পা মাত্র এগিয়েছি, লোকটা দেখি ডাকচে—বাবু, বাবু, একটা কথা শুনুন—ও বাবু—

পিছন ফিরে দেখি কাঁধের বাকটা একটি শিশুগাছের তলায় নামিয়ে দাঁড়িয়েচে।

বললাম—কি ?

—দইগুলো নিয়ে আমি এখন কি করি বাবু ?

—কি আর করবে ? বায়না রয়েছে, একমুঠো টাকা। দিয়ে এসো। রাত হয়ে গিয়েচে, ওদের খাওয়ানোর সময় হল। রাম ব'লে এগিয়ে পড়ো—সাবধানে যেও—। আর কোনো কথা না বলে আমি হন হন করে হাঁটতে আরম্ভ করলাম।

ও শুনলাম আবার ডাকচে—ও বাবু, ও বাবু—শুনে যান— একটা কথা, ও বাবু— ! দূরে ওর গলার সুরটা যেন আত্মনাদের মত শোনাচ্ছিল।



কলহাস্তরিতা

শ্রাম সরকার আমাকে ডেকে বললে—শোন বাবা, 'একটু বোসো।

হাট-বাজার করে ফিরছিলাম, বেলা হয়েছে, বেশি বসবার সময়ও নেই।

শ্রাম সরকার বুড়ো হয়েছে, বড় বকে। আমার এখন ওর বকুনি শুনবার সময় নেই। তবুও বললাম—কাকা ভাল আছেন?

শ্রাম সরকার ওর দোতলা বাড়ীর সামনে বসে মালা জপ করছে। আমি ওকে মালা জপ করতে দেখছি এইভাবে বসে আজ ত্রিশ বছর। লোকটা ঝান্সু বিষয়ী, টাকা ধার দিয়ে তার সুদ থেকে চালায়। আবার গীতার ব্যাখ্যাও করতে শুনেছি ওকে। এদিকে মামলা মোকদ্দমা করতে ছাড়ে না, তাও দেখতে পাই।

শ্রাম সরকার বললে—এসো বাবা, বোসো। চোখেও আজকাল খুব ভাল দেখি নে—একটা কথা শোনো। আমার একটা উপায় করে দাও বাবা—

—কি উপায় কাকা? কিসের উপায়?

আমার ছেলে বিষ্টু বড় বদ হয়ে উঠেছে। দিন রাত কেবল আমার সঙ্গে ঝগড়া। আমায় বলে, বিষয়-সম্পত্তির ভাগ দাও। বসে বসে খাবে কেবল। কোন কাজ করবে না। ওবেলা তো আমার মামতে এসেছিল। এর একটা—

—কাকীমা কিছু বলেন না ?

—তাহলে আর ভাবনা ছিল কি ? সেও ছেলের দিকে । দু'জনে মিলে আমাকে তাড়াতে পারলে বাঁচে । এর একটা বিহিত করো বাবা—

—আমি এর কি বিহিত করবো বলুন । বিষ্টে আমার কথা কি শুনবে ? মিছে মিছে অপমান হওয়া ।

—অপমান করলেই হোল অর্মান ? তোমরা হলে সোনার চাঁদ ছেলে
—তোমরা এর একটা প্রতিকার করতে পারবে না ?

—মাপ করবেন কাকা । আপনাদের গৃহবিবাদের মধ্যে আমাদের থাকবার দরকারই বা কি ? ও আমার দ্বারা হবে না ।

এ দিনটি কোনো রকমে নিস্তার পেয়ে এলাম বটে কিন্তু পরদিন আবার গ্রাম কাকা আমায় ধরেচে রাস্তায় । বিকেলে তাস-খেলায় আড্ডায় বেরাচ্ছ, গ্রাম কাকা বললেন—শোনো বাবা—

—এখন একটু ব্যস্ত আছি কাকা । শুনব এখন অন্য সময়—

—ওই বাবাজি তোমাদের দোষ । একটুখানি দাঁড়াও না ? এই ছাখো তোমার খুড়ীমা আমায় আজ কি করে মেরেচে—

—মেরেচেন ? খুড়ীমা !

—মিথ্যে কথা বলচি বাবা ? হয় না হয় তুমি ললিতকে জিজ্ঞেস ক'রে ছাখো । আমায় রক্ষা কর বাবা । আমায় আজ খেতে দেয় নি, দুটো ভাতও দেয় নি । আমায় বাঁচাও—

কথা শেষ ক'রে গ্রাম কাকা আমার হাত দুটো খপ করে ধ'রে ফেললেন ।

অগত্যা গ্রাম সরকারের বাড়ীর মধ্যে আমায় ঢুকতে হোল ।

ঢুকে বললাম—ও খুড়ীমা—

গ্রাম কাকার বাড়ীর মধ্যে অনেকগুলো ঘর । ওদিকে শান-বাঁধানো বড় রোয়াক, টিউবওয়েল, পাকা রান্নাঘর, গোয়াল—বেশ সম্পন্ন

গৃহস্থের গৃহস্থালির সুস্পষ্ট চিহ্ন সর্বত্র। কিন্তু ওদের সংসারে যে শাস্তি নেই, তা এ গ্রামে সকলেই জানে। এদের বাইরের ঠাট যেমনই হোক, ভিতরে অনেক পরিমাণে অন্তঃসারশূন্য।

খুড়ীমা তালের বড়া ভাজবেন বলে তোড়জোড় করছিলেন, কারণ হাতে তালের গাঢ় হলদে রস মাখা; রান্নাঘর থেকে বাইরে এসে খুড়ীমা রোয়াকে দাঁড়ালেন—যেমন লম্বা, তেমনি চওড়া, লাল-চওড়া-পাড় শাড়ী পরণে, পায়ে আলতা, মাথায় একটাল চুল, মুখশ্রীতে প্রোচা সুন্দরার গভীর স্থির মৌন্দর্য। আমার দিকে চেয়ে বললেন—কে রমেশ? কি বাবা?

আমতা আমতা ক'রে বললাম—এই খুড়ীমা, বল্‌চি কি—

কথা বেধে যেতে লাগলো। খুড়ীমার ঝঙ্কার ও দাপটের খ্যাতি এ গ্রামে পরিব্যাপ্ত হয়ে জুড়ে বসেচে অনেক কাল থেকে। সকলেই জানে কি রকম চিঙ্ক তিনি। এই সন্ধ্যাবেলা শেষে কি গোলমাল বাধাবো? ভাল হাঙ্গামাতেই পড়েছি! বেশি পরোপকারের প্ররক্তি থাকলেই এ রকম বিপদে পড়তে হয়, এ আমি লক্ষ্য ক'রে আসচি বরাবর থেকে।

খুড়ীমা রুক্ষ নীরস কণ্ঠে বললেন—আমার আবার সময় নেই। তালের গোলা মাখচি দেখতেই পাচ্চ বাপু। কি বলবে বল—

খুড়ীমা ঝান্সু মেয়েমানুষ, নিশ্চয়ই বুঝেচেন আমি কি বলবো।

শক্তি সঞ্চয় ক'রে বললাম—কাকা নাকি আজ খান নি—ওঁর এ বয়সে ঠিক সময়ে খেতে না পেলো—

খুড়ীমা আমার সামনে এসে হাত নেড়ে বললেন—ওই বুড়ো বদ-মায়েশ লাগিয়েচে বুঝি? তা লাগিয়ে আমার কি করবেন শুনি? গাঁয়ের লোকে কি চাল কেটে আমায় উঠিয়ে দেবে গাঁ থেকে? হ্যাঁ, খেতে দিই নি! বুড়োর বচনে পিত্তি জ্বলে যায়, সে বচন যদি শোনো বাবা, তখন তুমিও বলবে যে হ্যাঁ, বচন বটে একথানা। আমার ওই ধুলোওঁড়োটুকু নিয়ে সংসার করচি বাবা, আমার শিব রাত্তরের শলুতে টিম্‌ টিম্‌ ক'রে

জলচে, ওই আমার বিষ্টু—ওকে বুড়ো বলে কি না, পয়সা না রোজকার করিস তো বাড়ী থেকে বেরো। তুমিই বলো দেখি বাবা, বিষ্টু বাড়ী থেকে বেরিয়ে ভিক্ষে করে বেড়াবে, আর আমি বসে থেকে ওই বুড়ো ভৃত্যকে ক্ষীর-সর-ননী খাওয়াবো ? তাই বলি ছাই খেতে দেবো তোমাকে। তাই খেতে দিই নি—সোজা কথাই তোমাকে বললাম, এখন তুমি আমার কি করবে করো—

আমি জিভ কেটে বললাম—সে কি কথা খুড়ীমা, ছি ছি—আমি আপনার সন্তানের মত—এ সব কথা আমাকে—

খুড়ীমা বললেন—বোস বাবা, তালের বড়া ভাজচি, খেয়ে যাও গরম গরম—

আমি বললাম—সে হবে এখন। কাকাকে আপাততঃ কিছু খেতে দিন, ওঁর খাওয়া হয় নি সারাদিন। ডেকে আনবো ?

খুড়ীমা মুখ বুঝিয়ে বললেন—না। অত আতিশ্যয়ো তোমার করবার কোন দরকার দেখি নে তো !

—দরকার বেশ দেখা যাচ্ছে, খুড়ীমা ! কাকাকে ডেকে আনি, দেখুন—বুড়ো মানুষ, ওরকম করবেন না। কিছু খেতে দিন ওঁকে।

—আচ্ছা, একটু পবে যেও। তালের বড়া একখোলা নামাই—পোড়ারমুখে না হয় গরম গরম ছ'খানা দেবেন এখন বুড়ো, যমের অরুচি—

—ছি খুড়ীমা, অমন ক'রে বলা আপনার উচিত হয় ? বলবেন না ওরকম।

পিছনের দিকে দোরের কাছে কখন শ্যাম কাকা এসে ছ'কো হাতে দাঁড়িয়েছেন, টের পাই নি। তিনি অমনি দোর থেকে বলে উঠলেন—শুনচো তো বাবাজি ? শোনো, নিজের কানে শুনে যাও তোমার খুড়ী-মার বচন—মধু ঢেলে দিচ্ছে একেবারে কানে। ওই মাগী যদি এ ভাবে—সংসার উচ্ছন্ন দিলে ওই বদমাইশ মাগীই তো—

এর পর উভয়ে ধুমুসার ঝগড়া বেধে গেল। আমি কিছুক্ষণ উভয়-
পক্ষকে নিরস্ত করার বৃথা চেষ্টার পরে সেরে পড়বার যোগাড় করছি,
এমন সময় খুড়ীমা ডাকলেন—কোথায় যাও বাবা? দাঁড়াও, তালের
বড়া খেয়ে যাও—

আর তালের বড়া! যে কাণ্ডটা ছুজনে সন্ধ্যাবেলা বাধালেন, ভাবলাম
একবার বলি।

মুখে বললাম—আচ্ছা খুড়ীমা, আমি বসচি। আপনারা দয়া ক'রে
একটু চুপ করবেন?

খুড়ীমা আর কোন কথাটি না বলে রান্নাঘরের মধ্যে ঢুকে গেলেন।

শ্রাম কাক। আমাকে চুপি চুপি বললে—তুমি একটু বলো বাবাজি,
হু'খানা তালের বড়া যেন আমাকেও দেয়—বড্ড খিদে পেয়েছে। আমি
ততক্ষণ হরিনামটা সেরে নই—সন্দেশ হয়ে এল—

আমায় কিছু বলতে হোলো না। খুড়ীমা ছোটো কাঁসার জাম-বাটিতে
তালের বড়া নিয়ে এসে বললেন—অমুক বুড়ো (খুড়ীমার ব্যবহৃত
বিশেষণটি অশ্লালতা-দোষদৃষ্ট বলে এখানে উল্লেখ করা গেল না) কোথায়
গেল?

—আজ্ঞে তিনি সন্ধ্যা আহ্নিক করতে গেলেন—

—ওর মুণ্ড আহ্নিক। ডেকে ডাও, খেয়ে তান আমার মাথা
কিমুন—

আমি ডেকে আনলাম বাইরে ঘর থেকে।

খুড়ীমা কিন্তু আমাকে অবাক ক'রে দিলেন শ্রাম কাকাকে ডেকে
আনবার পরে। আমার অন্তত্বই যেন তিনি ভুলে গেলেন। শ্রাম
কাকাকে তালের বড়া খাওয়াতেই তাঁর সারা মন যেন ঢেলে দিলেন।
তবে সম্বোধনের বাণী মধুর ছিল না, মধুর তো দূরের কথা, শিষ্ট বা ভদ্রও
ছিল না।

নমুনা কিছু নীচে দেওয়া গেল—

—গেলো—যমের অরুচি—গেলো। তা ভালো হয়ে বোসোও না হয় ? কোন্ মড়ার ঘাটে তোমার জন্তে বাঁশ তৈরি রয়েছে যে আজ সারা দিন বাইরে বসে থাকা হয়েছিল শুনি ? আমার তো বড্ড দোষ, দেশ পিরখিম তো ছেয়ে ফেললে আমার অপযশ গেয়ে। এখন তাবা এসে তোমায় গিলতে দিক দেখ ? বলি মুখে বসতে সবাই আছে, ছুটি বেলা পিঁণ্ড সেদ্ধ করবার বেলা কোন্ যম তোমার আছে শুনি ? দাঁড়াও, আর ছু'খানা গরম গরম এনে দিই—তাড়াতাড়ি কিসের শুন ? বলে সেই এক কড়ার মুরোদ নেই, নাম গঙ্গারাম—হাঁদকে তেজটুকু আছে ষোল আনার ওপর সতেরো আনা। সে-বার আশ্বিন মাসে যখন দাঁত ছরকুটে বিছানায় পড়ে জ্বরে বেহুঁশ হয়েছিলে, তখন দেখে নি এসে পাড়ার লোক ? এই মাগীর তো যত দোষ, এহ মাগী না থাকলে যে কোন্ কালে শ্মশানঘাট আলো করতে ? শেয়াল-শকুনে হাড়-মাংস ছেঁড়াছোড় করতো ? পেট ভরেচে ? না গুড় দিয়ে ছু'খানা খাবে ? ভাল হয়েচে ? তবু তো নারকোল পড়ে নি। বাড়ীর লোক নারকোল এনে দেবে তবে তো হবে ? তা না সকাল থেকে শোনো শুধু ঝগড়া আর ঝগড়া—যম ভুলে রয়েছে কেন ? যমে তোমায় নেয় না ? পান ছেঁচে আনবো ? ঠাণ্ডা হাওয়া হচ্ছে—পূবে স্ত্রীওটা দেখা দিয়েচে—এঁণ্ডখানা নিয়ে আস, গায়ে দিয়ে গিয়ে বোসো—নইলে সর্দি-কাশির থুতু গয়েরে ঘর ভরিয়ে ফেললে সে তোমার যমকে ডেকে এনে পবিত্তাব করিয়ো বলে দাঁচ্চ স্পষ্ট কথা—এই স্ত্রীও গামছা—

খুড়ীমার স্বামী-শুশ্রূষার আতশয্যে আমি কোথায় তলিয়ে গেলাম, একবার মাত্র আমার বাটিতে তালের বড়া দিয়ে আর আমার দিকে তিনি ফিরেও চাইলেন না।



অসমাপ্ত

কোমগরে সাহিত্য-সভা কারতে গিয়াছিলাম।

আমিই সভাপতি। টানা মোটরে কলিকাতা হইতে আমায় লইয়া যাওয়া হইয়াছে। সভাস্থলে পৌঁছিয়া বেজায় খাতিব, কলিকাতা হইতে সমাগত আরও কয়েকজন সাহিত্যিক বন্ধুর সহিত পুষ্পমাল্যশোভিত আমারও ফটো নেওয়া হইল স্থানীয় উৎসাহী সাহিত্যবাতিকগ্ৰন্থ তৰুণদেব দ্বাৰা।

—এইবাব আশুন, একটু জলযোগ—

—সভা কখন? সময় হল তো—

—সভাব আগে সামান্য একটু চা—

—বন্ধুদের দিকে ফিরিয়া বলিলাম—চল হে তবে। ওঁরা যখন নিতান্তই ছাড়বেন না—

—আশুন এদিকে—ইনিই অভ্যর্থনা সমিতির সভাপতি রামকিঙ্কর চট্টোপাধ্যায়, রায় বাহাদুর, এখানকার জমিদার—

—ও! নমস্কার! হেঁ—হেঁ—

একগাল হাসিয়া রায় বাহাদুর প্রতিনমস্কার করিলেন।

গরীবের বাড়ীতে—সামান্য একটু—হেঁ হেঁ—। আপনার নাম অনেকদিন থেকে শোনা ছিল। আজ বড় সৌভাগ্য আপনার সঙ্গে দেখা

হল। আপনার শাপমোচন পড়ে আমাদের বাড়ীর এরা কেঁদে বাঁচে না। আমি এখনও পড়ি নি। সময় পাই নে, মিউনিসিপ্যালিটির কাজ বড় বেশি—যদিও রিটায়ার করেছি, তবুও কাজের অন্ত নেই।—ওঁরই নাম বিনয়বাবু? আশুন আশুন, আপনার বইও—মানে, পড়ি নি—তবে নাম কে না শুনেছে আপনার বাংল। দেশে, বলুন!

আমরা সবাই খ্যাতির গর্বে ফ্যুত হইয়া উঠি।

প্রকাণ্ড ঘর। মাঝখান জুড়িয়া লম্বালম্বি একখানা বড় টোবল সাদা কাপড় দিয়া ঢাকা—চার পাঁচটা ফুলদানিতে ফুল সাজানো। বড় বড় চীনামাটির প্লেটে সিঙাড়া, কচুর, নিমকি ও রসগোল্লা। কাচের গ্লাস সারি সারি ও কাচের জগে জল। চায়ের সরঞ্জাম।

—আশুন, বশুন—এই যে, আপনি এইদিকে—বিনয়বাবু এখানে। ওরে ফল কই? এখনও কাটা হয় নি? কখন আর কাটবি? নিয়ে আয়।...ওহে শূশীল, তোমরাও বসে পড়, দাঁড়িয়ে রইলে কেন সব? কেনারাম কোথায় গেল? ডেকে নিয়ে এস। বাঃ, চা খেয়ে নাও সকলে একসঙ্গে—না না, দেওয়ার লোকের অভাব হবে না।

—ওই ছবিখানা কার? বেশ সুন্দর চেহারা—

—আজ্ঞে, আমার স্বর্গীয় পিতৃদেবের! ফ্রেঞ্চ গভর্নমেন্টের দেওয়ান ছিলেন—একেবারে ডান হাত বা বাঁ হাত। আর ওই বাঁ পাশে আমার পিতামহ। আমাদের আদি বাড়ী শশধরপুর, নিমুতের কাছে। আমার ঠাকুরদাদার বাবার নামে গ্রামের নাম—নিমকির দারোগা ছিলেন সেখানে। ওই অঞ্চলে জমিদারী কেনেন—ওরে সিঙাড়া আরও নিয়ে আয়—খান খান—গরম সিঙাড়া সব বাড়ীতে তৈরী—দোকানের জিনিস মশাই এ বাড়ীতে ঢোকে না। আমার বড়বোমার হাতে ভাজা সব। বড় ছেলে? সে এখানে নেই—কাস্টম্‌স-এ কাজ করে—এবার আড়াই-শ ইল—বিয়ে দিয়েছি আজ পাঁচ বছর—তার খণ্ডরও জমিদার—রায় সাহেব হরিনাথ বাঁড়ুজ্যে, হালিসহরের—নাম শুনেছেন বোধ হয়? চা

দিয়ে যা এবার—

একটি বার-তের বছরের সুশ্রী বালিকা পান লইয়া আসিয়া সলজ্জ সঙ্কেচে দবজার নিকট দাঁড়াইল।

—কি এতে রে খুকি ? পান ? রাখ এখানে রাখ—এইটি আমার ছোট মেয়ে মিনতি। লজ্জা কি এঁদের কাছে। বেশ গান গায়, আজ সভাতে গান গাইবে এখন। আবৃত্তিতে আর বছর মেডেল পেয়েছিল—জলধর সেন শুনে কেঁদে ফেললেন একেবারে—

কর্তব্য ও শোভনতার খাতিরে খুকিটিকে কাছে ডাকিয়া দু-একটি মামুলি ছেঁদো কথা জিজ্ঞাসা করি, তাহার আবৃত্তি পুনরায় আমাদের কাছে করিবার জ্ঞান জিন ধরি, এবং পরক্ষণেই জিজ্ঞাসা করি—তাহলে ওঠা যাক সব—কি বলেন ? সভার টাইম তো হল—

—ওরে কানাই, গাড়ীখানা আনতে বল চট করে, গেটের কাছে নিয়ে আসুক—

—না না, গাড়ী কি হবে। দরকার নেই রায় বাহাদুর। হেঁটেই এটুকু—

—বিলক্ষণ ! ক্লাব ঘর এখান থেকে দশ মিনিটের রাস্তা। হেঁটে যাবেন কেন, গাড়ী যখন রয়েছে—নিয়ে আয় রে—বলে দিলি না গাড়ীর কথা ?

সদলবলে গাড়ীতে উঠিতে যাইতেছি এমন সময় একটি আট ন বছরের বালক পিছন হইতে আমায় ডাকিয়া বলিল—মা আপনাকে ডাকছে—

প্রায় চমকিয়া উঠিয়াছিলাম আর কি। বিস্ময় ও অবিশ্বাসের দৃষ্টিতে ছেলেটির দিকে চাহিয়া বলিলাম, কাকে ?—কে ডাকছেন বললে খোকা ?

বালকটি দৃঢ়কণ্ঠে বলিল—আপনাকে মা ডাকছেন।

উপস্থিত ব্যক্তিবর্গের মধ্যে সকলেই বিস্মিত হইয়া উঠিয়াছিলেন,

বিভূতিভূষণ : নয়স গল্প

কারণ আমি এ স্থানে পূর্বে কখনও আসি নাই, বালকটি আমায় কখনও দেখে নাই ইহা নিশ্চিত । একজন জিজ্ঞাসা করিলেন—তোমাদের বাড়ী কোথায় থাকা ?

আর একজন বলিলেন—আরে ও তো আমাদের হরিজীবনের ছেলে । তুমি হরিজীবনের ছেলে না ? হ্যাঁ । ওই দোতলা বাড়ী । এঁকে ডাকছেন তোমার মা ? এই বাবুকে ?

বালক চারিদিক হইতে জেরায় একটু দমিয়া গিয়া সঙ্কোচের সুরে বলিল এই বাবুকেই তো মা বললেন ডাকতে । মা বললেন—যিনি চাদর গায়ে গাড়ীতে উঠছেন—

—যান মশাই, দেখে আসুন । ওর বাবার নাম হরিজীবন মুখুজ্যে, রেলের কাজ করে, আমাদের এখানে বাসা । চিনতে পেরেছেন ? হরিজীবন এখন বাড়ী নেই, বোধ হয় ডিউটিতে গিয়েছে । তোমার বাবা বাড়ী আছেন থাকা ?

বুঝিতে পারিলাম না কে হরিজীবন । কিন্তু এই বালকটির মুখের আদল আমার অত্যন্ত পরিচিত মনে হইল, যেন পূর্বে এ ধরনের মুখ কোথায় দেখিয়াছি ।

বাড়ীর দরজায় পা দিতেই দরজার আড়াল হইতে যে হাসিমুখে বাহির হইয়া আসিল, তাহাকে দেখিয়াই চমকাইয়া উঠিলাম । ইহাকে তো চিনি । অনেক দিন আগে ইহার সহিত খুব জানাশোনা ছিল । কিন্তু নাম কিছুতেই মনে আনিতে পারিলাম না । মেয়েটি আমার পায়ের ধূলা লইয়া প্রণাম করিয়া বলিল—কি যতীনদা, চিনতে পারেন ? কে বলুন তো ?

—এস এস—থাক্ । কল্যাণ হোক । ভাল আছ বেশ ?...সঙ্গে সঙ্গে আমি প্রাণপণে মেয়েটির নাম মনে আনিবার চেষ্টা করিলাম । আমার মনে পড়িল ইহার সঙ্গে আলাপ হইবার একমাত্র সম্ভবপর স্থান হইতেছে কৃষ্ণনগর, সেখানে থাকিয়া কলেজে পড়িয়াছিলাম—অন্য

কোথাও মেয়েদের সঙ্গে আমার আলাপ হয় নাই। কিন্তু বোল-সভের বৎসর পূর্বের সেই দিনগুলিতে ভাবিয়া দেখিলাম অনেকগুলি মেয়ের সঙ্গে আলাপ হইয়াছিল শুধু এই কারণে যে, আমি যে বাড়ীতে থাকিতাম সে বাড়ীতে সঙ্গীতচর্চা উপলক্ষে পাড়ার অনেক মেয়ে জড়ো হইত। তাছাড়া কবিতা আবৃত্তির প্রতিযোগিতা ছোট ছোট মেয়েদের থিয়েটার প্রভৃতি সম্পর্কে মেয়েদের সাহায্য করিতে অনেকবার অনুরুদ্ধ হইতাম—সে উপলক্ষেও অনেক মেয়ের সংস্পর্শে আসিয়াছিলাম। সেখানেই যদি ইহার সহিত দেখাশুনা হইয়া থাকে তার নাম মনে আনিবার চেষ্টা বুখা। কারণ *their name is Legion*.

—বসুন যতীনদা।

—ইয়ে—গিয়ে বসব বটে, কিন্তু ঘুরে আসি, সভা রয়েছে কিনা? সভার টাইম প্রায় হয়ে গেল।

মেয়েটি হাসিয়া বলিল—উঃ, আপনি আবার সাহিত্যিক হয়েছেন, সভায় সভাপতিত্ব করবেন, এসব ভাবলে আমার হাসি পায়। উঃ কি বখাটেই ছিলেন!

চুপ করিয়া রহিলাম—যদিও ঠিক বুঝিলাম না আমার মধ্যে বখাটেগিরির কি দেখিয়াছিল এ। এবং আমার তো মনে হয় না আমি সত্যিকারের বখাটে যাহাকে বলে তাহা ছিলাম কোনদিন। কিন্তু তাহা লইয়া তর্ক তুলিবার ইহা সময় নয়।

মেয়েটি আবার বলিল—কতদিন ভেবেছি আপনি কোথায় চলে গেলেন, আপনার সঙ্গে হয়তো আর দেখা হবে না! কিন্তু ভগবান দেখা করিয়ে দেন এমনি করে।

আমি এবার ইহাকে অনেকখানি মনে আনিতে পারিয়াছি।

জিজ্ঞাসা করিয়াই ফেলিলাম—তোমার নাম শাস্তি না?

মেয়েটি খিল খিল করিয়া হাসিয়া উঠিল।

—কেন, সে সম্বন্ধে সন্দেহ আছে নাকি?

বলিতে পারিলাম না যে, সন্দেহ তো দূরের কথা, নামটাই মনে ছিল না এতক্ষণ কিন্তু এবার ইহাকে বুঝিয়া ফেলিয়াছি। আজ পনের-ষোল বছর আগে ইহার সঙ্গে আলাপ হইয়াছিল—তার পর আর কখনও দেখি নাই বটে, কিন্তু এখন মনে হইতেছে অতগুলি মেয়ের মধ্যে এই মেয়েটির ব্যবহার ছিল সর্বাপেক্ষা আশ্চর্যকর ও সরল. তখনকার মনোভাবে আমি ইহাকে সেইজন্মেই আমল দিই নাই—গায়েপড়া বলিয়া মনে করিতাম।

শাস্তি বলিল—আপনি আজকাল থাকেন কোথায় ?

—কলকাতাতেই আছি আজ আট ন বছর। খবরের কাগজের আপিসে চাকরি করি।

—বিয়ে করেছেন ?

—বহুদিন।

—ছেলেপিলে হয়েছে ?

—চার মেয়ে। আর কিছু শুনতে চাও ?

—বাজে কথা। আপনি কক্ষনো বিয়ে কবেন নি।

—এ কথা ভাববার হেতু কি ?

—আপনাকে আমি খুব ভালই জানি। আমার চোখে ধুলো দিতে পারবেন না। বলুন সত্যি কি না ?

হাসিয়া ফেলিলাম, সঙ্গে সঙ্গে বড় ভালও লাগিল। পনের বছর পূর্বে এক-আধ বছরের জন্ত যে মেয়ের সঙ্গে অত্যন্ত ভাসা-ভাসা ধরনের আলাপ হইয়াছিল তাহাকে আমার চরিত্র ও মনোবৃত্তি সম্বন্ধে এমন নিঃসন্দেহ মত প্রকাশ করিতে দেখিয়া ভাল লাগিবার কথা বটে। এ এমন এক ধরনের আত্মীয়তা যাহা অল্প কোনও উপায়ে প্রকাশ করা যায় না, বা অল্প কোনও ধরনের ব্যবহার দ্বারা ইহার স্থানও পূর্ণ হয় না।

বলিলাম—ধরে যখন ফেলেছ শাস্তি, তখন মিথ্যে বলে লাভ নেই।

বিয়ে এখনও করি নি ।

শান্তি সগর্বে বলিল—দেখুন, বললাম যে আপনাকে তখনই আমি চিনে ফেলেছিলাম ঠিক কিনা ভাল কবে বলুন এবার ।

বললাম—তাহলে এখন আমি আসি শান্তি—সভার পরে না হয় আসব এখন একবার । তোমাব স্বামী কখন আসবেন ? আলাপ হলে বেশ আনন্দ হত । সন্ধ্যার পব ? বেশ আমারও আসতে রাত আটটা বাজবে, বুঝেছ ।

—এখানে আজ রাতে খাবেন কিন্তু বলা রইল ।

সভার পরে পুনরায় শান্তিওখানে ফিরিতে প্রায় রাত নয়টা বাজিল । শান্তির স্বামীর সঙ্গে আলাপ হইল—বেশ ভাল লোক । আমার আসিবার খবর শুনিয়া ভদ্রলোক বাছিয়া বাছিয়া বাজার করিয়াছেন, সব রান্না শেষ করিতে শান্তিব বেশ সময় লাগিবে—রাত দশটার কমে রান্না সাজ হইবে বলিয়া মনে হইল না । শান্তি চা করিয়া দিয়া গেল । আমি বসিয়া তাহাব স্বামীর সঙ্গে গল্প করিতে লাগিলাম ।

একবার শান্তি রান্নাঘর হইতে আসিয়া বলিল বড্ড ক্ষিদে পেয়েছে ?

—ও জিনিসটির প্রাহুর্ভাব তোমাদের আতিথেয়তার কল্যাণে আদৌ হবার উপায় নেই । এসে পর্যন্ত খাওয়া চলছে । তুমি নিকরুণে বসে রাঁধতে পার যতক্ষণ খুশি ।

আহারাদির পরে শান্তি বসিয়া গল্প করিতে লাগিল । শান্তির স্বামী দু-একবার হাই তুলিয়া বলিলেন—আমার কাল খুব সকালে ডিউটি—যদি কিছু মনে না করেন আমি গিয়ে শুয়ে পড়ি—

—বিলক্ষণ । শোবেন বই কি । আমি তাহলে—

—শান্তি, তুমি বরং বসে গল্প কর । আমি যাই । এঁর বিছানা কক্কে

বিভূতিভূষণ : সয়স গল্প

রেখেছ তো ? মশারিটা খাটিয়ে দিও।—স্বামী উঠিয়া চলিয়া গেলে শাস্তি বলিল—যুম পেলে শুনছি নে কিন্তু। আজ সারা রাত বসে গল্প করতে হবে। কতকাল পরে দেখা।

—সারা রাত ! বল কি।

হঠাৎ শাস্তি বলিল—কেন না ? আপনি আমায় কত কষ্ট দিয়ে-
ছিলেন জানেন ?

আমি অবাক হইয়া ওর মুখের দিকে চাহিয়া বলিলাম—কিসের কষ্ট ?

—কিসের কষ্ট জানেন না তো ? জানবেনই বা কি করে। আচ্ছা দাঁড়ান দেখাচ্ছি। বলিয়াই সে ঘরের ভিতর ঢুকিয়া গেল এবং কিছুক্ষণ পরে একটি ছোট কাঠের বাক্স আনিয়া আমার সামনে খুলিল। একটা পত্র আমার সামনে ধরিয়া বলিল—দেখুন পড়ে।

পড়িয়া দেখিয়া আশ্চর্য হইলাম। আমার মাসিমা পরলোক গমন করিয়াছেন আজ দশ বছর কি তার বোঁশ। তাঁর হাতের লেখা খুব ভাল করিয়াই চিনি। মাসিমা শাস্তির মাকে চিঠিতে আমার সহিত শাস্তির বিবাহের প্রস্তাব করিতেছেন এই চিঠিতে।

বলিলাম—তুমি এ পত্র পেলে কোথায় ?

—যেদিন এ পত্র এসেছিল, সেই দিনটি থেকে পত্রখানা আমার কাছে। আপনিও তার পর আর কখনও আজিমগঞ্জে যান নি। সেই শ্রাবণ মাসে যে চলে এলেন—এই আবার এতকাল পরে দেখা।

—কিন্তু আমি এ ব্যাপারের বিন্দুবিসর্গও জানতাম না একথা বললে তুমি কি বিশ্বাস করবে শাস্তি ?

শাস্তি অবাক হইয়া আমার মুখের দিকে চাহিয়া বলিল—জানতেন না মানে ? সব জানতেন।

—কেন বল তো তুমি একথা বলছ ?

শাস্তি হাসিয়া ঘাড নাড়িয়া বলিল—সব জানি যতীনদা, সব জানি। আমার চোখে আবার ধুলো দেবার চেষ্টা ? একবার তো করে দেখলেন, ঠেকে গেলেন নিজেই।

—কি চেষ্টা করলুম তোমার চোখে ধুলো দেবার ?

—ওই যে বললেন বিয়ে কবেছেন, চার মেয়ে হয়েছে। আমি আর জানি নে আপনাকে ? বিয়ে আবার আপনি করবেন ! কেন বিয়ে করেন নি, তাও কি আমার অজানা ভাবেছেন ? এক এক সময় তাই মনে হয়েছে, এই ষোল বছরের মধ্যে—যদি কখনও দেখা হয়, পায়ে ধরে আপনার কাছে মাপ চেয়ে নেব। আমি তো গিয়ে ছই—আপনি কেন যাবেন সেই সঙ্গে ?—সেই কথাটা বলবাব সুযোগ পেলাম এতকাল পরে।

বিস্ময়ে আমার মুখে কথা যোগাইল না। শাস্তি বলে কি ! এমন ভুলও মানুষেব হয় ? সমস্ত কথাটা বেশ করিয়া ভাবিয়া দেখিবার সময় নয় এটা—তবুও এক চমকে ইহাব মনেব অনেকখানিই দেখিতে পাইলাম। সভা করিতে আসিয়াছি বিদেশে, আমাকে ডাকিয়া পাঠাইয়া এতখানি দরদ দেখাইবার ঠিকমত কারণ আমি অনেক হাতড়াইয়া খুঁজিয়া পাইতেছিলাম না—অনেকখানি পৰিষ্কার হইয়া গেল এবার।

কিন্তু মেয়েটি কি ভুলই নিজের বকের মধ্যে এই ষোল বছর পুৰিয়া রাখিয়াছে ! আমার অত্যন্ত কৌতূহল হইল কতকগুলি কথা জানিবার। বলিলাম—আজ যখন এখানে এলাম, তুমি কি করে আমায় চিনিলে এতকাল পরে ?

—সভার জন্তে কাগজ ছাপিয়ে বিলি করেছিল—আপনার নাম দেখলাম। তা ছাড়া স্বরাজ্যবাবুর ছেলে আপনার পরিচয় সেদিন দিচ্ছিল ওঁর কাছে আমাদের বাড়ী বসে। আমি তখনই ওঁকে বললাম, যতীনদা আমার বাপের বাড়ীর দেশের লোক। উনি বললেন, রায়

বিভূতিভূষণ : সবস গল্প

বাহাদুরের বাড়ী আপনাদের চা খাওয়ার আয়োজন হয়েছে—তাই শুনে জানলায় দাঁড়িয়ে ছিলাম।

—দেখেই চিনলে এতকাল পরে ?

—ওমা, কেন চিনব না ! আপনারা আমাদের ভাবেন কি ?

এখন ইহাকে ভাল করিয়াই মনে পাড়িয়াছে—আমার কিছুদিনের বাল্যসঙ্গিনী একটি অত্যন্ত মুখরা, চঞ্চলা বালিকার ছবি। আবছায়াভাবে ইহার দু-একটি বাল্যলীলাও মনে পড়িতেছে।

বলিলাম—শাস্তি, নিতাইয়ের মা সেই বুড়ো গিন্নীর শিব চুরির কথা মনে পড়ে ?

শাস্তি হাসিয়া বলিল—খু-উ-ব। চুরি করলেন আপনি আর ধনা—ধনাকে মনে আছে ?—সে আজকাল পাটের কলে কাজ করে নৈহাটিতে, মধ্যে একদিন এখানে এসেছিল আজ বছর তিন চার আগে—আর গাল খেয়ে মলুম আমি আর ছোড়দি।

—কেন, তোমরা তো সাহায্য করেছিলে, কর নি ? পূজোর ঘরের শেকল তুলে দিতে বলেছিল বুড়ো গিন্নী—শেকল তুলে না দিয়ে বলেছিলে, দিয়েছ। আর একদিন তুমি জাঁতি দিয়ে আঙ্গুল কেটে ফেলেছিলে মনে আছে ? কেঁদেছিলে খুব।

শাস্তি ছেলেমানুষের মত মুখ ভ্যাংচাইয়া বলিল—হ্যাঁ, কেঁদেছিলে খুব ! ছাই মনে আছে। কাঁদবার মেয়েই আমি ছিলাম কিনা।

—তবু যদি আমার মনে না থাকত !

—কি মনে আছে শুনি ?

—মনে আছে তুমি কেঁদে ভাসিয়ে দিয়েছিলে।

শাস্তি অবাক হইয়া গালে হাত দিয়া বলিল—ওমা, কি মিথ্যেবাদা !

আমার হাসি পাইল। বলিলাম—ছেলেবেলার মত ঝগড়া পাকিয়ে তুলছ শাস্তি ! অভ্যেস কি কখনও যায়।

শাস্তি হাসিতে হাসিতে বলিল—আচ্ছা, যতীনদা—শিবতলার বটগাছে তারা বেঁধে দিতে তো ফি বছর পরীক্ষার আগে—খুলেছিলে কোনদিন ?

সত্যিই অনেক কথা দেখিতেছি মনে রাখিয়াছে শাস্তি । আমার নিজেরই মনে ছিল না । মেয়েরা বড় মনে রাখে ।

রাত অনেক । শাস্তি বলিল—আর না যতীনদা, রাত হয়েছে, শুতে যান । যদিও আমার ইচ্ছে করছে আজ সারারাতটা আপনার সঙ্গে বসে গল্প করি । কাল সকালে উঠেই যেন চলে যাবেন না, খাওয়া-দাওয়া সেরে তবে—

—কাল তা কি কবে হবে শাস্তি ? কাল সোমবার, সব খোলা—খেয়ে যেতে গেলে দেরি হয়ে যাবে । আমি সকালে চা খেয়েই চলে যাব ।

শাস্তি কর্তৃত্বের সুরে বলিল—সে হবে এখন । সেজ্ঞে আপনার ভাবতে হবে না—কাল সকালে উঠে দুটো আপিসেব ভাত দিতে আমার আর হাত পা খোঁড়া হয়ে যাবে না ।

রাত্রে বিছানায় শুইয়া শুইয়া ভাবিলাম ব্যাপারখানা । শাস্তিকে প্রতারণা করিলাম বটে, স্বীকার করি সেটা বড়ই খারাপ কাজ, কিন্তু সত্য কথা খুলিয়া বলিলেই কি সে খুশী হইত ? ওর জীবনে হয়তো এইটুকু ভাবিয়াই উহার সুখ—কেন সে সুখটুকু নষ্ট করিব ?

পবদিন সকালে না খাওয়াইয়া শাস্তি কি ছাড়ে ! খুব ভোরে উঠিয়া এটা সেটা রাখিতে ব্যস্ত হইয়া পড়িল । সাড়ে আটটায় আমার গাড়ী । তার অনেক আগে সে আমায় চার পাঁচ রকমের তরকারি করিয়া খাওয়াইয়া দিল ।

পায়ের ধূল লইয়া প্রণাম করিয়া বলিল—আবার কবে আসবেন দাদা ?

—সময় তো পাই নে। তবে—ইয়ে—আসব বইকি।

হঠাৎ খপ করিয়া আমার হাত দুখানা তাহার দুই হাতের মধ্যে লইয়া আর্দ্র কণ্ঠে অথচ দৃঢ়স্বরে বলিল—না দাদা, আমি সব জানি, সব বুঝি। আপনি যে নিজের জীবনটা এভাবে কাটিয়ে দিলেন, সেজ্ঞে আমার মনে তুষের আগুন জ্বলে দিন-রাত। আপনার কাছে আমার একটা অনুরোধ আছে, রাখবেন বলুন?

—কি অনুরোধ বল শাস্তি।

—আপনি বিয়ে করুন—করতেই হবে আপনাকে বিয়ে। আমার অপরাধের বোঝা আর বাড়াবেন না। বলুন অনুরোধ রাখবেন?

আমি চুপ করিয়া রহিলাম। এ কথার কি উত্তর দিব ভাবিয়া পাইলাম না।

শাস্তি আবার বলিল—চুপ করে থাকলে হবে না! আমার কাছে বলে যান।

—আচ্ছা, ভেবে দেখি শাস্তি।

—বেশ, তা ভাবুন। এইটুকু যে বলেছেন এবার সেই যথেষ্ট। আবার এই মাঘ মাসে সরস্বতী পূজোর সময় আসবেন বলুন?

—আচ্ছা, তা বরং—

—না, ওসব গুনব না। বরং টরং না, আসতেই হবে বলে দিলাম। আমি পথের দিকে চেয়ে থাকব।

—আসব।

পথে উঠিয়া দেখি, শাস্তি রান্নাঘরের জানালায় দাঁড়াইয়া পথের দিকে একদৃষ্টে চাহিয়া আছে।

বাড়ী ফিরিয়া গীর কাছে ঘটনাটা বলিব ভাবিয়াছিলাম। কিন্তু শেষ পর্যন্ত না বলাই যুক্তিযুক্ত বিবেচনা করিলাম।



অভয়ের অনিদ্রা

অভয়ের সারারাত্রি ঘুম হইল না। শত চেষ্টা করিয়াও সে তাহার চক্ষু নিম্নালিত করিতে পারিল না। সেই যে আচমকা কিসের যেন শব্দে তাহার ঘুম ভাঙিয়া গেল, তার পর আর কিছুতেই সে ঘুমাইতে পারিল না। চক্ষু যেন তাহার ঠিকরাইয়া বাহির হইবার উপক্রম হইল। বেশ শান্তিতে সে ঘুমাইতেছিল, অকস্মাৎ কে যেন তাহার দ্বারে করাঘাত করিয়া গেল। সেই শব্দে অভয়ের সুপ্ত চেতনা জাগিয়া উঠিল। অভয় ধীরে ধীরে তাহার শয্যার উপর উঠিয়া বসিল, ধীরে ধীরে ক্ষণপ্রায় হ্যারিকেনটি উজ্জল করিয়া দিল, ধীরে ধীরে চারিদিকে সাবধানে চাহিয়া দেখিল। না, কোথাও এতটুকু অসামঞ্জস্য ঘটে নাই। যেখানকার জিনিসটি যেমন ছিল তাহা ঠিক সেখানেই আছে, একটুকু নড়ে নাহ। অভয় স্বস্তির নিঃশ্বাস ফেলিয়া বাঁচিল। ভয় তাহার নিশ্চয় অহেতুক। সে প্রথমে ভাবিয়াছিল হয়তো ডাকাত পাড়িয়াছে, কিন্তু পরক্ষণেই স্মরণ হইল ইহা কলিকাতা, ডাকাত পাড়িবার সম্ভাবনা নাই আদৌ। তার পর মনে পড়িল হয়তো চোর পাড়িয়াছে। অনেকক্ষণ কান খাড়া করিয়া রহিল। চোরের আর কোন সাড়া পাওয়া গেল না। তবে কিসের এই বিকট শব্দ? অভয় ভাবিয়া ভাবিয়া আকুল হইল।

মুহূর্তে তাহার পাশের শূণ্য বিছানায় নজর পড়িল। সাতদিন আগে ঐ শয্যা পূর্ণ ছিল। সাতদিন আগে তাহার এ গৃহ এমন মহাশূণ্যতা প্রকট করিয়া থাং থাং করিত না। মনে পড়িল বেচারী বকুলের কথা—তাহার সহধর্মিণী, তাহার স্ত্রী, অগ্নিসাক্ষী করিয়া যাহাকে গৃহলক্ষ্মীরূপে বরণ করিয়া লইয়াছিল। তিন বছর পূর্বে এই শ্রাবণের এক শুভলগ্নে বকুলকে সে সগোত্রের গণ্ডির মধ্যে টানিয়া আনিয়াছিল। সেদিনও আকাশে এমনি করিয়া পূর্ণিমার চাঁদ উঠিয়াছিল। তখন তাহার মা ছিলেন। দিন বেশ সুখেই কাটিতেছিল। তার পর একদা পরপার হইতে মার ডাক পড়িল। বকুল নিপুণ হস্তে সংসারের হাল টানিয়া ধরিল। অভয় তাহার পানে তন্ময় হইয়া চাহিয়া রহিল। মাতার অভাব বকুলকে দিয়া পূরণ করা হইল। প্রথম প্রথম বকুলকে অবশ্যই বেগ পাইতে হইয়াছিল; কিন্তু অচিরেই সে অভ্যস্ত হইয়া গেল। সংসারের হিসাবপত্র হইতে আরম্ভ করিয়া রান্না পর্যন্ত তাহাকে নিজ হস্তে করিতে হইত।

কালক্রমে বকুল স্বামীর বিরাট বহুবিস্তৃত সংসারের সহিত এমনভাবে জড়িত হইয়া গেল যে তাহার অভাব একদিনও সহ্য করা যাইত না। বাপের বাড়ী যাইবার ফুরসত সে পাইত না। ভোর হইতে উঠিয়া গভীর রাত্রি পর্যন্ত কর্মে তাহার বিশ্রাম ছিল না। কলের পুতুলের দ্বারা সে অক্লান্ত কর্ম করিয়া যাইত। একবেলা তাহার অসুখ করিলে সংসার অচলপ্রায় হইয়া যাইত। ছেলেমেয়েদের পেট ভরিয়া খাওয়া হইত না। অতিথি-অভ্যাগত ফিরিয়া যাইত। খাণ্ডজব্য এমনই অখাণ্ড হইত যে কাহারও মুখে তুলিবার রুচি হইত না। পাশের বাড়ীর চাঁপা একদা মধ্যাহ্নে বেড়াইতে আসিয়াছিল। সে বকুলকে দেখিয়া বলিল, দিদির চেহারা কি বিক্সী হয়ে গেল।

বকুল কহিল, হবে না ভাই? যা খাটুনি।

চাঁপা কহিল, খাটুনি একটু কম করতে পার।

বকুল মুহূর্ত হাসিল, তাহার মুখে প্রশান্তির ছায়াপাত হইল। সে বলিল, খাটুনি কম করব কি করে ভাই। নিজের সংসার, পর তো আর কেউ নয়। একটুকু বিশ্বাসের ফুরসত নেই। আজ যদি যম আমায় নিতে আসে তাহলে তাকে বলব, একটু বোস, আমার এখনও অনেক কাজ বাকি।

চাপা কহিল, বালাই যাট, ওকি অলক্ষুণে কথা ভাই।

বকুল কহিল, আমার আবার লক্ষণ অলক্ষণ! আমি যমের অর্কাচ।

এহেন বকুলকে পাইয়া অভয়ের বিপর্যস্ত সংসারের মধ্যে বেশ একটা সুশৃঙ্খলা দেখা দিয়াছিল। শুধু তাহাই নহে, অভয় বকুলকে নিঃশব্দে চুপিচুপি নাকি ভালবাসিয়াও ফেলিয়াছিল। কেন না, যে অভয় বন্ধুদের ফেলিয়া একদণ্ড কাটাতে পারিত না, সেই কিনা বিবাহের পর সম্পূর্ণ বিপরীত প্রকৃতির হইয়া গেল। গৃহকেই সে যথাসর্বস্ব জানিয়া ফেলিল। বন্ধুরা বিদ্রূপ করিতে কসুর করে নাই। বলিল, বৌদি তোকে এমন করে তুক করে ফেলবে জানলে কখনও বিয়ে করতে দিতুম না।

কেহ বলিল, বৌদির দেওয়া খাবার-টাবার দেখে খাস বাবা।

কেহ বলিল, কামরূপ-কামিখ্যের ভেড়া হয়ে যাস নে যেন।

অভয় কেবল হাসিতে লাগিল। কাহারও কথায় সে জবাব দিল না।

এমনি করিয়া অভয়ের দিন ক্রটিতে লাগিল। বন্ধুরা ধীরে ধীরে তাহার নিকট হইতে সরিয়া যাইতে লাগিল। ধীরে ধীরে তাহাকে সকলে বিস্মৃত হইল। আপিসের ছুটি হইলে সন্ধ্যায়, বা রবিবারে, কেহ তাহার বাড়ী আর তাস পাশা খেলিতে আসিত না। তাহার বহুদিনের বৈঠকখানা অনাদৃত হইয়া পড়িয়া রহিল। সন্ধ্যায় আলো জলিল না, বৈকালে ঝাঁট পড়িল না, অভয় হাঁফ ছাড়িয়া বাঁটিল। বকুল

বিভূতিভূষণ : সরস গল্প

একদিন জিজ্ঞাসা করিল, ওরা আর তাস খেলতে আসে না কেন ?

অভয় মুক্তির হাসি হাসিতে হাসিতে বলিল, অমন বিলাসিতা করবার সঙ্গতি আমার নেই।

বকুল কহিল, এতদিনের অভ্যেস !

—অভ্যেস বলে তো সব-কিছু করা যায় না। পয়সা চাই—
চক্চকে পয়সা। তাস চাই, আলো চাই, চা চাই, বিস্কুট চাই। পয়সা
দিয়ে তো অমন বন্ধুত্ব কিনতে পারি না বকুল। পয়সা কোথেকে আসে
সে কথা কি কোনদিন চিন্তা করেছ একবার।

কথা শেষে অভয় হা হা করিয়া তাহার স্বভাবশুলভ ভঙ্গিতে
হাসিতে লাগিল। বকুল বলিল, আমার বিয়ের পর তার এমনি করে
যবনিকাপাত করলে আমায় লোকে ছষবে, এটা জ্ঞান তো ?

—অর্থাৎ ?

—অর্থাৎ, লোকে মনে করবে তাদের এ আনন্দ রুদ্ধ হয়েছে
আমারই ষড়যন্ত্রে।

অভয় আবার সেইরূপ সারা ঘরটি কাঁপাইয়া হাসিতে লাগিল।
তার পর বলিল, ওঃ ! ছষবে তো তোমায় ? তা যত খুশি দোষ দিক।
তুমি তো আর শুনতে যাচ্ছ না। তাতে আর কোন ক্ষতি নেই।

দুই মাস অভয়ের সহিত ঘর করিয়া বকুল বেশ বুঝিয়াছিল যে
তাহার স্বামীর হাতটানটা বেশই আছে। হাতের আঙুল নাকি তাহার
কাঁক হয় না ! বিবাহের পর এই সুযোগে সে বন্ধু-বান্ধবকে ফাঁকি
দিয়া বাসিল। সাবান স্নো কিনিয়া দিতে বলিলে সে হাসিয়া উড়াইয়া
দিত, সেকালের দোহাই পাড়িয়া স্ত্রীকে আধুনিকতার বিশেষণে জর্জরিত
করিতে কুণ্ঠিত হইত না। সেই হারানো যুগের সোনার দিনের বর্মে
নিজেকে আবৃত করিয়া সে আত্মরক্ষা করিত। বকুলের মুখে আর
কোন কথা সারিত না। আর তাহার বলবারই বা কি থাকিত ? তখন
তাহার সবেমাত্র বিবাহ হইয়াছে।

ধীরে ধীরে দীর্ঘ তিনটি বৎসর কোন্ ফাঁকে কাটিয়া গিয়াছে তাহার হিসাব নাই। অকস্মাৎ একদিন বকুলের সামান্য অসুখের সামান্যভাবেই সূত্রপাত হইল। বুধবার রাত্রি দুইটায় সে অভয়কে সহসা ডাকিতে লাগিল। অভয় জিজ্ঞাসা করিল, ব্যাপার কি ?

বকুল বলিল, আমার বড্ড শীত করছে। উঃ ছঃ ছঃ! জানালা দরজা সব বন্ধ করে দাও। আমার ঘাড়ের ওপর লেপ দাও, গায়ের কাপড় দাও, তোশক দাও, গদি দাও, যা কিছু আছে সব দাও।

অভয় লেপ দিল, গায়ের কাপড় দিল। বকুলের শীত তবুও তিলান্বিত কমিল না। সে হি-হি করিয়া কাঁপিতে লাগিল, চীৎকার করিতে লাগিল—আরও দাও, আরও দাও।

দিবার আর কিছুই অবশিষ্ট রহিল না, তথাপি বকুল কাঁপিতে লাগিল। অভয় তার কপালে হাত দিয়া দেখিল গা যেন পুড়িয়া যাইতেছে। স্ত্রীর অবস্থা দেখিয়া সে মাথায় হাত দিয়া বসিল। এখন এই গভীর রাত্রে সে কি করিবে, করিবাব তাহার কিই বা আছে? সে কি ডাক্তার ডাকিবে? ডাক্তারের কথা শ্রবণ হইলে তাহার মনে শিহরণ জাগিল। ডাক্তার কবিরাজ ডাকা তো বিলাসিতার নামান্তর। আর রাত্রে নাকি ডাক্তারের ডবল ভিজিট। না, এ সামান্য অসুখের কোন ক্ষতি হয় না। একবার ভাবিল মাথায় আইসব্যাগ দিবে বা কপালে জলপটি দিবে। কিন্তু কোথায় আইসব্যাগ, কোথায় ওডিকোলন! এদিকে বকুল চীৎকার করিতে লাগিল—আমার মাথা জ্বলে গেল, পুড়ে গেল।

অভয় বলিল, বেশ তো ভালমানুষ খাওয়া-দাওয়া করে শুলে। হঠাৎ এমন কিই বা অসুখ করল বল দিকি? এ নিশ্চয়ই ম্যালেরিয়া। আমি হলফ করে বলতে পারি এ ম্যালেরিয়া ছাড়া আর কিছু নয়।

বকুল তখন গান জুড়িয়া দিয়াছে, অনর্গল এলোমেলো বকিয়া চলিয়াছে, সজনি, কি পুছসি...ঐ যমূনার কূলে...শ্যাম কালো, তার

কালো মাথার চূড়া, তার মোহন বাঁশি...

অভয় বিপদ গনিল। সারারাত্রি জ্বর মাথায় পাখার বাতাস করিতে লাগিল। নিজের শরীরের উপর দিয়া যাহা কিছু করা যায় তাহা সে করিতে প্রস্তুত। শুধু এই রাত্রে অযথা সে খামোকা পয়সা খরচ করিতে পারিবে না। পয়সা তাহার বৃকের বত্রিশখানা হাড়ের সামিল। বকুল সারারাত্রি হাসিয়া-কাদিয়া-গাহিয়া চীৎকার করিয়া কাটাঁইয়া দিল। জ্বর কমিল না। ভোর হইলে বাড়ীর অস্থান লোকজন আসিয়া হাজির হইল। যথাসময়ে পাড়ার একজন ডাক্তার ডাকিয়া আনা হইল। ডাক্তার অনেকক্ষণ পরীক্ষা করিয়া ভাবিয়া চিন্তিয়া বলিল, টাইফয়েড। রোগ বড় শক্ত হয়ে দাঁড়িয়েছে। এখন রীতিমত চিকিৎসার প্রয়োজন।

অভয় প্রমাদ গনিল। বিপদ কি মানুষের এমনি করিয়াই হয়? তাহার বড় ইচ্ছা হইল সে ডাক ছাড়িয়া চীৎকার করিয়া কাদে। কিন্তু কাদিল না, বরং জ্বর চিকিৎসার জন্ত জলের মত না বলিয়া না কহিয়া দশটি টাকা খরচ করিয়া বসিল। হিসাবের খাতায় খরচের অঙ্কটা হয়তো আরও বড় হইবে; কিন্তু জ্বর তাহার ভাগ্যবতী স্বামী-সোহাগিনী, 'পতি পরম গুরু'কে অযথা ব্যয়ের হাত হইতে নিষ্কৃতি দিল। পরের দিনই সে ইহজগতের মায়া 'কাটাঁইয়া গোলোকধামে চলিয়া গেল, কেহ তাহাকে বাধা দিতে পারিল না।

অভয় পত্নীশোকে ধূলিতলে আছড়াইয়া পড়িল। সে আত্মকণ্ঠে বিনাইয়া বিনাইয়া রমণীর জ্বায় কাদিতে লাগিল। তাহার অত সাধের তাসের ঘর মরণের তীব্র আঘাতে ভাঙিয়া চুরিয়া লুণ্ঠভণ্ড হইয়া গেল। সে প্রতিরোধ করিতে পারিল না, কেবল তীব্র সুরে শোকপ্রকাশ করিয়া চলিল। সেইসব পুরনো দিনের হারানো বন্ধুরা আজ বিপদ দেখিয়া আসিয়া জুটিল। সেই হাবু, পটল, রমেন, ভূপেশ, বিপিন—সকলেই একে একে দেখা দিল। দীর্ঘ তিন বৎসর যাহারা অভয়ের

ছায়া পর্যন্ত মাড়াইত না, সকলে যাহার মুখ দেখিলে অযাত্রা বলিয়া ঘোষণা করিত, অথথা হাঁড়ি ফাটিবার আশঙ্কায় সারাদিন সচকিত থাকিত, আজ সেই অভয়ের বিপদে আর তাহারা, বেচারার হাত দিয়া জল গলে না বলিয়া, দূরে সরিয়া রহিল না। অভয় তাহাদের দেখিয়া যেন হাতে স্বর্গ পাইল। তাহারা অভয়ের কান্না দেখিয়া নিজেরাই কাঁদিয়া ফেলিল। তাহারা জানে অভয় তাহার জীকে কি দারুণ ভালবাসে, জীর অভাবে তাহার জীবন কিরূপ বিষময় হইয়া যাইবে। অগত্যা তাহারা তাহাকে সাস্তুনা দিতে লাগিল।

সন্ধ্যায় শবদাহ শেষ করিয়া সকলে গৃহে ফিরিল।

সত্যই নাকি অভয় তাহার জীকে নিবিড়ভাবে ভালবাসিত। সে ভালবাসায় নাকি এতটুকু গলদ ছিল না। উঠিতে বসিতে সব সময়ে সে ‘বকুল’ ‘বকুল’ বলিয়া অস্থির হইত। বকুল হাসিয়া বলিত, আমি মলে তুমি কি করবে বল তো ?

—শুভ্র তাজমহল।

বকুল হাসিমুখেই বলিত, ওগো, তোমার ছুটি পায়ে পড়ি তুমি অত খরচ করো না।

অভয় কহিত, পয়সা-কড়ি তো সবই তোমার। তোমার পয়সা তোমার জন্তে খরচ করব, তাতে পায়ে পড়ে বাহাত্তরি কেনবার কি এমন আছে।

—বেশ, মানলুম সমস্ত পয়সাকড়ি আমার, আমার কলকাতা শহরে চোদ্দখানা বাড়ী, তার মাসিক আটশ’ টাকা ভাড়া। এখন আপাতত দয়া করে আমার জন্তে একখানা লালাবাই সাবান এনে নাও দিকি।

অভয় তাহার জীকে প্রবোধ দিল, পাগল নাকি। ফেনা করে সাড়ে চার আনা পয়সা জলে দেবে ? না, ও বিলাসিতা আমাদের এখানে চলবে না।

সেই জীর মৃত্যুশোকে মুহমান হইয়া অভয় ছয় দিন ছয় রাত্রি আহার নিদ্রা ত্যাগ করিল। বন্ধুরা সকলে বিপদ গনিল। এই নিদারুণ শোকাবেগের হাত হইতে কি করিয়া তাহাকে রক্ষা করিবে। সকলে সাস্তুনা দিবার চেষ্টা করিল, প্রিয়জনের মৃত্যুজনিত বিরহে কাতর মানুষ-টিকে সেই বহুশ্রুত দার্শনিক মতবাদ দিয়া বুঝাইবার হাশ্বকর প্রচেষ্টা। সেই—মানুষ মরণশীল, মৃতব্যক্তির জ্ঞান শোকপ্রকাশ করা নাকি দুর্বলতার লক্ষণ, রাজর্ষি জনকের নির্লিপ্ততার দৃষ্টান্ত, সরিষা আনিবার জ্ঞান বুদ্ধের উপদেশ, যুধিষ্ঠিরের প্রতি ধর্মরাজ বকের প্রশ্ন—ইত্যাদি ইত্যাদি নানাবিধ কথায় তাহাকে ভুলাইতে চেষ্টা করিল। অভয় তবুও প্রথমটা ভোলে নাই।

ছয় দিন ছয় রাত্রির পর আজ সবে সে পত্নীশোক কিঞ্চিত্ত বিন্মুত হইয়া সামান্য ঘুমাইয়াছে, এহেন সময়ে সেই বিকট শব্দ হইল। অভয় একদৃষ্টে বকুলের শূন্য শয্যার পানে চাহিয়া রহিল। বুকখানার ভিতর হু হু করিয়া উঠিল। ডাকাত নয়, তবে চোর হইলে হইতে পারে।

কিস্ত চোর বলিয়াও তো বোধ হইতেছে না।

তবে এ কিসের শব্দ? অভয় দরজার একটি গর্ত দিয়া দেখিল ফুটফুটে জ্যোৎস্না, আকাশের মাঝে উজ্জল চাঁদ সাদা, দীপ্তিময়ী তারকা-রাশি। অভয় বিছানায় আসিয়া রূপ করিয়া বসিয়া পড়িল।

কিসের এ শব্দ?

আচমকা মনে পড়িল হয়তো তাহার মৃত জীর কীর্তি, হয়তো বেচারী এ জগতের মায়াপাশ ছিন্ন করিয়াও স্বামীকে ভুলিতে পারে নাই। তাই কি নিঃশব্দ রাত্রি স্বামীর সহিত দেখা করিতে আসিয়াছে? তৎক্ষণাৎ ভয়ে তাহার গা ডোল হইয়া শিহরিয়া উঠিল। না, জীর এই উৎকট ভালবাসা সে কিছুতেই গ্রহণ করিতে পারিবে না। ক্রমে ক্রমে তাহার সমস্ত চেতনা লোপ পাইতে লাগিল। বকুলের শূন্য শয্যার পানে চাহিবার সাহস আর তাহার রহিল না। সমস্ত শোক-দুঃখ-বেদনা ভয়ে

ও ভাবনায় রূপান্তরিত হইল। সে কিংকর্তব্যবিমূঢ় হইয়া শয্যার উপর অবশভাবে বসিয়া রহিল। কি সে করিবে? চিংকার করিবে, না জ্ঞান হারাইয়া ফেলিবে? ভাবিয়া সে কূল-কিনারা পাইল না। সে ছেলেবেলায় কত ভৌতিক কাহিনী পড়িয়াছে, আজ কেমন যেন সেই সব নানা ভৌতিক ব্যাপার জীবন্ত হইয়া উঠিল! সে বন্ধ-জানালা-দরজার পানে সচকিত চিত্তে একদৃষ্টে চাহিয়া রহিল। কে জানে কোন্ মুহূর্তে দম্কা বাতাসে জানালা-দরজাগুলি হুড়মুড় করিয়া খুলিয়া যায়।

অকস্মাৎ আবার সেই পূর্বের স্থায় দ্বারে শব্দ হইল। বাতির হইতে মানুষে যেন দ্বার ঠেলিতেছে। অভয় ছুটিয়া দ্বারপ্রান্তে গিয়া সেই ফুটা দিয়া বাত্মিরে তাকাইল। কিন্তু আশ্চর্য, স্থূল দৃষ্টিতে দেখিল একটি হুটপুট ভিটামিনের মাপকাঠির চিহ্নস্বরূপ পাঞ্জাবী হুত্ব হনহন করিয়া তাহার রুদ্ধদ্বারে মাথা খুঁড়িয়া পলাইয়া গেল।

বিপুল বিশ্বয়ে অভয়ের মুখে কোন কথা সরিল না, কেবল তৃপ্তির ও প্রশান্তির হাসি খেলিয়া গেল। যাহা হউক, যদি ডাকাতেই পড়িত বা চোরই আসিত। কতদিন হইতে সে ভাবিয়াছে গহনাপত্র পয়সা-কড়ি অন্ত্র সাবধানে রাখিয়া দিবে, কিন্তু ফুরসত পায় নাই। তাই আজ গুপ্তস্থান হইতে চাবি বাহির করিয়া সিন্দুক খুলিয়া দেখিবে তাহার সব-কিছু মজুত আছে কিনা। ধীরে ধীরে সে সিন্দুক খুলিয়া ফর্দ মিলাইয়া তাহার সম্পত্তি দেখিতে লাগিল। ফর্দ মিলাইতে মিলাইতে তাহার তৃষ্ণা পাইয়া গেল। ভাবিল বকুলকে জল আনিতে বলে, হয়তো বলিতও তাহাকে, যদি-না তৎক্ষণাৎ মনে পড়িত তাহার মৃত্যুর কথা। না, একটা চাকর ও একটা ঝি না রাখিলে চলিবে না। বকুল আসিয়া পর্যন্ত সে উহাদের বিদায় করিয়াছিল; কিন্তু আজ তো তাহাদের না হইলে অভয়ের আদৌ চলে না। কম করিয়াও খাওয়া-পরা বাদে তাহাদের জন্য অভয়কে মাসে অন্তত দশটা টাকা ব্যয় করিতে হইবে, বৎসর শেষে

বিভূতিভূষণ : সন্ন্যাস গল্প

এই দশটি টাকা আবার এক শ' কুড়ি টাকায় পরিণত হইবে। বাৎসরিক মোটা অঙ্কটা দেখিয়া সে শিহরিয়া উঠিল।

যথাসময়ে রাত্রি দুইটা বাজিল। অভয় তখন বাস্তব হাতড়াইতেছে। তাহার চুল উস্কা-খুস্কা হইয়া গিয়াছে, চক্ষু যেন ঠিকরাইয়া পড়িবার উপক্রম হইয়াছে, ঘন ঘন অস্বস্তির নিঃশ্বাস পড়িতেছে। গভীর রাত্রেই সে জীর শূন্য শয্যায় আসিয়া আছড়াইয়া পড়িল। আবার সে বিনাইয়া বিনাইয়া চাপা-কণ্ঠে কাঁদিতে লাগিল। দেওয়ালে টাঙানো জীর ফটোখানার দিকে একদৃষ্টিতে চাহিয়া রহিল। ফটো দেখিয়া বকুলকে চেনা মুশকিল। কোন্ মাফকাতার আমলে ঐখানি তোলা হইয়াছিল। তার পর ফটো তুলিবার প্রয়োজন বা সদিচ্ছা আর তাহার হয় নাই।

দুইটা তিনটা করিয়া রাত্রি ধীরে ধীরে কাটিয়া যাইতে লাগিল। অভয়ের চোখে তখনও ঘুম নাই। তখনও সে তাহার দীর্ঘ চুলের মধ্যে অঙ্গুলিচালনা করিয়া কি যেন আকাশ-পাতাল ভাবিতে লাগিল। হয়তো সে পত্নীশোকে বিবশ হইয়া গিয়াছে। শয্যা হইতে উঠিয়া অভয় ঘরময় পায়চারি করিতে লাগিল। খোলা জানালা দিয়া বাহিরে আকাশের পানে অনিমেঘে চাহিয়া রহিল। চাঁদ অনেকটা হেলিয়া পড়িয়াছে, তারায় তারায় আকাশ ছাইয়া গিয়াছে। তাহার বকের ভিতর সহসা ছ ছ করিয়া উঠিল। কয়েক বিন্দু অশ্রু তাহার গণ্ড বাহিয়া ঝরিয়া পড়িল। কিছুতেই সে ঘুমাইতে পারিল না। ঘুম দূরের কথা, সে তাহার বিছানায় শুইতেই পারিল না। শয্যা তাহাকে কাঁটার স্থায়, বিধিতে লাগিল।

একবার ভাবিল যে লোটাকম্বল লইয়া যেখানে ছুচোখ যায়, সেখানে চলিয়া যাইবে। আর সে সংসার করিতে পারে না। সে হয়তো পাগল হইয়া যাইবে। পাগল হইবার তাহার বাকিই বা কি আছে। বিপদ

যখন আসে তখন সে তো আর একা একা চুপি চুপি আসে না। এমন করিয়া অঘটন ঘটিলে সে কি করিয়া বাঁচিবে ?

আজ সে যে শোক পাইয়াছে তাহার কাছে তাহার মৃত্যুজনিত শোক সম্পূর্ণ তুচ্ছ। জীব শোক সে ভুলিতে পারে ; কিন্তু এ শোক তো সে কখনও কোন কালে ভুলিতে পারিবে না ! গত ছয় দিন ছয় রাত্রি এই দারুণ উদ্বেগে কাটিয়াছে, যতটা জীব বিরহে না হউক, তাহার বেশি ওই বৎসরে এক শ' কুড়ি টাকা খরচের ভয়ে। সেই ভয়েই তাহার ছয় দিন ছয় রাত্রি ঘুম হয় নাই। বকুল ছিল সংসারে নিতান্ত প্রয়োজনীয়। তাহার মৃত্যুতে সংসার একেবারে বিপর্যস্ত হইয়া গিয়াছে ; কি দিয়া অভয় সে সংসারকে শূশ্রূষার মধ্যে আনিবে ? ভাবিয়া ভাবিয়া অভয় আজ ছয় দিন ধরিয়া হৃদিস পায় নাই। জী মানুষের মরে, অভয়ের তাহাতে তত দুঃখ নাই। কিন্তু ঐ যে কথা আছে, ভাগ্যবানের বউ মরে, অভাগার ঘোড়া মরে—তবে জীব মৃত্যুর পর অভয় ভাগ্যবান হইল কই ?

জীব মৃত্যুতে তাহার আদৌ দুঃখ নাই। সে তাহার জীব গহনার বাস্তুটি আবার ফর্দ মিলাইয়া দেখিল। না, সে জিনিসটি নাই। অভয়ের চোখ দিয়া হু হু করিয়া জল পড়িতে লাগিল। মানুষ মানুষকে কি এমন করিয়াই ফাঁকি দেয় ? লোকসানের পর এমন করিয়া লোকসান হইলে সে কি করিয়া সহ্য করিবে ? না, এই লোকসান সহিয়া সে কখনও সংসারের মধ্যে পড়িয়া থাকিবে না। গহনার বাস্তুটির পানে সে শোণদৃষ্টিতে চাহিয়া রহিল। জীব ব্যবহৃত গহনার সব কিছুই আছে, সব কিছুই সে নিপুণ হস্তে মৃত বকুলের গা হইতে খুলিয়া লইয়াছে। কাশী হইতে তাহার ছোট বোন সেই যে কারুকার্যখচিত কাচের চুড়ি চারগাছি পাঠাইয়াছিল, সেগুলিও সে সময়ে ভুলিয়া রাখিয়াছে। সব ভুলিয়াছে, কিন্তু ভুল করিয়াছে বকুলের কানের ফুল দুটি খুলিতে

বিভূতভিষণ : সরস গল্প

এক আনা সোনা দিয়া সে ছুটি সে গড়াইয়াছিল। চুলের আড়ালে আত্মগোপন করিয়া সে ছুটি শবদেহের সহিত গিয়া চিতায় ভস্মীভূত হইয়াছে।

সেই কারণে অভয়ের আজ সারারাত্রি ঘুম হইল না। জীর মৃত্যু সে সহ করিতে পারে; কিন্তু এই লোকসানের আঘাত সে ভুলিবে কেমন করিয়া? যতবার সে ঘুমাইতে যায়, ততবারই ঐ ফুল ছটির হিংস্র উজ্জলতা যেন ধক্ধক্ করিয়া জলিয়া ওঠে মাথায়। আর অভয় কিছুতেই ঘুমাইতে পারে না।

সারারাত্রি সে জাগিয়া বাসিয়া রহিল, সারারাত্রি সে কাঁদিয়া কাঁদিয়া আকুল হইল। জীর মৃত্যুতে কেন সে ভাগ্যবান হইল না?

For More Books

Visit

www.BDeBooks.Com



E-BOOK